

APÓSTOLO AG TỸ NÉN HAN KĀME

1 ¹Teófilo, inh livro ve ki sóg ã mỹ Jesus tỹ nén han kar tó ja nĩ, ti tỹ nén han vén mũ ên ti, ti tỹ nén han rén ên ti ke gé. Ti tỹ êg kanhrân mũ ên rán sóg huri ke gé. ²Kỹ sóg ti tỹ kanhkā ra tãp̄ry mũ rán huri ke gé. Ā tỹ kanhkā ra tãp̄ry to hã tóg apóstolo ag mré vēmén ja nĩ ver, ã tỹ ùn kuprêg mũ ag mré. Topê kuprīg tỹ ti mỹ nén tó mũ ên tó tóg mũ ag mỹ, ag tỹ ki hã han jé. ³Ā ter kar kỹ Jesus tóg ag mỹ vēnh ven tỹ hēn ri ke han ja nĩ, kurā tỹ 40 (ke) ki. Rĩr mǎn kỹ tóg ag mỹ vēnh ven ja nĩ, ti tỹ ùn kuprêg ja ên ag mỹ. Ag tỹ ti ve kỹ, ag tỹ ti mré vēmén kỹ ag tóg ti rĩr jê ki kanhró nỹtĩ, apóstolo ag. Ag mỹ tóg Topê tỹ tỹ êg pãli nĩ kāmén mũ, Jesus ti.

⁴Kejēn tóg ag mré nĩ nĩ. Kỹ tóg ag mỹ: “ver cidade tỹ Jerusalém tá kãpa tũg nĩ,” he mũ. “Tá nỹtĩ kỹ Topê tỹ ãjag mỹ nén tó ja jāvānh nĩ,” he tóg, “isỹ ãjag mỹ nén tó ja ên ti,” he tóg. ⁵“João vỹ goj tỹ êg kygpe ja nĩgtĩ,” he tóg. “Hã ra kãnhmar ãjag tóg Topê kuprīg tỹ jagrê venh ke mũ. Sỹ ãjag kypenh ken hã vê,” he tóg, Jesus ti. Kỹ tóg ti mũ sir.

Jesus tỹ kanhkā ra tĩg

⁶Kejēn ag tóg vēnh mǎn mǎn mũ sir, Jesus tỹ ùn vin mũ ag. Kỹ tóg ag mré nĩ nĩ, Jesus ti. Kỹ ag tóg ti mỹ: “Senhor,” he mũ. “Ā mỹ ù ri êg pãli mág fêg mǎn mũ!, êg povo tỹ Israel tỹ pãli mág?” he ag tóg ti mỹ.

⁷Hã ra tóg ag mỹ: “vó,” he mũ. “Topê hã ki kanhro nĩ,” he tóg. “Ājag tũ pijé!” he tóg. “Kurā ên ki kanhrân ke tũ ãjag tóg nĩ, Topê tỹ ãjag pãli mág fêg mǎn ke kurā ti. Topê hã ne kurā tag tónh ke mũ,” he tóg. ⁸“Hã ra Topê kuprīg vỹ tỹ ãjag jagrê nĩnh ke mũ. Kỹ ti hã vỹ ãjag tar han ke mũ, ãjag tỹ inh kāmén jé. Cidade tỹ Jerusalém tá ãjag tóg inh kāmén ke mũ, ga tỹ Judéia tá ke gé, ga tỹ Samaria tá ke gé, ga fyn ja tá hã ke gé mỹr,” he tóg, Jesus ti.

⁹Ā tỹ tag tó kar kỹ tóg vāhã kynh mỹ tãp̄ry mũ sir ag rĩnve, kỹ kanhkā góg vỹ ti kri rũm ke mũ sir, ti ve mǎn tũ ag tóg nĩ sir. ¹⁰Hã ra ag tóg kanhkā tugnỹm mũ, ag tỹ ti tĩg ven kỹ, ti tỹ ùn vin mũ ag.

Kỹ vāhã ùn régre ag tóg tá nỹtĩ, kur kupri rĩnh kỹ. Topê tỹ jēnē jafā ag vê, ùn régre ên ag. ¹¹Kỹ ag tóg ag mỹ: “ha vé, Galiléia tá ke!” he mũ. “Ājag hã

ne tóg kanhkā tá ěvānh nýtī nī,” he ag tóg. “Jesus vỹ vỹn kenh mũ, ti tĩg ja ěn ri ke han jé tóg ke mũ. Ti tỹ kanhkā ra tāp̄ry vỹ, hã ra tóg tá kătère m̄n ke mũ gé,” he ag tóg, Topẽ tỹ jẽnẽ jafã ag, Jesus tỹ ùn vin mũ ag mỹ.

Ag tỹ Matias fẽg

¹²Kỹ Jesus tỹ ùn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kỹ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

¹³Ag tỹ Jerusalém tá junjun kỹ ag tóg ãn to jãp̄ry jafã to jãp̄ry mũ, tá nýtĩ jé, ãn kri. Û tỹ tá nýtĩ ag hã vỹ: Pedro, João, Tiago, André, Filipe, Tomé, Bartolomeu, Mateus, Tiago ù hã vỹ: Alfeu kósin, he mũ, Simão ke gé, vỹ tar han tĩ tag ti, Judas ke gé, Tiago kósin tag ti. ¹⁴Ag kar ěn tóg Topẽ mré vỹ mũ, jagnẽ mré, ùn týtã fag mré hã, Maria fi mré hã, Jesus mỹnh ěn fi, Jesus jãvy ag mré hã ke gé, ha mẽ.

¹⁵Kejẽn Jesus mré ke tỹ hẽn ri ke ag vỹ tá nýtĩ nĩ, ãn to jãp̄ry jafã ěn tá, ù tỹ 100 kri 20 (ke) hỹn.

¹⁶Kỹ Pedro vỹ tóg jẽg nẽ mũ, kỹ tóg: “ha vé, inh kanhkã!” he mũ. “Vãsỹ tóg rán kỹ nĩ, Judas to,” he tóg. “Topẽ kuprĩg tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vẽnh rán ki,” he tóg. “Ag jãmĩ tóg kătĩg ja nĩ, Judas ti, ù tỹ Jesus kãgmĩnh ke mũ ag jãmĩ. ¹⁷Hã ra tóg tỹ ěg mré ke ja nĩ, kỹ ti tỹ nén han mũ tóg ěg tỹ nén han mũ ri ke ja nĩ gé,” he tóg, Pedro ti. ¹⁸“Hã ra tóg Jesus kato jãnkamy m̄n ja nĩ, kỹ tóg jãnkamy ěn tỹ ěp̄y kajãm ja nĩgtĩ. Hã ra tóg ã nunh kã vẽnh jãján ja nĩ, kỹ tóg tam ke kỹ kutẽ ja nĩ, kỹ ti nug tóg jar ja nĩ, kỹ ti nug tóg kãkutẽ ja nĩ, kỹ tóg ter ja nĩ, Judas ti,” he tóg, Pedro ti.

¹⁹“Kỹ Jerusalém tá ke kar ag tóg mẽg mũ sir, hã kỹ ag tóg ti jap̄y to: Aceldama, he mũ, hã vỹ: ěp̄y kyvẽnh, he mũ, ěg vỹ ki,” he tóg, Pedro ti.

²⁰“Ěg tỹ Topẽ mỹ jãn jãn jafã ki tag tóg rán kỹ nĩ, hã mẽ: ěn jamã vỹ vag ke mũ, ù pi(jé) ki ěmãn m̄n mũ!, he tóg, vẽnh rán ki, Judas to,” he tóg, Pedro ti. “Kỹ ù vỹ ge nĩ gé, hã mẽ: ù ù tỹ ti jẽg ja kã jẽnh ke kỹ ti rãnhraj han ke vỹ, he tóg mũ gé, vẽnh rán ki,” he tóg, Pedro ti. ²¹“Hã kỹ ěg tỹ ěg mré mũ tĩ ù jãvãnh ke vỹ. Jesus mré tóg tĩg ja nĩgtĩ, ěg tỹ ùn jãvãnh ke mũ ti, kỹ tóg Jesus tỹ ga mĩ tĩ ěn ve ja nĩgtĩ gé. ²²João tỹ Jesus kype ve ja tóg nĩ gé. Jesus tỹ kanhkã ra tāp̄ry ve ja tóg nĩ gé. Jesus tỹ nén han mũ kar ve ja tóg nĩ, ěg tỹ ùn jãvãnh ke mũ ti. Kỹ tóg sir Jesus rĩr m̄n tónh ke mũ ěg mré,” he tóg, Pedro ti.

²³Kỹ ag tóg ùn régre ag vin mũ, hã vỹ: José, he mũ, ti jyjy ù hã vỹ: Barsabás, he mũ. Fóg tỹ ti jiji hã vỹ: Justo, he mũ. Ti mré ag tóg Matias fẽg mũ gé. ²⁴Kỹ ag tóg Topẽ mré vỹ mũ, kỹ ag tóg tag tó mũ, ha mẽ. “Ěg jóg!” he ag tóg ti mỹ. “Ěg tỹ nén to jykrén mũ ki kanhró ã tóg nĩ,” he ag tóg mũ. “Ã hỹn ù tỹ hẽ kuprẽg, ùn régre tag ag kã, ²⁵ti tỹ ěg mré ã rãnhraj tag han jé, ti tỹ tỹ ěg mré apóstolo jẽ jé? Judas vỹ ã rãnhraj tovãnh, kỹ tóg ã tỹ ra tĩg ke ěn ra vyr. Kỹ ù tỹ hẽ nỹ ti jẽg ja kã jẽnh mũ ha?” he ag tóg mũ, Topẽ

mỹ. ²⁶Kỹ ag tóg to jogar he mũ sir, hã ra Matias tóg Judas jējga kã jẽ nĩ. Hã kỹ tóg tỹ ù tỹ 11 (ke) ag mré ke nĩ sir, tỹ tóg apóstolo jẽ sir.

Topê kuprĩg tỹ tỹ ěg jagrê

2 ¹Vãhã tóg festa tỹ Pentecostes kurã tá krỹg mũ. Kỹ vẽnĥ kar vỹ vẽnĥ mãn kỹ nỹtĩ nĩ, Jesus ki ge kỹ nỹtĩ kar ěn ag.

²Kỹ vãhã kanĥkã tá kóho ri ke tóg mẽ há tĩ, króg he mũ ěn ti. Kỹ ĩn tóg kóho ri ke ěn tỹ fór mũ. Hã ra ag tóg ĩn ěn ki nỹtĩ, Jesus ki ge kỹ nỹtĩ ag.

³Kỹ ag tóg nén nẽ vэг mũ, hã ra tóg tỹ pĩ gru hã pẽ nĩ, nén nẽ ěn ti. Vẽnĥ kãpópãm kỹ tóg nĩ nĩ, pĩ gru hã pẽ ěn ti. Kỹ tóg ag kri nĩ' nĩ' he kãn mũ, pĩ gru hã pẽ ěn ti. ⁴Kỹ Topê kuprĩg tóg ag ki ge kãn mũ, kỹ ag tóg vẽnĥ vĩ ù tugtó mũ, Topê kuprĩg tỹ ag krĩn kỹ, ti tỹ tỹ ag jagrê nĩn kỹ.

⁵Hã ra Jerusalém tá ke ù ag tóg Topê to há nỹtĩ gé. Israel ag vè gé, hã ra ag tóg povo tỹ hẽn ri ke mũ mogmog ja nĩ. Hã kỹ ag vĩ tóg tó tỹ hẽn ri ke nĩ.

⁶Ag tỹ kóho ri ke ěn mẽ kỹ ag tóg vẽnĥ mãn mũ. Kỹ ag tóg ajag vĩ e ěn ki Pedro ag tỹ nén tó mũ mẽg mũ. ⁷Kỹ tóg ag mỹ e tĩ. Ag fe tỹ hẽn ri ke nĩn kỹ ag tóg: “há vé, Galiléia tá ke ag vè mỹr,” he mũ. “Galiléia tá ke ag vỹ vyr mỹ vĩ nỹtĩ. ⁸Hã ra ěg tóg ěg vĩ pẽ ki ag vĩ jēmeg mũ,” he ag tóg. ⁹“Ěg kã ù ag tóg Pártia tá kãmũ mũ, kỹ ù ag tóg Média tá kãmũ mũ gé, ù ag tóg ga tỹ Elão tá kãmũ mũ, ù ag tóg ga tỹ Mesopotãmia tá kãmũ mũ, ù ag tóg Judéia tá kãmũ mũ, ù ag tóg Capadócia tá kãmũ mũ, kar kỹ Ponto tá, Ásia tá, ¹⁰Frígia tá, Panfília tá, Egito tá, ga tỹ Líbia tá, cidade tỹ Cirene ěn mã tá. Û ag tóg cidade tỹ Roma tá kãmũ mũ gé. ¹¹Û ag tóg tỹ Israel nỹtĩ, kar kỹ ù ag tóg tỹ fóg tỹ Israel jykre han mũ nỹtĩ gé. Û ag tóg goj vãso tỹ Creta tá kãmũ mũ, ù ag tóg ga tỹ Arábia tá kãmũ mũ gé. Ěg kar tóg ěg vĩ pẽ ki ag tỹ Topê kãmén mũ mẽg mũ, ag tỹ Topê tỹ nén han ja kãmén mũ ti, Topê tỹ milagre hyn han ja ěn ti,” he ag tóg. ¹²Ajag mỹ e tĩn kỹ ag tóg jagnê mỹ: “ne nẽ hỹn'?” he mũ. Ag fe tóg jürũn ke mũ, ag tỹ ge ve ja tũ nỹtĩn kỹ.

¹³Û ag tóg hã ra nyg mũ. “Kronkron kỹ ag kãgter mũ mỹr,” he ag tóg.

Pedro tỹ ag mỹ Topê vĩ tó

¹⁴Kỹ Pedro tóg ù tỹ 11 (ke) ag mré jěgnê mũ, kỹ tóg jamã hár(a) ag mỹ: “inh kanĥkã!,” he mũ. “Jerusalém tá ke!,” he tóg. “Jēmẽ há han ra, sỹ ajag mỹ nén tó mũ ti,” he tóg. ¹⁵“Ajag hã tóg ěg to: kronkron kỹ ag kãgter mũ, he mũ. Hã tũ vè hã ra. 9 horas vè ver, meio dia to hãn sa mỹr,” he tóg. “Ag kronkron kỹ ag tóg rãkãnh kỹ kronkron kỹ kãgter mũgtĩ, ùn kronkron mũ ěn ag,” he tóg. “Hã kỹ ěg tóg kron ja tũ nĩ,” he tóg, Pedro ti.

¹⁶“Hã ra tóg vãsỹ rán kỹ nĩ, ěg tỹ ùri nén vэг mũ ti. Topê vĩ tó tĩ tỹ Joel tóg vãsỹ tag tó ja nĩ, ha mẽ: ¹⁷“kurã tỹ ěgno to hã sóg inh kuprĩg jěnẽnh mũ, vẽnĥ kar mỹ, ti tỹ tỹ ajag jagrê nĩ jé,” he ja tóg nĩ, Topê ti. “Kỹ ajag krê ag tỹ fag mré Topê vĩ mẽ kỹ tónĥ ke vè. Kyrũ ag tỹ nén nẽ venĥ ke vè. Kófa ag tỹ vẽnĥ pétĩnĥ ke vè. ¹⁸Sỹ inh camarada ag mỹ inh kuprĩg jěnẽnh ke vè gé, fag

mỹ ke gé. Kĩ fag tóg inh vī tónh ke mũ gé,” he tóg, Topê ti. ¹⁹“Ājag tỹ nén han vānh han jé sóg ke mũ gé, ājag mỹ, kanhkā tá, ga tá ke gé, ěprā, kyvénh mỹr, pĩ mỹr, nĩja mỹr. ²⁰Kỹ rā tỹ kutyg ke vē, kysā kyvénh ke vē gé. Kar kỹ Topê kurā vē sir, kurā mág ěn ti. ²¹Kỹ ũ tỹ Topê mỹ nén kar to vī mũ ěn kren ke vē sir,” he tóg, Topê ti. Joel tỹ tón hā vē, vāsỹ,” he tóg, Pedro ti.

²²“Inh kanhkā!, inh vī jēmē ra,” he tóg. “Nazaré tá Jesus vē mỹr,” he tóg. “Ti hā tóg nén han vānh hyn han ja nĩgtĩ, Topê jykre hyn han ja tóg nĩgtĩ, Topê tỹ ti jēnēn kỹ. Hā ra Topê tóg Jesus mỹ tó ja nĩ, ti tỹ milagre ěn hyn han jé. Kỹ tóg ājag rĩnve hyn han, ājag tỹ ve jé, Jesus to jykrén jé. Hā kỹ ājag tóg vé,” he tóg, Pedro ti. ²³“Hā ra Topê tóg ājag mỹ ti fěg sór ja nĩ, Jesus ti. Kỹ tóg to jykrén kỹ ājag mỹ ti fěg ja nĩ. Jāvo ājag tóg ka to ti sa ja nĩ, ti tén ja ājag tóg nĩ. Kỹ ũ tỹ ka to ti sǎg mũ ěn ag jykre vỹ pāno tāvĩ nĩ. ²⁴Hā ra Topê tóg ti rĩn mǎn ja nĩ, hā kỹ tóg vēser jagēgtar ěn tỹ tũ! he ja nĩ ti mỹ. Hā kỹ tóg vēser jamā tá nĩg mág ja tũ nĩ, Jesus ti,” he tóg, Pedro ti.

²⁵“Hā kỹ Davi tóg Jesus jo tag tó ja nĩ, kỹ tóg Jesus tỹ ā jóg mré vĩ ri ke nĩ. Ti to tóg: “ěg jóg!” he ja nĩ. “Ā vég isóg nĩ nĩ,” he ja tóg nĩ. “Inh pějja tá ā tóg nĩ nĩ, hā kỹ sóg krónh ke tũ nĩ,” he ja tóg nĩ, Davi ti. ²⁶“Hā kỹ inh fe tóg mrin ke mũ. Vĩ sér han isóg nĩ nĩ. Iser kỹ inh fár tóg nỹnh ke mũ, hā ra sóg to krĩ kufy tũ nĩ. ²⁷Inh kuprĩg vỹ vėnh kuprĩg jamā tá nĩnh ke tũ nĩ. Inh fár vỹ vag ke tũ nĩ gé, sỹ tỹ ā tỹ kuprėg ja nĩn kỹ,” he ja tóg nĩ, Davi ti, Topê mỹ. ²⁸“Inh kanhrān ā tóg nĩ nĩ, isỹ kanhkā to ěpřy ěn ve há han jé, kanhkā to ěmĩn ěn ti. Isỹ ā mré nĩn kỹ tóg inh mỹ sér tāvĩ tĩ,” he ja tóg nĩ. Davi tỹ Jesus tón hā vē,” he tóg, Pedro ti.

²⁹“Inh kanhkā!,” he tóg. “Ěg jóg!jóg tỹ Davi kāmén há han jé sóg ke mũ ājag mỹ,” he tóg. “Vāsỹ ti ter mỹr, kỹ ag tóg vėnh kej tá ti péju, hā ra ěg tóg vég tĩ, ti kej ti, Davi kej ti,” he tóg. ³⁰“Ā tỹ ga mĩ tĩg kỹ tóg hā ra Topê vĩ tó tĩ ja nĩgtĩ, Davi ti. Topê tóg ti mỹ: “ā krė!krė ag kǎ ũ vỹ tỹ pǎ!i tỹ rei nĩnh mũ,” he ja nĩgtĩ, Topê ti. ³¹Topê vĩ tag kri fi kỹ tóg Cristo rĩr mǎn ke tó ja nĩgtĩ gé, Davi ti. Hā kỹ tóg ā vĩ ěn tó ja nĩgtĩ. Cristo pi(jé) vēser jamā tá nĩg mág han!, kỹ ti fár vỹ vag ja tũ nĩ gé,” he tóg, Pedro ti.

³²“Cristo vē, hā vỹ: Jesus, he mũ. Topê vỹ ti rĩn mǎn, kỹ ěg kar tóg ti ve ja nĩgtĩ,” he tóg. ³³“Topê tóg ti mỹ: “kunĩg, inh pějja tá nĩ,” he ja nĩ, Jesus ti mỹ. Kỹ ěg jóg tóg ti mỹ ā tỹ ěg mỹ nén tó ja fěg, hā vỹ: Topê kuprĩg, he mũ. Hā kỹ tóg ěg mỹ tỹ jagrė han mũ, Topê kuprĩg tỹ, Jesus ti. Hā kỹ ājag tóg ũri tag vég mũ, tag mėg mũ,” he tóg, Pedro ti.

³⁴“Davi hā tóg rĩr mǎn ja tũ nĩ ver, kanhkā ra tóg tāpřy ja tũ nĩ ver, ge ra tóg tag tó ja nĩ, ha mē: “ěg jóg mág vỹ inh Senhor mỹ tag tó ja nĩ, hā vỹ: “nĩ ra ver, inh pějja tá,” he ja tóg nĩ, ³⁵“sỹ ā kato vāsǎnsǎn mũ ag tỹ ā jakrėm vin jé, ag sigse jé,” he ja tóg nĩ. Davi tỹ tón hā vē,” he tóg, Pedro ti.

³⁶“Jesus tag hā vỹ, ājag tỹ ka to ũn sǎg mũ tag hā vỹ: tỹ ěg Senhor nĩ, he mũ,” he tóg. “Topê vỹ ti to: “tỹ tóg Cristo nĩ,” he mũ. “Tỹ tóg vėnh kar Senhor nĩ,” he tóg. Ěg tỹ vėnh vĩ tag kri finh ke vē. Ěg povo tỹ Israel tỹ ti ki kanhrān ke vē, ěg vĩ tag kri nĩm ke vē,” he tóg, Pedro ti, ũ tỹ vėnh mǎn kỹ nỹtĩ kar ag mỹ.

³⁷Ag t̄y ti vī jēmē k̄y ti jykre tóg ag k̄ara rã m̄ũ sir. K̄y ag tóg ti m̄y: “k̄y ěg h̄yn h̄e ri kenh m̄ũ, v̄y?” he m̄ũ, Jesus t̄y ũn vin m̄ũ kar ag m̄y ke gé.

³⁸K̄y Pedro tóg ag m̄y: “ãjag jykre tovãnh ra,” he m̄ũ. “K̄y ěg tóg ãjag kygpenh ke m̄ũ, Jesus Cristo jiji tó k̄y,” he tóg. “K̄y Topē tóg ãjag m̄y ãjag t̄y ti vī mranh ja ěn t̄y vēnh pãte fón ke m̄ũ. K̄y ãjag tóg Topē kuprig t̄y jagrē n̄yt̄inh m̄ũ gé, Topē t̄y ãjag m̄y ti jēnēn k̄y. ³⁹Ti t̄y ãjag hã m̄y ti n̄im ke vē inhhã, ãjag krē mré hã ke gé. Ti t̄y ũn m̄y vēnh vī jēnēg m̄ũ kar ag m̄y tóg n̄im tí, Topē ti, ěg jóg mág ti, ag t̄y ver kuvar há tá m̄ũ hã ra,” he tóg, Pedro ti.

⁴⁰Vī t̄y h̄en ri ke han tóg, Jesus kāmén k̄y. Ag jyv̄en tóg m̄ũ gé, k̄y tóg ag m̄y: “Jesus m̄y: “inh kren han n̄i,” hemn̄i,” he m̄ũ. “Ěg kar v̄y vēnh jykre pãno han kãn, ã jykre han vãnh n̄yt̄inh k̄y. K̄y inh kren han n̄i, hemn̄i, Jesus m̄y,” he tóg, Pedro ti.

⁴¹Ū t̄y ti vī han m̄ũ ag kygpég ag tóg m̄ũ sir. Kurã ěn kã ũn kygpe k̄y n̄yt̄i ag v̄y t̄y ũ t̄y 3 mil n̄yt̄i h̄yn, h̄en ri ke m̄ũn. ⁴²Ěn ag v̄y kurã kar ki Jesus t̄y ũn vin m̄ũ ag vī jēmē jé vēnh m̄an tí, jagnē ve jé ke gé. K̄y ag tóg Jesus jam̄i ko m̄ũ sir. K̄y ag tóg ti mré vī m̄ũ gé, kurã kar ki.

Jesus ki ge m̄ũ ag jykre ti

⁴³K̄y Jesus t̄y ũn vin m̄ũ ag tóg ěg t̄y n̄en han vãnh t̄y h̄en ri ke han tí n̄yt̄igt̄i. Hã k̄y vēnh kar tóg Topē kam̄eg tí. ⁴⁴Jãvo ũ t̄y Jesus ki ge k̄y n̄yt̄i ag tóg jagnē mré vēnh jykre pir han m̄ũgt̄i. K̄y ag kuge v̄y jagnē tũ ri ke n̄yt̄i. ⁴⁵Ū ag tóg ãjag kuge ũ vãvãm m̄ũ gé, jãnkamy kato, k̄y ag tóg ũn jãnkamy tũ ag m̄y vēnh kãpópãm m̄ũ. ⁴⁶Kurã kar ki ag kar tóg Topē jo ĩn ra m̄ũ tí, ag t̄y ti mré vī jé. ãjag ĩn kãki ag tóg Jesus jam̄i ko m̄ũgt̄i gé. Jatun m̄y ag tóg sir j̄egj̄eg m̄ũ. K̄y tóg ag m̄y sér tí sir. ⁴⁷K̄y ag tóg Topē m̄y: “há ti n̄i,” he ti gé. Jó vēnh kar tóg ag to há n̄yt̄i gé. K̄y Topē tóg kurã kar ki ũ ag m̄y kr̄i há n̄im tí gé, k̄y ag tóg ti ki ge m̄ũ, ag krenkren jé. Hã k̄y ag tóg kom̄er hã e n̄yt̄i.

Ūn gr̄i t̄y há' he

3 ¹Kej̄en Pedro tóg João mré Topē jo ĩn ra m̄ũ m̄ũ, meio dia pãte 3 horas ki. Israel ag t̄y Topē mré vī jafã vē, hã v̄y: 3 horas, he m̄ũ.

²Topē jo ĩn tá ũ tóg n̄i n̄i, ũn gr̄i. Ā m̄ur m̄ũ kã tóg ge n̄i. Topē jo ĩn jãnkã tá tóg n̄i n̄i, jãnkã s̄inv̄i he m̄ũ ěn tá. Tá tóg: “inh m̄y n̄en ũ n̄im,” he n̄igt̄i, ũ t̄y Topē jo ĩn kãra ge m̄ũ ag m̄y.

Ěn va ag tóg kãmũ m̄ũ, jãnkã tá ti n̄im jé. K̄y João mré Pedro tóg Topē jo ĩn tá junjun m̄ũ. ³Ūn gr̄i t̄y Pedro ag ve k̄y tóg ag m̄y n̄en ũ to vī m̄ũ.

⁴K̄y Pedro ag tóg ti tugn̄ym m̄ũ. K̄y Pedro tóg ti m̄y: “ěg ki ěvãnh ra,” he m̄ũ. ⁵K̄y tóg ag ki ěvãnh m̄ũ. “Ag h̄yn inh m̄y jãnkamy n̄im ke m̄ũ,” he tóg.

⁶Hã ra Pedro tóg ti m̄y: “jãnkamy tóg inh m̄y tũ tí,” he m̄ũ. “S̄y n̄en ma tí hã t̄y sóg ã m̄y n̄im m̄ũ, hã v̄y: Jesus Cristo jyjy hã tó k̄y, Nazaré tá ke ěn jiji tó k̄y sóg ã m̄y: ha j̄eg, he m̄ũ, ha m̄i t̄ig, he sóg ã m̄y,” he tóg, Pedro ti, ũn gr̄i m̄y. ⁷K̄y tóg ti p̄egja tá ti kãgm̄i k̄y ti f̄eg m̄ũ.

Kỹ vāhā ti pēn tóg tar' he mū sir, ti pēn nágán ti. ⁸Hūm hen kỹ tóg jē nī sir. Jēg há' he tóg mū sir. Mī tóg tī mū sir. Ag mré tóg Topē jo ĩn kāra rā mū sir. Tá tóg mī tī kỹ hūm hūm he mū. Topē mý tóg vī há han mū sir.

⁹Kỹ vēnh kar tóg ti vég mū, ti tỹ mī tīg kỹ, ti tỹ Topē mý vī há han kỹ. ¹⁰Ag tỹ ti ve kỹ ag tóg ti ki kanhró nýtī. “Topē jo ĩn jānkā tá nī ěn hā vē mýr,” he ag tóg mū. “Jānkā sīnvī he mū ěn tá nī mūn hā vē mýr,” he ag tóg mū. “Vēnh kar mý: inh mý nīm, he tī ěn hā vē mýr,” he ag tóg ti to. Kỹ tóg ag mý e tī sir. Ag fe tóg jūrūn ke mū sir, ag tỹ ti ven kỹ.

Pedro tỹ Topē jykre kāmén mū

¹¹Hā ra tóg Pedro mré João mré tī mū, ũn grī ja ěn ti. Hā kỹ vēnh kar tóg ag to vēnh mǎn mū, Topē jo ĩn krēm, pǎi tỹ Salomāo he mū ěn sala tá. Vēnh kar ag mý tóg e tī, ũn grī ěn tỹ há' hen kỹ.

¹²Ā tỹ ũn e ěn ag ve kỹ Pedro tóg ag mý: “inh kanhkā!,” he mū. “Ājag fe hā ne tóg jūrūn ke mū!,” he tóg. “Ēg tỹ vēsóg ki ti tỹ há' he tū vē. Topē tỹ ti tỹ tīg há' he vē mýr. Ēg tỹ vēnh jykre kuryj han mū ra ěg tóg ge han ki kagtīg nýtī vē,” he tóg, Pedro ti, ũn e ěn ag mý.

¹³“Ēg jóg'jóg ve ag vỹ Topē to há ja nýtigtī, Abraão ti, Isaque ti, Jacó ti ke gé. Topē ěn vē mýr, ũ tỹ ti tỹ há' he mū ti,” he tóg. “Topē ěn vỹ ā kósín tỹ ũn mág han. Ti kósín hā vē, hā vỹ: Jesus, he mū. Hā ra ājag tóg fóg ag mý ti fēg ja nigtī. Fóg tỹ pǎi tỹ Pilatos vỹ: “ti kavān jé sóg ke mū,” he mū vē. Hā ra ājag tóg ti mý: “nejé,” he ja nigtī. ¹⁴Ū tỹ vēnh jykre kuryj han mū to ājag tóg: “nejé,” he ja nigtī, Topē tỹ ũn kuprēg mū ěn to, Jesus ěn to. Hā ra ājag tóg ũ tỹ ũn tén mū to: “ti kyvān ra,” he ja nigtī. ¹⁵Ū tỹ ěg rīnrīr han tī ěn tén ja ājag tóg nigtī mýr. Topē tóg hā ra ti rīn mǎn ja nī, ti ter mū hā ra, kỹ ěg tóg ti ve ja nigtī,” he tóg, Pedro ti, ũn e ěn ag mý.

¹⁶“Kỹ ěg tóg Jesus ki ge mū. Hā kỹ Jesus tóg ũn grī ja tag tỹ tar' he mū, ājag tỹ ũn vég mū tag ti, ājag tỹ ũn ki kanhrān mū tag ti. Jesus vỹ ti tỹ ā ki rā han. Kỹ ti tỹ Jesus ki rā kỹ tóg há' he mū sir, ājag rīnve,” he tóg, Pedro ti.

¹⁷“Inh kanhkā!,” he tóg. “Ājag tỹ ki kagtīg nýtīn kỹ, hā kỹ ājag tóg Jesus tén ja nigtī. Hā kỹ ājag pǎi ag tóg ti tén ja nigtī,” he tóg.

¹⁸“Hā kỹ Topē tóg vāsỹ rán kỹ nī ěn han. Topē vī tó tī ag kar tóg vāsỹ Jesus jagtar ke ti tó ja nigtī, Topē tỹ ag mý: ha tó, hen kỹ. “Topē tỹ ũn jēnēg mū ěn tỹ jagtar ke vē, Cristo ti,” he ja ag tóg nigtī, Topē vī tó tī ag,” he tóg, Pedro ti.

¹⁹“Kỹ ājag jykre tovānh nī. Topē jykre ki gemnī, Topē tỹ ājag tỹ ti vī mranh tỹ tū' he jé. ²⁰Hā kỹ ājag tóg tỹ Topē mré ke nýtī, kỹ tóg ājag krī tỹ kǎnhvy' henh ke mū, Topē ti. Kar kỹ tóg ājag mý ti jēnē mǎn mū gé, ti tỹ ājag mý ũn jēnēnh ke ěn ti, Cristo ti, hā vỹ: Jesus, he mū,” he tóg, Pedro ti. ²¹“Ti tỹ kanhkā tá nī vē ver. Ti tỹ ā kurā pétēm kỹ tóg vāhā tá vỹn kenh mū, Topē tỹ nén kar han mǎn ke kurā ěn kā,” he tóg.

“Hā kỹ Topē tóg vāsỹ ā vī tó tī ag mý tó ja nigtī, ag tỹ vēnh kar mý ti vī tó jé, ti tū ag kar mý. ²²Hā kỹ Moisés vỹ tag tó ja nī, ha mē: “Topē vỹ

ājag mǝ ā vī tó tī ũ jēnēnh ke mǝ, ājag mré ke ũ, ti tǝ ājag mǝ Topē vī tó jé, inh ri kén. Ēn ti vī jēmēmnǝ,” he ja tóg nǝgtǝ, Moisés ti,” he tóg, Pedro ti. ²³“Ũ tǝ ti vī jēmē jāvānh ěn ter ke vē,” he ja tóg nǝgtǝ, “ěn pí(jé) tǝ Topē tǝ nǝ!” he ja tóg nǝgtǝ, Moisés ti,” he tóg, Pedro ti.

²⁴“Topē vī tó tǝ ag kar vǝ tó ja nǝgtǝ, ěg tǝ ũri vég mǝ tag ti. Samuel vǝ tag tó vén ja nǝgtǝ, kar ti nón ke ag kar tóg tag tó ja nǝ gé vāhā,” he tóg, Pedro ti.

²⁵“Topē vī tó tǝ ěn krē vǝ tǝ ājag nǝtǝ,” he tóg. “Ājag jóg!jóg ve ag hā mré tóg jykrén ja nǝgtǝ, Topē ti, Abraão hā mré. Hā kǝ tóg Abraão mǝ: “ā kósin ũ hā tigrǝn sóg vēnh kar to há nǝnh mǝ,” he ja nǝgtǝ, Topē ti,” he tóg, Pedro ti. ²⁶“Ājag hā mǝ tóg ā kósin jēnē, ti rǝn mǝn kǝ, Topē ti. Ājag hā mǝ tóg tó vén, ājag tǝ tǝ Israel nǝtǝn kǝ. Ājag hā mǝ tóg tó, ājag tǝ ājag jykre pāno tovānh jé. Ti tǝ ājag krǝn sór vē, ājag tǝ tovānh jé, ājag jykre pāno ěn ti,” he tóg, Pedro ti, ũ tǝ Topē jo ĩn krēm vēnh mǝn kǝ nǝtǝ ěn ag mǝ.

Pā'i ag tǝ Pedro mré João to jǝ

4 ¹Ag tǝ ver vēmén kǝ nǝtǝ ra Topē tǝ ki rǝr tǝ ag tóg tá junjun mǝ. Topē jo ĩn to capitāo vǝ ag mré tá jun mǝ gé, Saduceu ag ke gé, ũ tǝ: “ěg hǝn rǝnrǝr mǝn ke tǝ nǝ ha, ěg ter kar kǝ,” he mǝ ěn ag. ²Pedro ag to ag tóg jǝgǝ mǝ, ag tǝ: “Jesus vǝ rǝr mǝn,” hen kǝ. “Kǝ ěg tóg ti ri kén rǝr mǝn mǝ gé, ěg ter kǝ,” he ag tóg, Pedro ag. Hā kǝ pā'i ag tóg ag to jǝgǝ mǝ. ³Hā kǝ ag tóg Pedro ag sigség mǝ, vēse jafā kātá ag tóg ag vām mǝ, ag tǝ kātá nǝgnǝr pir han jé. Rāké ti nǝ ha, hā kǝ ag tóg: “ha ver kātá nǝgnǝr,” he mǝ.

⁴Hā ra ũ tǝ hēn ri ke ag tóg Pedro ag vī mē ja nǝgtǝ, kǝ ag tóg sir ti vī kri fig mǝ. Ũ tǝ 5 mil (ke) ag vē, Jesus ki ge kǝ nǝtǝ ag, ěg tǝ ũn tǝtá fag mré tó tǝ hā ra.

⁵Tǝ vaj kǝ pā'i ag tóg vēnh mǝn mǝ, kófa ag mré hā, Topē vī to professor ag mré hā. Jerusalém tá ag tóg vēnh mǝn mǝ. ⁶Topē tǝ ki rǝr tǝ to pā'i mág jyjy hā vǝ: Anás, he mǝ. Ag pā'i mág ũ jǝjin hā vǝ: Caifás, he mǝ. Pā'i mág kanhkā ũ jyjy hā vǝ: João, he mǝ, kǝ ũ jǝjin hā vǝ: Alexandre, he mǝ. Pā'i mág mré ke kar ag vǝ tá vēnh mǝn kǝ nǝtǝ. ⁷Vēnh kuju ki ag tóg Pedro ag vin mǝ, kǝ ag tóg: “ũ nǝ ājag mǝ vēnh jykre tag nǝm, ājag tǝ ũn grǝ ěn tǝ há! he jé?” he mǝ. “Ũ jykre tǝ ājag ti tǝ há! hé?” he ag tóg mǝ, Pedro ag mǝ.

⁸Kǝ vāhā Topē kuprǝg tóg Pedro krǝn mǝ. Kǝ tóg: “ha vé,” he mǝ. ⁹“Nén ũ há to ājag tóg ěg kugmǝg mǝ, ěg tǝ ũn grǝ tǝ há! he mǝ ěn to,” he tóg. “Kǝ ājag tóg vāhā ěg jykre jēmē sór mǝ ha,” he tóg. ¹⁰“Ājag mǝ sóg ěg jykre tónh mǝ, Israel kar tǝ ki kanhró nǝtǝ jé,” he tóg. “Jesus tigrǝn tóg há! hé, Nazaré tá ke ěn tigrǝn tóg tar jē nǝ, ājag tǝ ũ tǝ ka to ság mǝ ěn hā tigrǝn. Topē tóg ti rǝn mǝn ja nǝ, ũ tǝ cruz to ter mǝ ěn ti. Ēn vǝ ti tǝ há! hé, ũn grǝ ja ěn ti,” he tóg, Pedro ti. ¹¹“Jesus ěn hā to tag tóg rán kǝ nǝ, Topē vī tǝ rán kǝ nǝ ěn ki, ha mē: ājag tǝ pó tǝ ĩn han kǝ ājag tóg pó ũ fón, ti tǝ ājag mǝ kórég nǝn kǝ. Hā ra Topē tóg pó ěn hā tǝ ĩn nǝna han mǝ,” he ja tóg nǝ, Topē vī ki, Jesus to,” he tóg, Pedro ti.

12“Ũ pi(jé) ěg kren han ke mŭ! Topê tóg Jesus fêg inhhã, ti hã tỹ ěg kren han jé, ti hã tỹ ěprã ke ag krenkren han kãn jé, kanhkã krêm ke kar ěn ag. Ěg kren han ke mŭ ũ venh ke tũ ěg nĩ mỹr,” he tóg, Pedro ti, pã'i ag mỹ.

13Pã'i ag tỹ Pedro vĩ mē kỹ tóg ag mỹ e tĩ. “Ěg kamêg tũ ag tóg nĩgtĩ mỹr,” he ag tóg, Pedro to, João to ke gé. “Vênh rán sĩ ag nỹti vê mỹr, escola ki ge mág ja tũ ag nỹti vê,” he ag tóg. To jykrén kỹ ag tóg ag ki kanhró nỹti. “Jesus mré ke ag vê,” he ag tóg mŭ, Pedro ag to. Kỹ tóg ag mỹ e tĩ.

14Hã ra ũn grĩ ja tóg tá jê ag mré. Kỹ ag tỹ ne tỹ ag kato vĩnh ke tóg tũ tĩ sir. 15Kỹ ag tóg Pedro ag mỹ: “ha ver kãpa jêg,” he mŭ. Kỹ pã'i ěn ag tóg ver jagnê mré to jykrén mŭ. 16Kỹ ag tóg: “Ěg hỹn ag tỹ hê ri kenh mŭ ha?” he mŭ. “Jerusalém tá ke kar vỹ ag tỹ nén han mŭ ki kanhró kar nỹti. Kỹ ag jykre tóg vênh kar mỹ há nỹ. Kỹ ěg tỹ ag to: ag ón vê, hen kỹ tóg tỹ ũn nỹ sir,” he ag tóg jagnê mỹ. 17“Ag tỹ hã ra vênh kar mỹ Jesus tó kỹ tóg tỹ ũ nỹ gé,” he ag tóg. “Kỹ ěg tỹ ag mỹ: ha tó mãn tũg, henh ke vê,” he ag tóg. “Ājag tỹ ti tó mãn kỹ ěg tóg ājag vóg kónãn ke mŭ ha, he jé ěg tóg ke mŭ ag mỹ,” he ag tóg jagnê mỹ. 18Kỹ ag tóg Pedro ag jé prêr mãn mŭ. Kỹ ag tóg: “Ker ũ mỹ tó mãn hê!,” he mŭ. “Ker Jesus tỹ vĩ mãn hê!,” he ag tóg mŭ ag mỹ.

19Hã ra Pedro tóg João mré ag mỹ ke mŭ. “Topê tóg ěg mỹ: “ha vênh kar mỹ tó,” he ja nĩ. Ājag tóg hã ra: “ker tó hê!,” he mŭ. Ěg hỹn ũ tỹ hê vĩ han mŭ! Topê vĩ vó, ājag vĩ vó?” he tóg ag mỹ. “Ne nỹ hỹn Topê mỹ há nĩnh mŭ?” he tóg. “Ěg mỹ tó,” he tóg. 20“Ěg pi(jé) tó tũg mŭ! ěg tỹ nén vэг mŭ ti, Jesus tỹ ěg mỹ nén tó ja ěn ti,” he tóg ag mỹ, Pedro ti.

21Hã ra pã'i ag tóg: “ker tó hê!, ker tó hê!,” he mãn mŭ gé. Kỹ ag tóg ag kygvãg mŭ sir. Ājag tỹ ag vóg kónãn há ra ag tóg ag vóg kónãn tũ nĩ, vênh kar tỹ ag to há nỹtĩn kỹ, vênh kar tỹ Topê to: “há ti nĩ, ti hã ne tóg ũn grĩ ěn tỹ há! he mŭ!,” hen kỹ.

22Hã ra ũn grĩ ja ěn tóg tĩ nĩ sir. 40 anos kãfór han tóg, kỹ Topê tóg ti tỹ há! hé.

Jesus mré ke ag tỹ Topê mré vĩ

23Pedro ag tỹ kygvar kỹ mŭ kỹ ag tóg ājag mré ke ag to mŭ mŭ. Kỹ ag tóg pã'i tỹ ājag mỹ nén tó ěn kãmén mŭ, kófa ag tỹ: “ker Jesus tó hê!,” he mŭ ěn ti. 24Kỹ vênh kar ag tóg tag jêmê kỹ Topê mỹ vĩ há han mŭ, jagnê mré. Kỹ ag tóg: “ěg jóg mág!,” he mŭ. “Tỹ ã tóg vênh kar kri ke nĩ,” he ag tóg mŭ. “Kanhkã han ã mỹr, ga ti, goj ti ke gé, mĩ mŭ ag kar ke gé,” he ag tóg. 25“Ěg jógjóg tỹ Davi krĩn ja ã tóg nĩgtĩ, ã camarada ěn ti. Ā kuprĩg tỹ ã tóg ti krĩn ja nĩ. Kỹ tóg Jesus tó ja nĩgtĩ, kỹ tóg: “fóg kar ag ne tóg jũgũ mŭ, kanhgág ag ke gé,” he ja nĩ. “Inh kanhkã tỹ Israel ag ne tóg nén ũ tũ to jykrén!,” he ja tóg nĩ. 26“Nação kar ag pã'i ag vỹ vênh génh kỹ nỹti, ěg pã'i ag ke gé, Topê kato tégte jé, Topê tỹ ũn kuprêg mŭ ěn ag kato,” he ja tóg nĩgtĩ, Davi ti,” he ag tóg, Topê mỹ. 27“Hã ra tóg ki hã tó ja nĩ. Ěmã tag ki ag tóg vênh génh kỹ nỹti, ã kósin kato, ã tỹ ũn kuprêg mŭ ěn kato, ũn kuryj nĩ ěn kato, hã vỹ: Jesus, he mŭ,” he ag tóg. “Pã'i mág tỹ Herodes vỹ ti kato tē mŭ gé, pã'i tỹ

Pilatos ke gé, ag t̃y ũ to: Pôncio, he m̃u ên, fóg ag kar, Israel ag kar ke gé,” he ag tóg. “Tag ag kar ṽy vênh génh k̃y ñỹt̃i, ã kósin kato,” he ag tóg. ²⁸“Á t̃y nén to jykren m̃u han ag tóg m̃u sir, ã kato tegt̃e m̃u tag ag. Vās̃y ã tóg to: ge t̃i jé tóg ke m̃u, he ja ñgt̃i,” he ag tóg, Topê m̃y. ²⁹“Pã! ag t̃y êg m̃y nén tó mē ã tóg, ag t̃y êg m̃y: ker tó hê!, he m̃u tag ti. K̃y êg t̃y tar! hemñi, êg t̃y ag kamêg t̃u ñin jé, êg t̃y ã ṽi tó jé, êg t̃y t̃y ã camarada ñỹt̃in k̃y,” he ag tóg, Topê m̃y. ³⁰“K̃y êg mré milagre hyn han ñi gé. Ũn kagyga ag t̃y há! hemñi, êg t̃y nén han vánh han ñi, êg t̃y ã m̃y to vin k̃y, êg t̃y ã kósin t̃y Jesus jyjy tó k̃y, êg t̃y ũn kuryj ñi ên tó k̃y,” he ag tóg, Topê m̃y.

³¹Ag t̃y ti mré ṽi kar k̃y ga tóg jür̃un ke m̃u sir, ag t̃y tá ñỹt̃i hã ra. K̃y Topê kupr̃ig tóg ag kr̃in m̃u gé. K̃y ag tóg m̃umêg vánh k̃y Topê ṽi kãmén m̃u sir.

Jesus ki ge k̃y ñỹt̃i ag jykre pir

³²Ũ t̃y Jesus ki ge k̃y ñỹt̃i ag tóg jykre pir han k̃y ñỹt̃i. Ũ pi(jé) ã kuge to: “is̃u ṽe,” he t̃i! Ájag kuge kar to ag tóg: “êg t̃u ṽe,” he t̃i. ³³Jesus t̃y ũn vin m̃u ag tóg êg Senhor t̃y Jesus r̃ir mân tugtó m̃u, to tar p̃e ñỹt̃in k̃y. K̃y Topê tóg ag ki r̃ir há han m̃u gé sir. ³⁴Ag mré ke ũ pi(jé) jagãgtar ñỹt̃i! Ag kãm̃i ũ tóg êp̃y ñỹt̃i, kar ũ tóg in ñỹt̃i gé. Ájag t̃u ên funfón ag tóg m̃u, k̃y ag tóg ti kaja ma kãm̃u m̃u. ³⁵Jesus t̃y ũn vin m̃u ag m̃y ñim jé, jãnkamy ti. K̃y ũn jagãgtar ag tóg jãnkamy ên to ájag t̃y nén ve sór m̃u ên mân m̃u sir.

³⁶K̃y ũ tóg ñi gé, ti jiji hã ṽy: José, he m̃u. Jesus t̃y ũn vin m̃u ag tóg ti to: Barnabé, he t̃i, hã ṽy: vênh jyvên krê, he m̃u, hã ṽy: Barnabé, he m̃u. Levi kósin/kósin ũ ṽe. Goj ṽaso t̃y Chipre tá ke ṽe.

³⁷Ên hã ṽy êp̃y ñi, k̃y tóg ã jap̃y fón m̃u, k̃y tóg Jesus t̃y ũn vin m̃u ag m̃y ti kaja ma kãt̃i m̃u. K̃y ag tóg jagnê m̃y kãnhkrêg m̃u sir.

Ananias fag t̃y Topê m̃y ón

5 ¹K̃y ũ tóg ñi gé, ti jyjy hã ṽy: Ananias, he m̃u. Jávo ti pr̃u fi jiji hã ṽy: Safira, he m̃u. Ên ṽy tóg ã jap̃y fón m̃u gé. ²K̃y tóg ã pr̃u fi m̃y: “ti kaja vênh kãpón péju k̃y êg tóg ñim m̃u,” he m̃u. Ti vênh kãpón ũ t̃y tóg Jesus t̃y ũn vin m̃u ag m̃y ñim m̃u. “Êg jap̃y kaja kar hã ṽe,” he tóg m̃u ag m̃y, ón k̃y.

³K̃y Pedro tóg ti m̃y: “Satanás hã ne tóg ã kr̃in ja ñi!,” he m̃u. “Hã k̃y ã tóg Topê kupr̃ig m̃y ón. Hã k̃y ã tóg ti kaja vênh kãpón péju k̃y ñim ja ñi!,” he tóg. “Hã ra ã tóg ti t̃y ã kr̃in m̃u ra: “nejé,” he ja t̃u ñi, Satanás m̃y,” he tóg. ⁴“Á jap̃y ṽe (m̃ỹr), ha m̃e,” he tóg. “K̃y ti kaja ṽy tóg t̃y ã t̃u ñi gé sir,” he tóg. “K̃y ã t̃y ma kãt̃i t̃u ñi hã ra tóg t̃y nén ũ t̃u ñi ṽe,” he tóg. “Hã ra ã tóg ã ón ke to jykren ja ñgt̃i, ã t̃y ti kaja to ón jé,” he tóg. “Hã k̃y ã tóg êg m̃y ón, hã ra ã tóg Topê hã m̃y ón m̃u,” he tóg, Pedro ti.

⁵Ananias t̃y ti ṽi m̃e k̃y tóg kutê m̃u, ti ter ṽe sir. Ũ t̃y m̃eg m̃u ag kar m̃y tóg e t̃i, k̃y ag fe tóg jür̃un ke m̃u. ⁶K̃y kyr̃u ag tóg jëgjëg ñegnê k̃y ag tóg ti fi han m̃u. K̃y ag tóg ti va m̃u m̃u, k̃y ag tóg ti kénh m̃u sir.

⁷3 horas t̃ug k̃y ti pr̃u fi tóg m̃i kãt̃i m̃u gé. Hã ra fi tóg ã mén ter m̃e ja t̃u ñi ver. ⁸K̃y Pedro tóg fi m̃y: “ájag m̃y ti kaja tag to fón, ájag jap̃y ti?” he m̃u fi m̃y.

Kỹ fi tóg: “hỹ, ti kaja tag to ěg tóg fón,” he mũ, ón kỹ.

⁹Kỹ Pedro tóg fi mỹ: “ājag ne tóg jagně mré to jykrén ja nĩ gé!” he mũ. “Topě kuprĩg mỹ ājag ón mỹr. Ũ tỹ ã mén kénh mũ ag vỹ mĩ kāmũ jĕg. Ā va ag tóg mũnh mũ gé,” he tóg fi mỹ, Pedro ti.

¹⁰Kỹ fi tóg kutě kỹ hun ke mũ gé sir. Kyrũ ag tỹ junjun kỹ ag tóg fi ter vég mũ gé, kỹ ag tóg fi kénh mũ mũ gé, fi mén mré. ¹¹Kỹ Jesus ki ge kỹ nỹti kar ag fe tóg jürũn ke mũ, ũ tỹ mĕg mũ kar ag ke gé.

Hã kỹ Ananias fag tóg Topě mỹ ón tugrĩn kãgter mũ. Kỹ tóg vĕnh kar mỹ e tĩ sir.

Ag tỹ Jesus tỹ ũn vin mũ ag vóg kónãn

¹²Jesus tỹ ũn vin mũ ag tóg nĕn ve vãnĥ tỹ hĕn ri ke hyn han mũgtĩ, vĕnh kar mỹ. Jesus ki ge kỹ nỹti kar ag vỹ kurã kar ki vĕnh mãn tí, pã'i tỹ Salomão he mũ ěn sala tá, Topě jo ĩn krĕm. ¹³Jesus ki ge tũ ag tóg venh kãmũ tũ nĩgtĩ, ag tỹ ag kamĕg kỹ. Hã ra tóg vĕnh kar mỹ há tí sir, Jesus ki ge kỹ nỹti ag jykre ti. ¹⁴Kurã kar ki ũ tóg to jykrén ke mũ, Jesus ki rã jé, ũ tỹ hĕn ri ke ag, fag ke gé. Hã ki ag tóg e nỹti sir, Jesus ki ge mũ ěn ag.

¹⁵Kejĕn ag tóg ũn kagyga gé kãmũ mũ gé vãhã, ĕpryn kri, ĕmĩn kri. Tá ag tóg cama kri nỹti, nỹg jafãn ki. Kỹ ag tóg Pedro jãvãnĥ mũ. “Ti kãnhvég tỹ ĕg mĩ tĩg kỹ ũ tóg hĕn ri ke mũn tỹ há' hĕnh ke,” he ag tóg.

¹⁶Ũ tỹ hĕn ri ke ag tóg Jerusalém tá vĕnh mãn mũ, ĕmã kar tá kãmũ ěn ag. Ũn kagyga ag gé(g) ag tóg kãmũ mũ, ũn jagrĕ kórĕg ag ke gé. Kỹ ag tóg há' he kãn mũ sir.

¹⁷Kỹ Topě tũ ki rĩr tí to pã'i mág tóg jũ tãvĩ nĩ, ti mré ke kar ag ke gé, Saduceu he mũ ěn ag kar. ¹⁸Kỹ ag tóg Jesus tỹ ũn vin mũ ag sigsĕg mũ, vĕse ja mág tá.

¹⁹Hã ra kuty tá Topě tỹ jĕnĕ jafã tóg tĕre kỹ vĕse ja jãnkãn nugnón mũ, rugróm tóg mũ. Ag gé(g) tóg tí mũ, ag kygvãn kỹ, kỹ tóg ag mỹ: ²⁰“ha mũ jĕg, Topě jo ĩn ra, ājag tỹ vĕnh kar mỹ Topě vĩ tó jé, Topě tỹ ĕg rĩnrĩn mãn ke ěn ti,” he mũ, Topě tỹ jĕnĕ jafã ti, ag mỹ.

²¹Ag tỹ ti vĩ mĕ kỹ ag tóg kusã pĕ ki Topě jo ĩn ra mũ mũ, tá Topě vĩ tó jé. Hã ra Topě tũ ki rĩr tí to pã'i mág tóg ã mré ke ag jĕgnĕg mũ, ag tỹ kófa ag jé prĕr jé, vĕnh jyvĕn tí kar ěn ag, povo tỹ Israel to pã'i ag ke gé. Kỹ ag tóg vĕse ja ra ũ jĕgnĕg mũ, ag tỹ vĕsigse ag tatĩ kãmũ jé. ²²Polícia ag tỹ tá junjun mũ ra ag tóg vĕse ja kãtã tũgtũ nỹti. Kỹ ag tóg vỹnvỹn ke mũ. ²³Kỹ ag tóg: “vĕse ja tóg nĩfĕnh kỹ jĕ nĩ, nĩfĕnh jãfa tỹ,” he mũ. “Kỹ ũ tỹ ki rĩr mũ ag tóg tá nỹti gé, ti jãnkãn tá. ĕg tỹ nón mũ ra tóg kuprã jĕ nĩ,” he ag tóg mũ, pã'i ag mỹ.

²⁴Topě jo ĩn to capitão tỹ mĕ kỹ tóg ti mỹ e tí, Topě tũ ki rĩr tí to pã'i mág ag mỹ ke gé. Kỹ tóg ag krĩ tũ tí sir. ²⁵Kỹ ũ tóg tá jun kỹ: “Topě jo ĩn krĕm ag nỹti, ājag tỹ ũn sigsĕg mũ ag,” he mũ. “Tã ag tóg vĕnh kar mỹ Topě vĩ tó nỹti,” he tóg.

²⁶Kỹ capitão tóg polícia ag mré tí mũ, ag tatĩ kãmũ jé. Komĕr hã ag tóg vĩ mũ, ag mré. “ĕg vãsãnsãn kỹ ũ tỹ ag vĩ mĕg mũ ag tóg hĕn ri ke mũn ĕg pin ke mũ, pó tỹ,” he ag tóg, polícia ag.

²⁷Apóstolo ag t̄y ag mré junjun k̄y ag tóg pā'i ag jo ag vin mū. K̄y Topē tū ki r̄ir t̄i to pā'i mág tóg ag m̄y. ²⁸“Ājag m̄y ěg tóg: ker ěn jiji tó m̄an hē!, he ja n̄igt̄i!” he mū. “Ge ra ājag tóg Jerusalém tá ke kar ag m̄y tugtó ja n̄igt̄i, ěn v̄i ti,” he ag tóg, Jesus v̄i to. “Ājag h̄yn ti ter to ěg jagāgtar han sór mū,” he ag tóg, pā'i ag.

²⁹K̄y Jesus t̄y ūn vin mū ag kar tóg ag m̄y tag tó mū, ha mē. Pedro tóg ag m̄y tag tó mū, ha mē: “Topē t̄y ěg m̄y nén tó mū ěn han jé ěg tóg ke mū (m̄yr),” he tóg. “Ēprā ke ag t̄y ěg m̄y: “ke tūg n̄i,” he mū hā ra ěg tóg ti t̄y ěg m̄y nén tó mū ěn han mū,” he tóg. ³⁰“Ēg jóg'jóg ag v̄y Topē to há n̄y'tigt̄i. Ag t̄y ū to há n̄y'ti ěn v̄y Jesus ti r̄in m̄an ja n̄igt̄i, ājag t̄y ūn tén mū ěn ti, ka to ūn s̄ag mū ěn ti,” he tóg. ³¹“K̄y Topē tóg ti t̄y pā'i mág han mū, ti t̄y ěg kren han t̄i han k̄y, ti t̄y ti m̄y: “kun̄ig, inh pēgja tá n̄i,” hen k̄y. Jesus t̄y tóg ěg kar kr̄in sór mū, ěg povo t̄y Israel kar t̄y v̄enh jykre p̄ano tovānh jé, ti t̄y ag t̄y ā v̄i mranh t̄y v̄enh p̄ate fón jé,” he tóg. ³²“Nén kar ěn ve ja ěg tóg n̄igt̄i, hā k̄y ěg tóg ti v̄i tó mū sir. K̄y Topē kupr̄ig tóg ěg kanhr̄an mū gé. Topē v̄y ū t̄y ti v̄i han mū kar ag m̄y ā kupr̄ig j̄enēg mū,” he tóg, Pedro ti.

³³Pā'i ag t̄y ti v̄i mē k̄y ag fe tóg ḡym ke mū, k̄y ag tóg ag k̄agtén ke to jykr̄en mū, Jesus t̄y ūn vin mū ěn ag. ³⁴K̄y vāhā ū tóg j̄eg nē mū, Fariseu ū, ti jyjy hā v̄y: Gamaliel, he mū. Topē v̄i to professor ū vē, k̄y v̄enh kar m̄y tóg há n̄y, ti jykre ti. K̄y tóg: “ver ag kāpan n̄i,” he mū. ³⁵Ag mū kar tóg ag m̄y: “inh kanhkā!,” he mū. “To jykr̄en n̄i ver, ājag t̄y han tū jé,” he tóg. ³⁶“Pedro ag jo ke ū tóg j̄e ja n̄i gé, ti jiji hā v̄y: Teudas, he mū. Ti hā ne tóg vēs̄y t̄y pā'i mág han ja n̄i, k̄y ū t̄y 100 t̄y 4 ag v̄y ti nón mū ja n̄igt̄i sir. Ti tén ja ag tóg n̄i jāvo, pā'i ag, k̄y ū t̄y ti v̄i han mū ag tóg t̄am̄i mū ja n̄i, k̄y tóg tū! he mū,” he tóg. ³⁷“Kar k̄y ū v̄y j̄e ja n̄i gé, ti jyjy hā v̄y: Judas, he mū. Galiléia tá ke ěn vē. Ag t̄y v̄enh kar jyjji ránr̄an mū ra tóg tá j̄e ja n̄i, Judas ěn ti, k̄y ū t̄y h̄en ri ke ag tóg ti nón mū ja n̄igt̄i gé. Ēn tén ja ag tóg n̄i gé, pā'i ag, k̄y ū t̄y ti v̄i han mū ag tóg krig! ke ja n̄i, v̄enh pipin k̄y,” he tóg.

³⁸“Is̄y nén to jykr̄en hā vē, ha mē: Pedro ag tovānh n̄i ver,” he tóg. “Ag m̄y: ha mū j̄eg, hemn̄i ver,” he tóg. “Ag tū t̄y t̄y ěprā ke ag jykre n̄in k̄y tóg tū! henh ke mū (m̄yr), vēsóg ki, ha mē,” he tóg. ³⁹“Ti t̄y hā ra t̄y Topē jykre n̄in k̄y ājag tóg t̄y tū! henh ke tū n̄i,” he tóg. “Ājag t̄y ge ra ag to jū n̄y'tin k̄y ājag tóg vāhā Topē kato tē mū,” he tóg, Gamaliel ti.

⁴⁰K̄y ag tóg ti m̄y: “hej,” he mū. K̄y ag tóg Jesus t̄y ūn vin mū ag jé pr̄er m̄an mū. Ag mr̄anmr̄an ag tóg mū. K̄y ag tóg: “ker Jesus tó m̄an hē!,” he m̄an mū ag m̄y. K̄y ag tóg: “ha mū j̄eg ge,” he mū.

⁴¹K̄y ag tóg mū mū, Jesus t̄y ūn vin mū ag. Ag m̄y tóg sér t̄i, ha mē. Ag t̄y Jesus ri ke jagēgtar mū ra tóg ag m̄y sér t̄i, ag t̄y Jesus ri kén jagāgtar ke ki kr̄y k̄y.

⁴²Kurā kar ki ag tóg Topē jo in tá Jesus tó t̄i, ti to: “Topē v̄y ti j̄enē,” hen k̄y. V̄enh kar in tá ag tóg ti k̄amén mū gé, ū t̄y ag kógfyn k̄y. To ag tóg krónh ke tū n̄igt̄i sir.

Ag t̄y ū t̄y 7 (ke) ag vin

6 ¹K̄y ū t̄y h̄en ri ke ag tóg Jesus ki ge mū. Ū ag tóg Grego v̄i tó t̄i, Jesus mré mū ū ag. K̄y ū ag tóg Hebreu v̄i tó t̄i gé, ti mré mū ū ag. Ag e n̄y'tin k̄y ū t̄y Grego v̄i tó mū ag tóg kej̄en v̄i kónān mū, Hebreu v̄i tó t̄i ag

kato. “Ũ tỹ Hebreu vĩ tó mũ ag vỹ ěg ki króm tũ nỹtĩ (mỹr),” he ag tóg. “Ag kã ùn mén ter ja fag vỹ kurã kar ki vễjên há vэг tĩ, ag tỹ fag mỹ vin kỹ,” he ag tóg. “Hã ra ěg kã ùn mén ter ja ěn fag kã ag tóg jatun nỹtĩ, fag tỹ ag vĩ tó tũ nĩn kỹ. Hã kỹ fag tóg jagãgtar nỹtĩ, ěg mré ke fag,” he ag tóg.

²Kỹ ù tỹ 12 ag tóg mềg mũ, Jesus tỹ ùn vin mũ ag. Kỹ ag tóg Jesus mré mũ kar ag jé prêr mũ. Kỹ ag tóg: “Ěg tũ hã vễ, hã vỹ ěg tỹ tỹ Topê vĩ tó ti nỹ,” he mũ. “Ěg tỹ vễjên ki rĩr kỹ ěg tóg kutar nỹtĩ, kỹ ěg tóg ěg tỹ nén han ke ki rĩr há han ke tũ nĩ gé,” he ag tóg. ³“Kỹ ù tỹ 7 (ke) ag vin nĩ, ùn kãme kórég tũ ag, ùn jykre há ag, ù tỹ Topê kuprĩg tỹ jagrê nĩ ěn ag,” he ag tóg. “Ěn mỹ ěg tóg vễnh rãnhràj ěn nĩm mũ, ag tỹ vễjên ki rĩr jé,” he ag tóg. ⁴“Ěg hã tóg hã ra Topê mré vĩ kỹ nỹtĩ, ti vĩ tó kỹ nỹtĩ. Ěg tỹ nén han ken hã vễ,” he ag tóg, Pedro ag.

⁵Ag vĩ vỹ vễnh kar mỹ há nĩ ha, kỹ ag tóg Estêvão fềg mũ sir, ù tỹ Jesus ki rã kỹ jề ěn ti, kỹ Topê kuprĩg vỹ tỹ ti jagrê nĩ. Ti mré ag tóg Filipe fềg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag ti, fóg tỹ Israel jykre han mũ tag ti. ⁶Ěn ag vin ag tóg mũ, Jesus tỹ ùn vin mũ ag jo. Kỹ ag tóg ag to Topê mré vĩ mũ, ag nĩgê tỹ ag mề kỹ. Hã kỹ ag tóg ag mỹ vễnh rãnhràj ěn nĩm mũ, ag tỹ vễjên ki rĩr jé.

⁷Kỹ Topê vĩ tóg vễnh kar kri rùm ke mũ sir. Ũ tỹ Jesus mré mũ ag vỹ tóg hên ri ke nỹtĩ, Jerusalém tá. Kỹ Topê tũ ki rĩr tĩ ù ag tóg Jesus vĩ kri fi kỹ ti ki ge mũ gé sir.

Ag tỹ Estêvão se

⁸Estêvão vỹ hã ra krĩ há nĩ, Topê tỹ ti mỹ vễnh jykre nĩm kỹ. Kỹ tóg ěg tỹ nén han vãnh tỹ hên ri ke hyn han mũ, vễnh kar mỹ. ⁹Kỹ Israel ag vễnh kanhrãn jafã ù tá ag tóg ti vĩ kafãn mũ, ùn kygvãn kỹ nỹtĩ he mũ ěn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Ásia tá ke ag ke gé. Ěn ag kar vỹ ãjag tỹ Estêvão mré vĩn kỹ ti vĩ kafãn mũ. ¹⁰Hã ra ag tỹ ti vĩ kafãn ke tóg tũ tĩ, ti krĩ há nĩn kỹ, ti tỹ Topê kuprĩg tỹ jagrê nĩn kỹ. ¹¹Kỹ ag tóg ù ag krĩn mũ, ag tỹ ti kato vĩ jé, Estêvão kato. Kỹ ag tóg: “ti vĩ mề ěg (mỹr),” he mũ. “Moisés kato vĩ kónãn tóg (mỹr), Topê kato ke gé,” he ag tóg ón kỹ, Estêvão to. ¹²Hã kỹ vễnh kar tóg ti to jũgũ mũ, Estêvão to, kófa ag mré hã, Topê vĩ to professor ag mré hã. Kỹ ag tóg ti kãgmĩ kỹ ti ség mũ. Kỹ ag tóg pã'i ag jo ti pére kãmũ mũ. ¹³Ũ tỹ ón kỹ ti kato vĩnh ke mũ ag jé ag tóg prêr mũ gé, pã'i ag. Kỹ ag tóg ti kato: “Topê jo ĩn kato tóg vĩ kónãn tĩ, Topê tỹ ěg mỹ nén tó ja ti kato ke gé,” he mũ ón kỹ. “Hã ra tóg ã vĩ kónãn to krónh ke tũ nĩgtĩ,” he ag tóg ón kỹ, Estêvão to. ¹⁴“Ti vĩ mề ěg (mỹr),” he ag tóg. “Jesus kãmén tóg tũgtĩ, Nazaré tá ke ěn ti,” he ag tóg. “Topê jo ĩn kókén jé tóg ke mũ, Jesus ti,” he tóg nĩgtĩ, Estêvão ti, kỹ tóg Moisés tỹ ěg mỹ vễnh jykre nĩm mũ ěn tỹ tũ' he sór mũ gé, ěg mỹ vễnh jykre ù nĩm kỹ,” he ag tóg. Ag tỹ Estêvão to ón hã vễ.

¹⁵Kỹ pã'i kar ag tóg ti tugnỹm mũ, hã ra ti ve tóg sir Topê tỹ jềnê jafã ve ri ke nĩ, Estêvão ti.

Estêvão tỹ vènh kāmén

7 ¹Kỹ Topē tũ ki rĩr tĩ to pǎ'i mág tóg ti mỹ: “Ki hã ke mỹ?” he mũ. ²Kỹ Estêvão tóg ag mỹ: “ijóg!” he mũ. “Inh kanhkã!” he tóg. “Ēg jóg tỹ Topē vỹ tóg vènh kar kǎfór nĩ,” he tóg. “Ti hã ne ěg jóg!jóg tỹ Abraão mré vĩ ja nĩgtĩ, ti tỹ ver ga tỹ Mesopotâmia tá nĩ ki, ti tỹ ver ěmã tỹ Harã ra tĩ tũ ki.

³Kỹ tóg ti mỹ: “ã jamã tá kutē,” he ja nĩ. “Á kanhkã ag kar ré kỹ tĩg,” he ja tóg nĩ ti mỹ. “Ga ù ra tĩg, isỹ tá ã mỹ: tag kã nĩmnĩ, he jé,” he ja tóg nĩ ti mỹ, Topē ti.

⁴Hã kỹ tóg ga tỹ Caldéia tá kãkutē mũ, Hãra tá ěmãn jé, Abraão ti. Ti panh ter kar kỹ Topē tóg ti mỹ: “ga tag ra tĩg sir,” he mũ.

Ēg jamãn hã vè, Abraão jamã ja ti,” he tóg, Estêvão ti, pǎ'i ag mỹ.

⁵“Ge ra Topē tóg Abraão mỹ ga ěn nĩm ja tũ nĩ, ěpỹ pir mré tó kỹ. Ti mỹ tóg hã ra: “ã tũnh ke vè, kar kỹ, ã krē tũnh ke vè gé,” he ja nĩ, Topē ti. Hã ra tóg ver kósin ja tũ nĩ, Topē tỹ ti mỹ: “ã krē tũnh ke vè,” he mũ ra.

⁶Kỹ Topē tóg ti mỹ: “ã krē ag tỹ fóg ù ag mré mũnh ke vè, fóg ěn jamã tá,” he mũ. “Fóg ěn ag tỹ camarada han ke vè, ag vóg kónãn jé ag tóg ke mũ, prỹg tỹ 100 tỹ 4 ki,” he tóg, Abraão mỹ, Topē ti. ⁷“Hã ra ù tỹ ag vóg kónãn mũ ěn ag vóg kónãn jé sóg ke mũ gé, kar kỹ,” he tóg, Topē ti. “Isỹ ag vóg kónãn kar kỹ ã krē ag tóg tá kãpanh mũ. Kỹ ag tóg ga tag ki isũ ti han mũ,” he tóg, Topē ti. Ti tỹ Abraão mỹ ken hã vè,” he tóg, Estêvão ti.

⁸“Kỹ tóg ti mỹ vènh jykre nĩm mũ, ti tỹ ã krē ag gré junun fár kym jé. Kỹ ti sinal vè sir. Kar kỹ Abraão tóg Isaque han mũ. Ti tỹ kurã tỹ 8 han kỹ tóg ti mỹ kym mũ. Isaque tỹ Jacó han kỹ tóg ge han mũ gé, kỹ Jacó tóg ge han mũ gé, ti tỹ ã krē tỹ 12 ěn ag han kỹ, ěg tỹ ù to: ěg jóg!jóg kar, he mũ ěn ag,” he tóg. ⁹“Hã ra ěg jóg!jóg ěn ag tóg ăjag jăvy tỹ José to jũgũ nỹti, ăjag tỹ ti tũ to ěn kỹ. Hã kỹ ag tóg ti vène he mũ, José ti, ù tỹ ga tỹ Egito ra mũ mũ ag mỹ. Hã ra Topē tóg ti ki rĩr mũ. ¹⁰Kỹ tóg ti jy nĩgãn mũ, ti tỹ vènh jagtar vég mũ ra. Ti jykre há nĩn kỹ tóg Egito tá ke ag pǎ'i mág mỹ há tĩ, ag tỹ ù to: Faraó, he mũ ěn mỹ. Hã kỹ tóg ti tỹ pǎ'i mág han mũ, Faraó ti, José ti tỹ. Ti tỹ tóg pǎ'i mág han mũ, ti tỹ Egito tá ke kar ag ki rĩr jé, Faraó mré ke kar ag ki rĩr jé gé sir.

¹¹Kejën tóg prỹg han mũ, ga tỹ Egito mí hã, ga tỹ Canaã mí hã ke gé. Kỹ vènh kar tóg kókĩnkĩr mũ, prỹg kã. Kỹ ěg jóg!jóg ěn ag tóg kókĩnkĩr mũ gé. ¹²Kỹ ù tóg Jacó mỹ: “Egito tá ti vèjën nĩ inhã,” he mũ. Kỹ tóg ěg jóg!jóg ag jègnèg mũ, Jacó ti, ag tỹ Egito ra mũ vén jé. ¹³Ag tỹ ra mũ mǎn kỹ José tóg vǎhã ag mỹ: “inh hã vè,” he mũ, ã kãke ag mỹ. Hã kỹ Faraó tóg José kanhkã ki kanhró nĩ gé sir. ¹⁴Kỹ José tóg ã panh tỹ Jacó jé prër mũ, ti tỹ vènh kar tatĩn kătĩg jé. Û tỹ 70 kri 5 ag vè, ti kanhkã ag. ¹⁵Kỹ Jacó tóg Egito ra tĩ mũ. Tá tóg ter mũ kejën. Kar kỹ ěg jóg!jóg ag vỹ tá kăgter kãn mũ gé. ¹⁶Ěmã tỹ Siquém tá ag tóg kénh kỹ nỹti, Abraão vỹ tóg vènh kej ěn to jãnkamy nĩm ja nĩ, Emor krē ag mỹ, ěmã tỹ Siquém tá,” he tóg, Estêvão ti.

¹⁷“Vǎhã tóg kurã pétēm ke mũ sir, Topē tỹ Abraão mỹ: “ã krē mỹ sóg ga ěn nĩm mũ,” he mũ kurã ti. Kỹ ag tóg Egito tá vènh grun mũ.

¹⁸Kejēn ũ tá pā'i tóg tỹ pā'i jē, Egito tá. Hã ra tóg José mẽ ja tũ nĩ, pā'i tag ti. ¹⁹Ēn tóg ěg kanhkã ag kã'ug mũ, ag lograr ke tóg mũ, ěg jóg ag vóg kónãn tóg mũ gé. Kỹ tóg ag mỹ: “ãjag krē kāsir ag vãm ra, ag kãgter jé,” he mũ, pā'i ěn ti,” he tóg, Estêvão ti.

²⁰“Ti tỹ tag tó kar vãhã Moisés tóg mur mũ, kỹ tóg Topẽ mỹ há tĩ. Hã ra ti han mũ fag tóg kysã tãgtũ hã ki ti ki rĩr mũ. ²¹Kysã tãgtũ tũg kỹ fag tóg sir ti fón mũ. Hã ra Faraó ěn kósin fi tóg ti ve kỹ ti vãg mũ, ti jè'yñ jé. Kỹ tóg fi kósin ri ke nĩ, Moisés ti. ²²Kỹ tóg nén kar ki kanhrãn mũ, Egito tá vènh jykre kar ěn ki. Kỹ ti jykre vỹ vènh jykre tỹ hèn ri ke nĩ, kỹ ti vĩ vỹ vènh vĩ tỹ hèn ri ke nỹ gé, Moisés ti,” he tóg, Estêvão ti.

²³“Vãhã tóg prỹg tỹ 40 han mũ, Moisés ti. Kỹ tóg ã kanhkã pẽ ag to jykrén mũ, povo tỹ Israel to, ag tỹ nén han mũ venh tĩg jé. ²⁴Kỹ tóg ũ vég mũ. Egito tá ke ũ vég tóg mũ, Moisés ti. Ti tỹ Israel vóg kónãn vég tóg mũ, nén ũ tũ to. Kỹ tóg ti to jũ kỹ Israel ěn kajãm mũ, ti tén tóg mũ, Egito tá ke ěn ti. ²⁵“Inh kanhkã ag hỹn isỹ nén han mũ to jykrén mũ,” he tóg. “Hã kỹ ag tóg ki kanhró nỹtĩ, Topẽ tỹ inh tugrĩn ag kren han ke ti,” he tóg, Moisés ti. Hã ra ag tóg to jykrén tũ nỹtĩ, ti kanhkã ag,” he tóg, Estêvão ti.

²⁶“Tỹ vaj kỹ tóg ag to tĩg mãn mũ, ã kanhkã ag to. Kỹ ũn régre ag tóg jagnẽ to jũ nỹtĩ, Israel ag. Kỹ Moisés tóg ag tỹ jagnẽ to há han sór mũ. Hã jé tóg ag mỹ: “tỹ ãjag tóg jagnẽ kanhkã nỹtĩ vè,” he mũ. “Ãjag tỹ ne jé jagnẽ vóg kónãn sór nẽ?” he tóg.

²⁷Ũ tỹ ã régre vóg kónãn mũ ěn tóg ti vóg kỹ ti mỹ: “ã pi(jé) tỹ ěg pã'i nĩ,” he mũ. “Ã pi(jé) ěg jyvẽn mũ!” he tóg. ²⁸“Ã hỹn isén sór mũ, ã tỹ rãké tá Egito tá ke ěn tén ri ke han sór ã hỹn mũ,” he tóg ti mỹ,” he tóg, Estêvão ti.

²⁹“Kỹ Moisés tóg ã tỹ ti vĩ mẽ kỹ tóg vènh péju kỹ tĩ mũ. Kỹ tóg ga tỹ Midiã ra tĩ mũ. Povo ũ ag mĩ tóg tĩ mũ gé. Tá tóg prũg kỹ kósin régre han mũ. ³⁰Prỹg tỹ 40 tũg kỹ Topẽ tỹ jènẽ jafã vỹ ti mỹ vènh ven mũ, ti tỹ ěmã tũ ja mĩ tĩ mũ ra, krĩ tỹ Sinai tá. Vãnh grug ki tóg ti vég mũ, Moisés ti, Topẽ tỹ jènẽ jafã ěn ti. ³¹Ti tỹ ti ve kỹ tóg ti mỹ e tĩ. Kỹ tóg ra tĩ mũ, ti ve há han jé. Kỹ tóg vènh vĩ mæg mũ. Topẽ vĩ vè. ³²Kỹ tóg ti mỹ: “tỹ sóg ã jóg'jóg ag Topẽ nĩ,” he mũ, “Abraão Topẽ, Isaque Topẽ, Jacó Topẽ,” he tóg, vènh vĩ ti.

Hã ra Moisés tóg jürũn ke mũ, ti kamæg kỹ. Kỹ tóg tá ěvãnh jãvãnh nĩ.

³³Hã ra Topẽ tóg ti mỹ: “ã pẽn né kunũ ra, ã pẽn to ró ti,” he mũ. “Inh jo ã tóg jè nĩ (mỹr), hã ra sóg vènh kar kãfór nĩ. Hã kỹ kunũ,” he tóg, Topẽ ti. ³⁴“Egito tá ke ag tỹ isũ ag vóg kónãn vég isóg nĩ nĩ. Ag vèkrènrèr mæg sóg nĩ nĩ. Kỹ sóg tere, sỹ ag kygvãn jé. Hã kỹ sóg ã jènẽg mũ, ga tỹ Egito ra, ã tỹ ag kygvãn jé. Ha tĩg,” he tóg, Topẽ tỹ jènẽ jafã ti, Moisés mỹ,” he tóg, Estêvão ti.

³⁵“Moisés ěn hã jènẽ ja tóg nĩ, Topẽ ti, ti tỹ ã kanhkã ag kren han jé, ti tỹ tỹ pã'i nĩ jé. Hã to Topẽ tỹ jènẽ jafã tóg ti mỹ vènh ven, vãnh gru ki. Hã ra ti kanhkã ag tóg ti to é he ja nĩgtĩ, ti mỹ: “ã pi(jé) tỹ ěg pã'i nĩ,” hen kỹ, “ã pi(jé) ěg jyvẽn mũ!” hen kỹ. ³⁶Moisés tóg sir ěg tỹ nén han vãnh hyn han, ga tỹ Egito tá, goj kafã tũ tá ke gé, goj kusũg he mũ ěn tá ke gé. Kỹ ag tóg ěmã tũ mĩ mũ mũ,

pr̥yg t̃y 40 ki, ti kanhkā ag. K̃y Moisés ṽy ag jo t̃i m̃ū, ti t̃y ga t̃y Egito tá ag k̃āpan k̃y. Hā ra tóg ag m̃ūn ki ěg t̃y ñén han ṽanh hyn han m̃ū gé,” he tóg, Estêvão ti.

³⁷“Moisés tóg ā kanhkā ag m̃y, povo t̃y Israel ag m̃y tóg tag tó ja ñi: “Topē ṽy ājag m̃y ā ṽi tó t̃i ũ j̃ēnēnh m̃ū, ājag mré ke ũ, ti t̃y ājag m̃y Topē ṽi tó jé inh ri kén,” he ja tóg ñigt̃i, Moisés ti. ³⁸Moisés ěn hā ne tóg povo t̃y Israel ag mré ěmā t̃ū m̃i t̃i ja ñigt̃i. Ag t̃y kejēn p̃ānónh t̃y Sinai tá ñyt̃in k̃y tóg Topē t̃y j̃ēnē jafā mré ṽi m̃ū, Moisés ti. K̃y tóg ti m̃y ṽēnh ṽi ñim m̃ū, Topē ti, ěg t̃y ti ṽi ěn han k̃y ěg t̃y ěg r̃ir kr̃yg ja t̃ū ve jé. K̃y Moisés tóg ěg jóg'jóg ag m̃y ṽēnh ṽi ěn tugtó m̃ū. Hā ra tóg ěg m̃y tó m̃ū gé,” he tóg, Estêvão ti.

³⁹“Moisés ṽi han ṽanh ag ñyt̃i, ěg jóg'jóg ag. K̃y ag tóg ti toṽanh k̃y ga t̃y Egito ra m̃ū m̃ān sór m̃ū, kyrāgrā k̃y. ⁴⁰K̃y ag tóg Moisés jāvy t̃y Arão mré ṽi m̃ū. K̃y ag tóg ti m̃y: “ěg m̃y ṽēnh k̃āgrā t̃y topē han, retrato t̃y, ěg t̃y ṽēnh jo ag gé(g) m̃ū jé,” he ag tóg.

Hā ra Moisés ṽy ver p̃ānónh t̃y Sinai kri ñi ñi.

K̃y ag tóg Arão m̃y: “Moisés tóg ěg jo t̃ig ja ñi,” he m̃ū. “Ěg k̃āpan ja tóg ñi, ga t̃y Egito tá, hā ran hē ra vyr h̃yn?” he ag tóg ti m̃y. K̃y tóg ag m̃y: “hej,” he m̃ū. ⁴¹K̃y ag tóg monh s̃i k̃āggran m̃ū. K̃y ag tóg ti k̃āgrā ěn m̃y ag tóg ājag m̃ēg kugpr̃ūn m̃ū, retrato ěn m̃y. Ag t̃y han m̃ū tóg ag m̃y s̃inṽi t̃i. K̃y tóg ag m̃y s̃ér t̃i sir.

⁴²Hā ra Topē tóg ṽēnh kaja jé ag toṽanh m̃ū gé, hā k̃y ag tóg r̃a to jānjān m̃ū, kysā to (m̃yr), kr̃ig kar to (m̃yr). Hā k̃y Topē ṽi tó t̃i ũ tóg ag to r̃an m̃ū gé, k̃y tóg: “Israel,” he m̃ū. “Ājag t̃y ěmā t̃ū ja m̃i m̃ūn k̃y ājag tóg inh m̃y ñén ũ p̃ūn ja t̃ū ñigt̃i (m̃yr),” he tóg. “Pr̃yg t̃y 40 ki ājag tóg ěmā t̃ū ja m̃i m̃ū ja ñigt̃i,” he tóg, “hā ra ājag tóg topē ũ ag m̃y kugpr̃ūn ja ñigt̃i, inh m̃y p̃ūn t̃ū ñin k̃y,” he tóg, Topē ti, ā ṽi tó t̃i t̃y. ⁴³“Topē t̃y Moloque ěn s̃i va ājag tóg m̃ū ja ñigt̃i, kr̃ig k̃āgrā ke gé, hā ṽy: Renfā, he m̃ū, kr̃ig retrato ěn ti,” he tóg. “Ṽēnh k̃āgrā ěn to ājag tóg jānjān ja ñigt̃i,” he tóg. “Hā k̃y sóg ājag vóg kónān k̃y Babilônia tá ke ag j̃ēgnēnh m̃ū, ag t̃y ājag taṭ̃in m̃ū jé, cidade t̃y Babilônia mā ra,” he tóg, Topē ti, ā ṽi tó t̃i t̃y,” he tóg, Estêvão ti.

⁴⁴“Ěg jóg ag t̃y ěmā t̃ūg ja m̃i m̃ūn k̃y ag tóg kur t̃y Topē p̃ē jo ěn han ja ñi, ag t̃y tá Topē t̃ū han jé, ti ěn tá. Topē ṽy Moisés m̃y tó ja ñi, ti t̃y kur t̃y Topē jo ěn han jé, k̃y tóg ti t̃y ñén han ke ven ja ñi ti m̃y. ⁴⁵Ag kr̃ē tóg sir ag ri kén ěn t̃y kur ěn ma m̃ū ja ñigt̃i gé, ag t̃y Topē t̃y ājag m̃y ěmā tó m̃ū ěn ra m̃ūn k̃y. Moisés ter kar Josué tóg sir ag jo t̃i m̃ū, k̃y ag tóg ga ěn ra m̃ū m̃ū. Hā ra Topē tóg ga ěn tá ke ag k̃āpan m̃ū, ěg jóg'jóg ag jo.

Kejēn Davi tóg t̃y ag p̃āl̃i ñi sir, pr̃yg t̃y h̃en ri ke kar k̃y. Hā ra ěn t̃y kur ěn tóg ver j̃ē ñi. ⁴⁶Topē ṽy Davi to há ñi. K̃y Davi tóg ti m̃y: “s̃y ā m̃y ěn há han há tóg t̃i ṽē,” he m̃ū. “Ā hā ne tóg t̃y ějóg'jóg t̃y Jacó Topē ñi,” he tóg. “K̃y tóg ā t̃y ěn t̃y kur kr̃ēm ñin k̃y inh m̃y há t̃ū ñi,” he tóg ti m̃y, Davi ti.

⁴⁷Hā ra Davi tóg han t̃ū ñi ver. Ti kós̃in t̃y Salomão tóg ěn ěn han m̃ū,” he tóg, Estêvão ti.

⁴⁸K̃y tóg ag m̃y: “hā ra ṽēnh kar k̃āfór ěn tóg ěg t̃y ti jo ěn han m̃ū ěn kr̃ēm ñi t̃ū ñigt̃i (m̃yr),” he m̃ū. “Hā k̃y Topē ṽi tó t̃i ũ tóg ti to tag tó ja ñi, ha m̃ē.

⁴⁹“Kanhkā t̃ān ṽy t̃y inh ñi,” he tóg. “Ěnh ñig ja ri ken hā ṽē,” he tóg. “K̃y ga

vỹ tỹ isũ nĩ gé. Sỹ tá vẽnkhán sór nĩn kỹ sóg kenh ke mũ. Isũ kar vễ. Kỹ ãjag tỹ inh mỹ ãn han sór kỹ ãjag hỹn hễ ri kenh mũ?” he tóg. “Pétẽm ke tũ ãjag nĩnh mũ, ãjag tỹ inh mỹ vẽnkhán jafã han ken ki,” he tóg. ⁵⁰“Inh hã ne tóg nén kar hyn han ja nĩ inhhã,” he tóg, Topẽ ti, ã vĩ tó tĩ tỹ,” he tóg, Estêvão ti.

⁵¹Kỹ tóg ag mỹ: “krĩ tũ ãjag nỹtĩ (mỹr),” he mũ. “Ki kanhrãn jãvãnh ãjag tóg nỹtĩ (mỹr),” he tóg. “Kỹ ãjag nĩgrẽg tóg kutu nĩ gé (mỹr), Topẽ kuprĩg kato ãjag tóg vãsãnsãn nỹtĩ. ãjag jóg'jóg ag mrẽ ãjag tóg ti kato vãsãnsãn nỹtĩ,” he tóg.

⁵²“ãjag jóg'jóg ag ne tóg Topẽ vĩ tó tĩ ag kar vóg kónãn ja nĩgtĩ!, ag kãgtén ja ag tóg nĩgtĩ!. Hã ra ẽn ag tóg ù tỹ vẽnh jykre kuryj han mũ ẽn kãmén ja nĩgtĩ, hã vỹ: Jesus, he mũ. Ti kãtĩg ke jo ag tóg ti tó ja nĩgtĩ, Topẽ vĩ tó tĩ ag. Jãvo ãjag tóg ẽn kato vĩ ja nĩgtĩ, fóg mỹ. Kỹ ãjag tóg ti tén ja nĩgtĩ, Cristo ti,” he tóg, Estêvão ti.

⁵³“Topẽ hã ne ãjag mỹ ã vĩ nĩm ja nĩ!, ã tỹ jẽgnẽ jafã ag tỹ. Hã ra ãjag tóg ti vĩ mrynhmranh ja nĩgtĩ,” he tóg. Estêvão tỹ pã'i ag mỹ tón hã vễ.

Ag tỹ Estêvão tén

⁵⁴Û tỹ tá nỹtĩ ag tỹ ti vĩ mẽ kỹ ag fe tóg gỹm ke mũ. Kỹ ag tóg ãjag jã tỹ gyngyn he mũ, tỹ ag tóg gangan ke mũ. ⁵⁵Hã ra Topẽ kuprĩg tóg Estêvão krĩn mũ, kỹ Estêvão tóg kanhkã ki ẽvãnh mũ. Kỹ tóg Topẽ vэг mũ, ti kókov ti. Jesus vэг tóg mũ gé, Topẽ pẽgja tá tóg jẽ nĩ, Jesus ti.

⁵⁶Kỹ tóg: “ha vé,” he mũ. “Kanhkã tá sóg vэг mũ,” he tóg. “Kỹ ẽprã ke fi kósĩn tóg Topẽ pẽgja tá jẽ nĩ,” he tóg.

⁵⁷Kỹ ag tóg prẽnprẽr mũ sir, ãjag nĩgrẽg nĩgfénh kỹ. Ti to ag tóg vẽnh génh mũ sir, ag kar ti. ⁵⁸Kỹ ag tóg ti sэг mũ, cidade tỹ Jerusalém tá ag tóg ti kutẽm mũ gé. Kỹ ag tóg ti pin mũ, pó tỹ. ãjag kur vãvãm ag tóg mũ, kỹ kyrũ tóg ki rĩr mũ, ag kur ki. Kyrũ ẽn jiji hã vỹ: Saulo, he mũ.

⁵⁹Kỹ ag tóg Estêvão pin mũ sir, pó tỹ. Hã ra Estêvão tóg jamã hár(a): “!..inh Senhor!..!” he mũ. “!..Jesus!..!” he tóg. “!..inh kuprĩg jãvãnh ra..!” he tóg mũ.

⁶⁰Kỹ tóg ã jakrĩ tỹ jẽ kỹ prẽr mũ, jamã hár(a), kỹ tóg: “!..inh Senhor!..!” he mũ. “!..Ag tỹ inh pin tỹ vẽnh pãte fón ne..!” he tóg mũ. Kar kỹ tóg hun ke mũ sir.

Saulo tỹ ag vóg kónãn

8 ¹Jãvo Saulo ẽn mỹ tóg há tĩ, ag tỹ ti tén kỹ. Kurã ẽn kã ag tóg Jesus ki ge mũ kar vóg kónãn jagy han mũ, Jerusalém tá. Û tỹ vẽnh mãn tĩ ag vóg kónãn ag tóg mũ gé, ù tỹ Topẽ vĩ mẽ jẽ vẽnh mãn tĩ ag. Kỹ ag tóg jagãgtar tãvĩ nỹtĩ. Kỹ ag tóg vẽnh kãpugpóv kãn mũ sir. Ga tỹ Judéia kar mĩ ag tóg mũ mũ, ga tỹ Samaria mĩ ke gé. Hã ra Jesus tỹ ùn vĩn mũ ag hã tóg Jerusalém tá nỹtĩ nĩ.

²Û tỹ Topẽ to há tĩ ag tóg fe kaj nỹtĩ, Estêvão ter kỹ. Kỹ ag tóg kygfỹ mág kỹ ti kénh mũ.

³Hã ra Saulo tóg Jesus ki ge kỹ nỹtĩ kar ag vóg kónãn jagy han mũ, ù tỹ Topẽ vĩ mẽ jẽ vẽnh mãn tĩ ag. Ti tỹ ag tũg sór vễ, Saulo ti. Hã jẽ tóg ãn kar kãra rã tĩ. Ti tỹ Jesus ki rã kỹ jẽ ù ven kỹ tóg vесе jan kãtã ti fón ti, ùn gré ag, ùn tãtã fag ke gé.

Samaria tá Topê vī tó

4Ũ tỹ vĕnh kĀpugpóv mŭ ěn ag vỹ vĕnh kar mỹ vĕnh vĩ sér tugtó mŭgtĩ, Topê vī ti. 5Kỹ Filipe tóg tĩ mŭ gé. Ga tỹ Samaria ra tóg tĩ mŭ, kỹ tóg cidade ũ ki ra mŭ, Cristo kāmén jĕ. 6Kỹ vĕnh kar tóg ti vĩ mĕgmĕg mŭ. Jĕmĕ há han ag tóg mŭ, Filipe vī ti. Hā ra Filipe tóg ěg tỹ nĕn han vĕnh hyn han mŭ gé. Kỹ ag tóg vég mŭ. Hā kỹ ag tóg jĕmĕ há han mŭ. 7Vĕnh jagrĕ kórég tỹ hĕn ri ke pan tóg mŭ, Filipe ti. Ti tỹ ag pan kỹ ag tóg jamā hár(a) prĕr mŭ, kỹ ag tóg kĀpa mŭ. Ũ grĩ ag tỹ hál he tóg mŭ gé, ũn vagvá ag tỹ ke gé, ũn vygvá ag tỹ. 8Kỹ tóg vĕnh kar mỹ sér tĩ sir, cidade ěn tá.

9Kỹ Simão tóg nĩ nĩ, cidade ěn tá ke ũ. Kujá vĕ, Simão ěn ti. Kỹ tóg nĕn vĕnhmỹ hyn han tĩgtĩ. Kỹ tóg ga tỹ Samaria tá ke ag tỹ ti tỹ nĕn han ve kỹ tóg ag mỹ e tĩ. Vĕso tóg: “ag kĀfór inh nĩ,” he tĩ, ag tỹ ti kamĕg jĕ. 10Hā kỹ vĕnh kar tóg ti kamĕg mŭ sir, ũn sanh ag, gĩr ag ke gé. Ti to ag tóg: “Topê jykre han tóg tĩgtĩ, Topê jykre mág (pĕ) ěn,” he tĩ, Simão ěn to. 11Kysā tỹ hĕn ri ke ki tóg nĕn vĕnhmỹ hyn han ti, kỹ tóg vĕnh kar mỹ e tĩ, hā kỹ ag tóg ti kamĕg tĩ sir.

12Vāhā ag tóg Filipe vī kri fig mŭ, Samaria tá ke ag, ti tỹ Jesus Cristo tón kỹ. Topê tỹ tỹ ěg pālĩ nĩ kāmén tóg mŭ, Filipe ti. Ũ tỹ ā vĩ kri fig mŭ ag kygpég tóg mŭ, ũn gré ag, ũn tātá fag ke gé. 13Kỹ Simão ěn tóg ti vĩ kri fig mŭ gé, kujá ěn ti. Kỹ Filipe tóg ti kypég mŭ gé. Kỹ tóg Filipe mré nĩ nĩ. Kỹ tóg Filipe tỹ ěg tỹ nĕn han vĕnh hyn han mŭ vég mŭ, Topê jykre tỹ. Kỹ tóg ti mỹ e (pĕ) tāvĩ tĩ sir, Simão mỹ.

14Kỹ vāhā Jesus tỹ ũn vin mŭ ag tóg kejĕn mĕg mŭ, Samaria tá ke ag tỹ Topê vī kri fig mŭ ěn ti. Jerusalém tá ag tóg mĕg mŭ, kỹ ag tóg João mré Pedro jĕnĕg mŭ, ag tỹ ve jĕ. 15Pedro ag tỹ tá junjun kỹ ag tóg ag to Topê mré vĩ mŭ, Samaria tá ke ag to, Topê tỹ ā kuprĩg tỹ ag jagrĕn jĕ. 16Tá ke ũ tóg tỹ jagrĕ tũ ja nĩ ver. Kygpe kỹ ag nỹtĩ inhhā, Jesus jiji tó kỹ, ěg Senhor jyjy tó kỹ. 17Kỹ Pedro ag tóg ājag nĩgé tỹ ag mĕgmĕg mŭ, kỹ Topê kuprĩg tóg ag kĀra rā mŭ.

18Hā ra Simão tóg vég mŭ, Jesus tỹ ũn vin mŭ ag tỹ nĕn han mŭ ti. Ag tỹ ũ mĕ kỹ Topê kuprĩg tóg ag kĀra rā mŭ. ěn vég tóg mŭ, Simão ti. Kỹ tóg ag mỹ jĀnkamy ven mŭ, Pedro ag mỹ. 19Kỹ tóg ag mỹ: “inh mỹ vĕnh jykre tag nĩm nĩ, jĀnkamy tag to,” he mŭ. “Sỹ ũ mĕ kỹ Topê kuprĩg tóg ag kĀra rānh ke mŭ. Sỹ vĕnh jykre ěn ki kanhrān há tóg ti,” he tóg.

20Hā ra Pedro tóg ti mỹ: “ā jĀnkamy mré ā nŭgme ki kutĕnh mŭ,” he mŭ. “Topê tỹ nĩm ja vĕ (mỹr), hā ra ā tóg jĀnkamy ti mĀn sór mŭ, vĕnh jykre ti,” he tóg. 21“Ā pi(jé) Topê jykre tag ki kanhró nĩnh mŭ! kỹ Topê tóg ā mỹ nĩm ke tũ nĩ,” he tóg. “Ā jykre pijé kuryj nỹ! Topê mỹ,” he tóg. 22“Ā jykre pĀno tag tovānh ra,” he tóg. “Topê mré vĩ. Hĕn ri ke mŭn tóg ā mỹ vĕnh pĀte fón mŭ, ā tỹ vĕnh jykre pĀno to jykrén mŭ tag ti,” he tóg. Pedro ti.

23“Fe kórég tāvĩ ā nĩ (mỹr), kỹ ā jykre vỹ pĀno nỹ gé sir,” he tóg, Pedro ti.

24Kỹ Simão tóg ti mỹ: “iso Topê mré vĩ, inh jagtar jĕg tũ nĩ jé, ā tỹ inh mỹ tó mŭ tag ti,” he mŭ.

25Hã ra Pedro ag tóg mû mǎn gé, ag tỹ ãg Senhor tỹ Jesus vī tó kar kỹ. Ājag tỹ nén ve ja ên tó kǎn ag tóg, Jesus tỹ nén han ja ti. Kỹ ag tóg Jerusalém to vỹnvỹn ke mû sir. Ag mû kỹ ag tóg ga tỹ Samaria mĩ Topê vī há tugtó mû gé.

Filipe tỹ ùn kypég mû

26Hã ra Topê tỹ jēnē jafã tóg Filipe mỹ vī mû, kỹ tóg: “kanhkã tǎpér ra tĩg, ěpry jagma tĩg, ěmĩn jagma,” he mû. Jerusalém tán kǎtĩ, Gaza mĩ, hã ra tóg ěmã tũ fĩn kutē mû. ěpry ěn jagma tĩg, ěmĩn ěn jagma,” he tóg mû, Topê tỹ jēnē jafã ti.

Kỹ tóg tĩ mû sir, Filipe ti. 27Tá jun kỹ tóg ga tỹ Etiópia tá ke vég mû, pǎ'i fi rǎnhrǎj han tĩ ti, pǎ'i tỹ rainha fi tỹ nén ù kar vég tĩ ti, ùn kurĩ ěn ti. Pǎ'i fi jijin hã vỹ: Candace, he mû. Fi krēm pǎ'i ěn tóg Jerusalém ra tĩg ja nĩ, ùn kurĩ ěn ti. Tá tóg Topê kurã mág ve ja nĩ, festa mág ti, Jerusalém tá. 28Hã ra tóg ã jamã ra vỹn ke mû sir, carroça kǎmĩ. Tĩg kỹ tóg Topê vī to ke mû, Isafas tỹ rá ěn ti. Vǎsỹ Topê vī tó tĩ vē, hã vỹ: Isafas, he mû.

29Kỹ Topê kuprĩg tóg Filipe mỹ: “carroça kukám tĩg,” he mû. 30Kỹ Filipe tóg fũrũn tĩ mû, kỹ tóg ti tỹ vēnh rá to ke mēg mû, Isafas tỹ rá ěn to, vǎsỹ Topê vī tó tĩ tỹ rá ěn to. Kỹ tóg ti mỹ: “ã mỹ ã tỹ nén to ke mû tag ki kanhró nĩ?” he mû.

31Hã ra tóg: “vó,” he mû. “Ũ tóg inh mỹ kǎmén ja tũ nĩ ver,” he tóg. “Ā mỹ inh mỹ kǎmén ke tũ nĩ?” he tóg. “Tǎpry ra, inh mré nĩ jé,” he tóg. Kỹ tóg ke mû, Filipe ti.

32Ti tỹ ken hã vē, ha mē: “ovelha ri ke han tóg, ù ěn ti. Ovelha pére ěg mũgtĩ, ti tǎnh jé, hã ra tóg vī tũ nĩgtĩ (mỹr). Cordeiro ri ke han tóg mû gé. ěg tỹ ti kyki ronh mû ra tóg jatun mỹ jé nĩ gé (mỹr). 33Ũ ěn tỹ Topê vī mranh tũ hã ra ag tóg ti vóg kónǎn, ag tỹ ti jyvēn tũ ra. Ti mré ke ag jykre pǎno tó kǎn ke tũ ěg tóg nĩgtĩ (mỹr). Ti tén ja ag tóg (mỹr), kỹ tóg ter mû sir,” he tóg, vēnh rá ti.

34Kỹ ùn kurĩ ěn tóg Filipe mỹ: “ũ to ke nē hỹn'? Topê vī tó tĩ tỹ ne tó nē hỹn'?” he mû. “Inh mỹ tó,” he tóg. “Ti tỹ vēso ke mỹ', ù to ke mỹ vó?” he tóg.

35Kỹ Filipe tóg ti mỹ vēnh rá tag kǎmén mû sir. Jesus kǎmén tóg mû. Ti mỹ tóg vēnh vī há ěn tó mû, Jesus to.

36Ge ag tóg mû mû, ěpry jagma, ěmĩn jagma. Kỹ ag tóg goj tá junjun mû. Kỹ ùn kurĩ ěn tóg: “tag ki tóg goj nĩ,” he mû. “Ā tỹ ki inh kype jé tóg há nĩ, he tóg.

37Kỹ Filipe tóg ti mỹ: “ã tỹ ã fe tỹ ti ki rǎ kỹ nĩ nĩn kỹ tóg há nĩ,” he mû.

Kỹ tóg: “ti ki sóg rǎ kỹ nĩ,” he mû. “Jesus tóg tỹ Topê kósin nĩ (mỹr), Jesus Cristo ti,” he tóg, ùn kurĩ ti. 38Kỹ tóg carroça tĩn ti mỹ: “ver krỹg hé,” he mû. Kỹ tóg Filipe mré goj ra tére mû, kỹ tóg kǎra rǎ mû, ùn kurĩ ti. Kỹ Filipe tóg ti kypég mû sir.

39Ag tỹ goj kǎtá kǎjǎpry kỹ Filipe tóg tũ' he mû, Topê kuprĩg tỹ ti ma tĩg kỹ. Kỹ ùn kurĩ tóg ti ve mǎn tũ nĩ sir. Hã ra tóg tĩ mû, ã jamǎn ra. Ti mỹ tóg sér tĩ sir.

40Hã ra Filipe tóg cidade tỹ Azoto tá nĩ nĩ. Kỹ tóg tĩg kỹ Jesus vī tó tĩ mû, ěmã kar mĩ. Kỹ tóg kejēn cidade tỹ Cesaréia tá jun mû, Jesus kǎme sér tó jé.

Saulo tỹ Jesus ki rā
(Hk 22.6-16; 26.12-18)

9 ¹Hã ra Saulo tóg ver ù tỹ ěg Senhor tỹ Jesus mré mũ mũ ag vóg kónãn sór mũ. Ag to tóg krĩ rỹ nĩ ver. Ti tỹ ag kãgtén sór vë. Hã to tóg Topë tũ ki rĩr tĩ to pãli mág to tĩ mũ. ²Kỹ tóg ti mỹ permissão to vĩ mũ, ti tỹ cidade tỹ Damasco ra tĩg jé. Tá tóg permissão ěn tỹ pãli ag mỹ ven sór mũ, ag tỹ ti mỹ: “ha ag venh tí gé,” he jé. Ti tỹ Jesus mré tĩ mũ ù ve kỹ tóg ti se sór tĩ. Jerusalém ra tóg ag tať tĩg sór tĩ, ti tỹ ùn ség mũ ag, ùn gré ag, ùn tãtã fag ke gé. ³Hã jé tóg Damasco ra tĩ mũ. Ti tỹ kakó ke mỹr hã jęngrë tar tóg vęnh ven mũ, kanhkã tá. Rã kãfór tóg nĩ, hã ra tóg Saulo ki kómkóm ke mũ sir. ⁴Kỹ Saulo tóg kutë mũ, ga kri tóg tá' ke mũ. Kỹ tóg vęnh vĩ męg mũ. Kỹ tóg: “Saulo!, Saulo!” he mũ. “Á tỹ ne jé isũ ag vóg kónãn nę?” he tóg, vęnh vĩ ti.

⁵Kỹ Saulo tóg ěg Senhor mỹ: “ã tỹ ù nę?” he mũ.

Kỹ tóg ti mỹ: “tỹ sóg Jesus nĩ, ã tỹ ùn vóg kónãn sór tĩ ěn vỹ tỹ inh nĩ,” he mũ. ⁶“Jęg nę ra, cidade tag ki rã, tá ù tóg ã mỹ tónh mũ, ã tỹ nén han ke ti,” he tóg, vęnh vĩ ti.

⁷Ti mré mũ ag vỹ vęnh vĩ tag męg mũ gé, hã ra ag tóg nén ù vég tũ nĩ. Kỹ ag kãne tóg jĩrũn ke mũ. ⁸Kỹ Saulo tóg jęg nę mũ sir. Kỹ tóg tãmĩ ěvãnh sór mũ, hã ra tóg nén ù vég tũ nĩ. Kỹ ag tóg ti nĩgë kãgmĩ kỹ ti pére mũ mũ, cidade tỹ Damasco ra. ⁹Kurã tagtũ ki tóg ěvãnh tũ nĩ, kỹ tóg jęg tũ (pë) nĩ gé, kron tũ (pë) ti nĩ gé, Saulo ti.

¹⁰Damasco tá ke ù tóg nĩ nĩ, ti jyy hã vỹ: Ananias, he mũ. Jesus mré tĩ ù vë. Kỹ Jesus tóg ti mỹ vęnh ven mũ. Kỹ tóg: “Ananias!” he mũ.

Kỹ Ananias tóg ěg Senhor ti mỹ: “inh hã vë,” he mũ.

¹¹Kỹ Jesus tóg ti mỹ: “jęg nę ra,” he mũ. “Ěmĩn kuryj he mũ ěn ra tĩg. Judas he mũ ěn ĩn kãra rã. Tá ù tóg nĩ nĩ, ti jiji hã vỹ: Saulo, he mũ. Cidade tỹ Tarso tá ke vë. Ěn mré vĩmĩn,” he tóg. “Ha vé, inh mré tóg vĩ nĩ,” he tóg. ¹²“Kỹ tóg ù vég nĩ nĩ, ti jyy hã vỹ: Ananias, he mũ. Ā hã vë. Ā tỹ ti ĩn kãra rãnh ke vë. Ā tỹ ã nĩgë tỹ ti męnh ke vë. Kỹ tóg ve mãn ke mũ, ã tỹ ti męn tỹ. Tag vég tóg nĩ nĩ, Saulo ti,” he tóg, Jesus ti, Ananias mỹ.

¹³Kỹ Ananias tóg ěg Senhor ti mỹ: “vęnh kar tóg ti kãmén tĩ hã ra, ã tỹ inh mỹ tó mũ tag ti,” he mũ. “Jerusalém tá tóg ã tũ ag vóg kónãn,” he tóg. ¹⁴“Kỹ tóg permissão ma kãtĩ mũ, Topë tũ ki rĩr tĩ to pãli mág tỹ ti mỹ han kỹ. Kỹ tóg ù tỹ ã mré vĩ mũ kar sigse sór mũ, cidade tag ki,” he tóg, Ananias ti, Jesus mỹ.

¹⁵Kỹ ěg Senhor tỹ Jesus tóg ti mỹ: “ti venh tĩg,” he mũ. “Ti kupręg isóg (mỹr), ti tỹ ĩjji tó jé, fóg ag kar mỹ, kanhgág ag kar mỹ ke gé, povo tỹ Israel ag mỹ ke gé,” he tóg. ¹⁶“Ti mỹ sóg ven mũ, ti tỹ isugrĩn jagtar ke ti,” he tóg, Jesus ti.

¹⁷Kỹ Ananias tóg tĩ mũ. Ti tỹ ĩn ěn tá jun kỹ tóg ã nĩgë tỹ ti męg mũ, kỹ tóg ti mỹ: “Saulo!” he mũ. “Régre!” he tóg mũ. “Ěg Senhor vỹ inh jęnë, Jesus mỹr, sỹ ã ve jé,” he tóg. “Ti ve ã (mỹr), ěpřy kri, ã tỹ tag ki jun mũn kã,” he tóg. “Hã kỹ sóg kãtĩ mũ, ã tỹ ve mãn jé, Topë kuprĩg tỹ tỹ ã jagrë nĩ jé,” he tóg, Ananias ti.

18Kỹ tóg vāhā ti kanē tá pa mū, pirā fār ri ke. KỸ tóg ve há! he mǎn mū sir. KỸ tóg jĕg nē mū sir. KỸ tóg ti kypég mū sir, Ananias ti. 19KỸ tóg jĕg mū gé sir, hā kỸ tóg tar! he mū sir. Damasco tá tóg nĩ nĩ ver, Jesus mrē mū tĩ ag mrē. 20KỸ tóg vēšymér Jesus kāmén mū, Israel ag vēnh kanhrān jafā krēm. “Tỹ tóg Topē kósín nĩ,” he tóg mū, Jesus to. 21Ū tỹ ti vĩ mĕg mū kar ag mỹ tóg e tĩ. “Jerusalém tá tóg ag vóg kónān, ũ tỹ Jesus tó mū ag,” he ag tóg. “KỸ tóg tag ki jun mū gé, ag sigse jé, Topē tũ ki rĩr tĩ tỹ pā!i mág ag mỹ ag ta!i tĩg jé,” he ag tóg, Saulo to. KỸ tóg ag mỹ e tĩ, ti tỹ Jesus to: Topē kósín vē,” hen kỸ.

22Hā ra Saulo tóg fe tar nĩ. KỸ tóg Israel ag kanhrān mū, cidade tỹ Damasco tá. Ag mỹ tóg Jesus kāmén mū. “Tỹ tóg Cristo nĩ, Jesus ti,” he tóg, ag mỹ Topē vĩ kāmén kỸ. KỸ tóg ag tỹ ti vĩ kafān sór mū hā ra ag mỹ vēnhmỹ tĩ sir.

Saulo tỹ cidade tỹ Jerusalém ra tĩg

23Kurā tỹ hēn ri ke tũg kỸ Israel ag tóg kejĕn jagnē mrē jykrén mū, Saulo tén ke to. 24Hā ra Saulo tóg mĕg mū, ag tỹ ti to jykrén ĕn to. Cidade ĕn to ró jānkā tá ag tóg vājig nỹtĩ, ti jo, kurā kar ki, kuty tá ke gé, ag tỹ hēn ri ke mūn tá ti tén jé. KỸ tóg mĕg mū sir, Saulo ti. 25KỸ ti mré ke ag vỹ kuty tá kejĕ kākā ti nĩm kỸ ti térem mū, cidade ĕn to ró to. KỸ tóg Jerusalém ra tĩ mū.

26Ti tỹ Jerusalém tá jun kỸ tóg Jesus mré mū ag mré nĩ sór mū, Jesus mré mū tĩ ag mré. Hā ra ag tóg ti kamĕg mū. “Ti ón hỹn,” he ag tóg ti to, ti tỹ ag vóg kónān jan kỸ. 27KỸ Barnabé tóg ti mré vĩ kỸ Jesus tỹ ũn vin mū ag to ti pére tĩ mū. KỸ tóg ag mỹ ti tỹ Jesus ve ja ĕn kāmén mū, ĕpny jagma. “KỸ Jesus tóg ti mré vĩ ja nĩ gé,” he tóg. “Kar tóg Damasco tá ke ag mỹ Jesus kāmén ja nĩ gé, ti tỹ mūmĕg tũ nĩn kỸ,” he tóg, Barnabé ti.

28KỸ Saulo tóg ag mré tĩ nĩ ver, Jerusalém tá. Tá tóg Jesus kāmén mū gé, ti tỹ mūmĕg tũ nĩn kỸ. 29KỸ tóg Israel ag mré vĩ mū gé, ũ tỹ Grego vĩ tó mū ag mré ke gé. Ag tỹ ti vĩ kafān kỸ tóg ag mré vĩ mū. Hā ra ag tóg ti tén ke to jykrén mū, Saulo tén ke to. 30KỸ Jesus mré ke ag tóg mĕg mū gé, ag tỹ Saulo tén ke to jykrén mū ĕn to. KỸ ag tóg cidade tỹ Cesaréia ra ti pére mū mū. Tá junjun kỸ ag tóg cidade tỹ Tarso ra ti jĕnĕg mū.

31Jesus ki ge kỸ nỹtĩ ag kar vỹ jatun mỹ nỹtĩ nĩ sir, ũ tỹ Topē vĩ mē jé vēnh mǎn tĩ ĕn ag. Jatun mỹ ag tóg nỹtĩ sir, ga tỹ Judéia tá, ga tỹ Galiléia tá ke gé, ga tỹ Samaria tá ke gé. KỸ ag tóg jatun mỹ vēnh kanhrān mū, Topē jykre tỹ. Topē vĩ ki ag tóg króm mū, Topē kamĕg kỸ. Topē kuprĩg vỹ ag krĩn mū. KỸ ag krĩ vỹ kǎnhvy! he mū. KỸ ag tóg e nỹtĩ gé sir.

Enéias

32Kejĕn Pedro tóg vēnh kar ag vegvenh tĩ mū. KỸ tóg cidade tỹ Lida ra tĩ mū gé, tá Topē tũ ag vegve jé. 33Tá ũ tóg nỹ nĩ, ti jĩjin hā vỹ: Enéias, he mū. Grĩn kỸ tóg nỹ nĩ, ã cama kri. 8 anos han tóg, grĩ nỹ ki.

34KỸ Pedro tóg ti mỹ: “Enéias!,” he mū. “Jesus Cristo vỹ ã han,” he tóg. “Jĕg nē ra, ã cama fi han ra,” he tóg.

³⁵Kỹ tóg vēsýmér jĕg nĕ mũ. Kỹ cidade tỹ Lida tá ke kar ag vỹ ti vég mũ, cidade tỹ Saroná tá ke kar ag ke gé. Kỹ ag tóg ti ve kỹ Jesus ki ge mũ gé sir.

Dorcás fi

³⁶Cidade tỹ Jope tá ũ fi tóg nĩ nĩ, Jesus mré tĩ mũ fi, fi jiji hã vỹ: Tabita, he mũ, hã vỹ: Dorcas, he mũ, fi jyjy ti, fóg tỹ Grego vĩn ki. Ēn fi hã vỹ nén kar há han mũ. Ūn jagāgtar fag mỹ fi tóg nén vin tĩ.

³⁷Kejĕn fi tóg kaga nỹ nĩ, kỹ fi tóg ter mũ sir. Kỹ fag tóg fi kupe kỹ ĩn to jāpry jafã tá fi fig mũ, kynh mỹ.

³⁸Jo Jope tóg Lida kakó kã nĩ, hã ra Pedro tóg Lida tá nĩ nĩ. Kỹ Jope tá ke ag tóg ti ki kanhró nỹtĩ, Pedron ki, Jesus mré mũ ag.

Kỹ ag tóg ũn régre ag jĕgnĕg mũ, ag tỹ ti mỹ: “kur kãtĭg mĕ han,” he jé. ³⁹Kỹ Pedro tóg vēsýmér tĩ mũ. Kỹ tóg tá jun mũ. Hã ra Dorcas fi tóg ĩn to jāpry jafã tá nỹ nĩ, ter kỹ. Pedro jun kỹ ag tóg ĩn to jāpry jafã to jāpry mũ, ti mré. Kỹ ũn mén ter ja ĕn fag kar vỹ ti to kãmũ mũ. Kygfỹ fag tóg mũ. Ti mỹ fag tóg kur venven mũ, fi tỹ fag mỹ kugrỹn ja ti, camisa, vestido ke gé, vĕnh kri fĕ ke gé. Dorcas fi tóg fag mỹ kugrỹn mĕ han ja nĭgtĩ.

⁴⁰Kỹ Pedro tóg vĕnh kar mỹ: “ha pa jĕg,” he mũ. Kỹ tóg ã jakrĩ tỹ jĕg kỹ Topĕ mré vĩ mũ. Kỹ tóg vĕser fi mỹ: “Tabita!, nĩ ra,” he mũ. Kỹ fi tóg mrin ke mũ. Kỹ fi tóg nĩ mũ, fi tỹ Pedro ven kỹ. ⁴¹Kỹ tóg fi nĭgé kãgmĩ kỹ fi fĕg mũ. Kỹ tóg vĕnh kar jé prĕr mũ, Topĕ tũ kar, ũn mén ter ja ĕn fag mré hã. Kỹ tóg fag mỹ fi ven mũ.

⁴²Kỹ Jope tá ke kar ag vỹ mĕg mũ sir, fi rĩr mãn ĕn ti. Kỹ ũ tỹ hĕn ri ke ag vỹ Jesus ki ge mũ sir.

⁴³Kỹ Pedro tóg cidade tỹ Jope tá nĩ nĩ ver, Simão he mũ ĕn mré, ũ tỹ nén fár tỹ tãnjã ke tĩ ĕn mré.

Capitão tỹ Cornélio

10 ¹Cidade tỹ Cesaréia tá ũ tóg nĩ nĩ, ti jiji hã vỹ: Cornélio, he mũ. Soldado tỹ 100 to pã'i vĕ, ag tỹ ũ to: ga tỹ Itália tá ke ag, he mũ ĕn to capitão vĕ. ²Ēn vỹ Topĕ to há nĩ, kỹ tóg Topĕ kamĕg tĩ. Ti mré ke kar vỹ ge nỹtĩ gé. Povo tỹ Israel ag kãmĩ ũn jagāgtar ag jagāgtãn tóg tĭgtĩ, ti tỹ tỹ Israel ag mré ke tũ hã ra. Topĕ mré tóg vĩ tĩ gé. ³Ēn tóg nén nĕ vég mũ, 3 horas ki, ã nũr tũ ra. Kỹ tóg Topĕ tỹ jĕnĕ jafã jun vég mũ. Kỹ tóg ti mỹ: “Cornélio!” he mũ, Topĕ tỹ jĕnĕ jafã ti.

⁴Ti tỹ ti ve kỹ ti fe tóg jũrũn ke mũ, kỹ tóg: “ne nĕ?” he mũ.

Hã ra tóg ti mỹ: “Topĕ vỹ ã vĩ mĕg mũ (mỹr),” he mũ. “Ā tỹ ũn jagāgtar ag mỹ nén nĩm tĩ vég tóg mũ gé,” he tóg. “Hã kỹ tóg ã to jykrĕn mũ,” he tóg. ⁵“Kỹ ũ jĕgnĕmnĩ, ag tỹ Jope ra mũ jé. Tá ũ tóg nĩ nĩ, ti jiji hã vỹ: Simão, he mũ, kỹ ti jyjy ũ hã vỹ: Pedro, he mũ. Ēn jé prĕrmnĩ,” he tóg. ⁶“Simão mré tóg nĩ nĩ, ũ tỹ nén fár tỹ tãnjã ke tĩ ĕn mré, kỹ ti ĩn vỹ goj kafã tũ fyr tá jĕ nĩ,” he tóg.

⁷Kỹ Topĕ tỹ jĕnĕ jafã tóg tĩ mũ, ti mỹ tó kar kỹ. Kỹ capitão ĕn tóg ã camarada régre ag jé prĕr mũ, soldado pir mré, ũ tỹ Topĕ kamĕg mũ ĕn ti.

Ū tỹ ã rãnrhãj han mũ ěn jé tóg prěr mũ. ⁸Kỹ tóg ag mỹ ã tỹ nén ve ja tó mũ, kỹ tóg cidade tỹ Jope ra ag jěgněg mũ.

⁹Tỹ vaj kỹ ag tóg cidade ěn to hã nỹtĩ, meio dia ki. Kỹ Pedro tóg ĩn kri kyjer ěn ra tãpry mũ, Topě mré vĩ jé. ¹⁰Kỹ tóg kókĩr mũ. Kỹ tóg fag mỹ vėjén to vĩ mũ. Fag tỹ ver ti mỹ han mũ ra tóg nén ně vég mũ, Pedro ti. ¹¹Kỹ tóg ag tỹ kanhkã nón mũ vég mũ. Tá nén ũ tóg kãtère mũ. Kỹ tóg tỹ kur mág ve nĩ. Ti péno kygje kỹ tóg ga kri kãtère mũ, kur ti. ¹²Hã ra bicho kar tóg kur ěn kãki nỹtĩ nĩ, fa tỹ 4 (ke) kar tóg nỹtĩ, ũ tóg ã nug kri mũgtĩ gé, sēsĩ kar ke gé, jēsĩ kar. ¹³Kỹ vėnh vĩ tóg mē há tĩ, kỹ tóg: “tág!” he mũ. “Tãnh kỹ kó, vỹ,” he tóg.

¹⁴Kỹ Pedro tóg ěg Senhor ti mỹ: “nejé,” he mũ. “Nén ũ jěggry ko ja tũ sóg nĩ (mỹr),” he tóg. “Ěg povo jykre tũ vė, ěg tỹ bicho ěn kon kỹ,” he tóg.

¹⁵Kỹ tóg ti mỹ vĩ mãn mũ sir jãvo, vėnh vĩ ti, kỹ tóg: “Topě tóg hã ra to: há ti nĩ, he mũ. Kỹ jěggryg tũg nĩ,” he tóg.

¹⁶Ge tãgtũ han tóg, kỹ nén ně ěn tóg vég tũ' he mũ sir, kanhkã tá.

¹⁷Hã ra tóg Pedro mỹ e tĩ. Ti tỹ to jykrén tũ tóg tĩ, ti tỹ vég mũ to. Ti tỹ ver to jykrén mũ ra ag tóg junjun mũ, Cornélio tỹ ũn jěgněg mũ ag. Ū tóg ag mỹ: “ĩn ěn vė,” he ja nĩ.

¹⁸Kỹ ag tóg tá junjun mũ. Ró to jěgjě kỹ ag tóg jamã hár(a) ke mũ, kỹ ag tóg: “Simão Pedro ag mỹ ki nỹtĩ?” he mũ.

¹⁹Hã ra Pedro tóg ver ã tỹ vég mũ ěn to jykrén nĩ nĩ. Kỹ Topě kuprĩg tóg ti mỹ ke mũ. “Ha vé, ũn régre ag vỹ ã jé prěr mũ,” he tóg. ²⁰“Jěg ně ra, kãtère ra, tĩg ra ag mré,” he tóg. “To jykrén tũg. Isỹ ag jěgně vė,” he tóg, Pedro mỹ, Topě kuprĩg ti.

²¹Kỹ Pedro tóg ag to kãtère mũ, kỹ tóg ag mỹ: “inh hã vė,” he mũ. “Inh jé prěr ja ãjag tóg nĩ,” he tóg. “Ājag tỹ ne to kãmũ ně?” he tóg ag mỹ.

²²Kỹ ag tóg ti mỹ: “Cornélio tỹ ěg jěgně vė,” he mũ. “Capitão vė, Cornélio ti. ũn jykre kuryj vė, kỹ tóg Topě kaměg tĩ,” he ag tóg. “Israel kar ag tóg ti to há nỹtĩ, ti to ag tóg vĩ há han tĩ. Topě tỹ jěně jafã vỹ ti mỹ ke ja nĩ, ti tỹ ã jé prěr jé, ã tỹ ti ĩn ra tĩg jé, ã tỹ ti mỹ Topě kãmén jé,” he ag tóg, Pedro mỹ.

²³Kỹ Pedro tóg ag mỹ: “kãge jěg ra,” he mũ. Kỹ ag tóg tá nũgnũr mũ. Tỹ vaj kỹ tóg ag mré tĩ mũ. Kỹ Jope tá ke ũ ag tóg ti mré mũ mũ gé, Jesus mré ke ũ ag. ²⁴Tỹ vaj kỹ ag tóg Cesaréia tá junjun mũ. Tá Cornélio tóg ag jãvãnh mũ. Hã kỹ tóg ã kanhkã ag kar kógfyn ja nĩ, ag mỹ vėnh vĩ jěně ja tóg nĩ, ã mré ke kar ag mỹ. Kỹ ag tóg kãmũ ja nĩ, kỹ ag tóg tá nỹtĩ sir.

²⁵Pedro tỹ tá jun kỹ Cornélio tóg ti kato tē mũ, kỹ tóg ti jo mũg ke mũ. “Ti hỹn tỹ Topě nĩ,” he tóg, hã kỹ tóg ti jo mũg ke mũ, Cornélio ti.

²⁶Hã ra Pedro tóg ti fěg mũ, kỹ tóg: “ke tũg ra,” he mũ. “Tỹ sóg ěprã ke nĩ gé,” he tóg ti mỹ. ²⁷Kỹ tóg ti mỹ vĩ há han mũ. Kỹ tóg kãra rã kỹ ũn e ag vég mũ, ũn vėnh mãn kỹ nỹtĩ ag, Pedro ti. ²⁸Kỹ tóg ag mỹ: “Israel ag vỹ fóg mré nĩ tũ nĩgtĩ (mỹr),” he mũ. “Ěg jykren hã vė,” he tóg. “Kỹ ěg tóg fóg ĩn kãra rã tũ nĩgtĩ gé (mỹr) sir. Tag ki kanhró ãjag tóg nỹtĩ,” he tóg. “Hã ra Topě tóg inh

kanhrān, ā jykre t̄y. K̄y sóg vēnh kar ñn kāra rānh m̄, jēggry t̄u ñn k̄y,” he tóg. ²⁹“Hā k̄y sóg jatun m̄y kātīg, vēs̄ymér, ājag t̄y inh jé prēr k̄y. K̄y s̄y ājag ki jēmēnh há tóg t̄i. Ājag t̄y hē ri ke jé inh jé prēr nē?” he tóg ag m̄y, Pedro ti.

³⁰K̄y Cornélio tóg ti m̄y: “4 dias vē ha ūri,” he m̄, “k̄y sóg Topē mré v̄inh ke ñn ñi, jēg t̄u ñn k̄y. 3 horas vē. Inh ñn krēm sóg Topē mré v̄inh ke ñn ñi, k̄y sóg ū vég ñn ñi. Ti kur tóg kókov ñi. ³¹K̄y tóg inh m̄y: “Cornélio!” he m̄. “Topē v̄y ā v̄i mēg m̄. Ā t̄y ūn jagēgtar m̄y nén vin ēn ve tóg. To tóg jykrén, Topē ti,” he tóg. ³²“K̄y Jope ra ū jēnē. Tá Simão jé prēr, ū t̄y Pedro he m̄ ēn ti. Nén fār t̄y t̄āñj ke t̄i ēn ñn krēm tóg ñn ñi, hā v̄y: Simão, he m̄. Ti ñn v̄y goj kafā t̄u fyr tá jē ñi,” he tóg inh m̄y, Topē t̄y jēnē jafā ti,” he tóg, capitão ti. ³³“K̄y sóg vēs̄ymér ā to ū ag jēgnē. K̄y ā tóg kātī m̄. K̄y tóg há t̄i, ā kātīg ti. Hā to ēg tóg vēnh m̄an, Topē jo. Topē t̄y ā m̄y nén tó ja kāmén ra ēg m̄y. Ēg t̄y mēnh há tóg t̄i vē,” he tóg, Cornélio ti, Pedro m̄y.

Pedro t̄y Cornélio m̄y Topē v̄i tó

³⁴K̄y Pedro tóg ag m̄y kāmén m̄, k̄y tóg: “vāhā tóg s̄y to jykrén m̄,” he m̄. “Topē m̄y nén ū t̄u vē, Israel he m̄ ēn ag, fóg he m̄ ēn ag ke gé, kanhgág ag ke gé, Israel jykre han t̄u kar ag,” he tóg. ³⁵“Ū t̄y ti kamēg m̄ v̄y ti m̄y há n̄t̄i, Topē m̄y, ū t̄y vēnh jykre kuryj han m̄ ag kar, povo kar kāmī,” he tóg. ³⁶“Povo t̄y Israel m̄y tóg ā v̄i ēn jēnē ja ñi, Topē ti. Ēg m̄y tóg tó, ēg t̄y jatu n̄t̄i jé, ti t̄y Jesus Cristo tugr̄in ēg to há ñn k̄y. Jesus ēn v̄y t̄y vēnh kar Senhor ñi,” he tóg.

³⁷“Vēnh v̄i ēn mē k̄an ājag tóg huri. Judéia kar m̄i tóg r̄um ke ja ñi. João tóg vēnh kar m̄y: “ājag jykre tovānh ra,” he ja ñigt̄i. K̄y tóg ag kygpe ja ñi. Kar k̄y Jesus tóg Galiléia m̄i t̄ig vén m̄, Nazaré tá ke ēn ti. ³⁸K̄y Topē tóg Jesus m̄y ā kupr̄ig jēnē ja ñi. K̄y tóg ti m̄y vēnh jykre ñim ja ñi. Ga kar m̄i tóg t̄ig ja ñigt̄i. Nén kar há han ja tóg ñigt̄i. Japo t̄y ūn vóg kónān m̄ ag t̄y há! he ja tóg ñi gé. Topē hā ne ti mré han ja ñigt̄i hā ra!,” he tóg.

³⁹“Nén kar ēn ve ja ēg tóg ñigt̄i, ti t̄y nén han m̄ kar, ga t̄y Judéia tá, Jerusalém tá ke gé. Ēn t̄y ag tóg cruz to ti sa ja ñigt̄i, ti tén ja ag tóg ñigt̄i. ⁴⁰Kurā tāgt̄u t̄ug k̄y Topē tóg ēn r̄in m̄an ja ñigt̄i, k̄y tóg vēnh ven ja ñigt̄i,” he tóg, Pedro ti.

⁴¹“Hā ra vēnh kar v̄y ti ve ja t̄u ñi. Ēg hā m̄y tóg vēnh ven ja ñi. Hā to Topē tóg ēg kupr̄eg ja ñigt̄i. Ti mré ēg tóg jēn ja ñigt̄i, kron ja ñigt̄i gé, ti t̄y ā ter kar r̄ir m̄an k̄y,” he tóg, Pedro ti. ⁴²“K̄y tóg ēg m̄y: “vēnh kar m̄y inh kāmén ñi,” he ja ñigt̄i. “Topē v̄y ti t̄y vēnh kar k̄afór han, hemn̄i,” he ja tóg ñi ēg m̄y. “K̄y tóg vēnh kar t̄y nén han m̄ venh ke m̄ sir. Ū t̄y ūri r̄inr̄ir m̄ ag kar t̄y nén hyn han m̄ ve jé tóg ke m̄, ūn ter m̄ ag kar t̄y nén hyn han m̄ kar ke gé, hemn̄i,” he ja tóg ñigt̄i ēg m̄y, Jesus ti,” he tóg, Pedro ti.

⁴³“Vās̄y Topē v̄i tó t̄i ag kar v̄y ti kāmén ja ñigt̄i, k̄y ag tóg: “Ū t̄y ti ki rā m̄ m̄y tóg vēnh p̄ate fón ke m̄, Topē ti, ti t̄y ti v̄i mranh m̄ ti,” he ja ñigt̄i. “Cristo tugr̄in tóg vēnh p̄ate fón ke m̄,” he ja ag tóg ñigt̄i, Topē v̄i tó t̄i ag,” he tóg, Pedro ti.

Topê kuprīg t̃y t̃y ag jagrē nī

44Pedro t̃y ver tag tó k̃y vāhā Topê kuprīg tóg ag ki rā mū, ũ t̃y ti vī mēg mū ag ki. 45K̃y Israel ag t̃y Jesus ki ge k̃y ñyīti ag m̃y tóg e t̃i, ũ t̃y Pedro mré kāmū ag m̃y. “Topê kuprīg tóg t̃y ag jagrē nī!” he ag tóg. “Ag t̃y t̃y fóg ñyīti ra tóg ag ki rā mū!” he ag tóg. 46“Vēnh vī ũ tugtó ag mū (m̃yṛ),” he ag tóg. “Vēnh vī ēn ki ag tóg Topê m̃y: há ā tóg nī, he mū,” he ag tóg.

47K̃y Pedro tóg: “ũ tóg ag to: ag kygpenh ke tū ēg nī, henh ke tū nī (m̃yṛ),” he mū. “Topê kuprīg t̃y ag jagrē ñyīti. Ēg ki rā ri ke han tóg ag ki, Topê kuprīg ti. K̃y ēg h̃yn ag kygpenh mū ha,” he tóg, Pedro ti. 48K̃y tóg ũ m̃y: “ag kygpe ra ge, Jesus Cristo jiji tó k̃y,” he mū sir.

Ājag kygpe kar k̃y ag tóg Pedro m̃y: “ver ēg mré nī,” he mū. K̃y tóg ag mré nī sī han kar k̃y tī mū sir.

Pedro t̃y Jerusalém tá ā t̃y nén han mū tó

11 1K̃y Jesus t̃y ũn vin mū kar ag ṽy jēmēg mū, fóg ag t̃y Topê vī kri fig mū ti. Judéia kar mī ag tóg jēmēg mū, Jesus mré ke kar ag. 2K̃y Pedro tóg Jerusalém ra tī mū. K̃y tá Jesus ki ge mū ag tóg ti mré vī mū. Ti mré vī mū ag tóg: “vēnh kar ṽy ājag gré junjun fār kym ke mū, ēg jykre han jé, ag t̃y Topê jykre han sór k̃y,” he ag tóg tī. Ēn ag ṽy Pedro m̃y vī mū, 3k̃y ag tóg: “ũn fār kym ja tū ag mré ā tóg jēg mū (m̃yṛ), ag ĩn ki,” he mū.

4K̃y Pedro tóg ag m̃y nén kar ēn kāmén mū, 5k̃y tóg: “cidade t̃y Jope tá sóg nī ja nī, k̃y sóg Topê mré vī nī ja ñgtī. Ti mré vī k̃y sóg nén nē vég mū,” he tóg. “Nén gé(g) t̃ig jafā vē, kur mág ri ke. Ti péno kygie tóg kanhkā tá kátère mū. K̃y tóg inh ki jun mū. 6K̃y sóg k̃āki ēvānh mū, k̃y sóg bicho kar vég mū, fa t̃y 4 ke ti ñyīti, nēn t̃ān ag mré hā, ag nug kri mū tī ag mré hā, sēsī kar mré hā, jēsī kar. 7K̃y sóg vēnh vī mēg mū, k̃y tóg: “tág! ṽy,” he mū. “Tānh k̃y kó,” he tóg. 8K̃y sóg ti m̃y: “nejé,” he mū. “Nén ũ jēggry ko ja tū sóg nī,” he sóg ti m̃y. “Ēg jykre tū vē, ēg t̃y bicho ēn kon k̃y,” he sóg ti m̃y. 9K̃y tóg inh m̃y tó m̃ān mū gé, kanhkā tá vēnh vī ti, k̃y tóg: “Topê tóg hā ra to: há tī nī, he mū. K̃y jēggry tūg nī,” he tóg, kanhkā tá. 10Ge tāgtū han tóg, k̃y nén nē ēn tóg vég tū! he mū sir, kanhkā tá. 11K̃y vēs̃ymér ũn tāgtū ag ṽy tá ñyīti, inh nī ēn rā. Cidade t̃y Cesaréia tá ag kāmū ja ñgtī, fóg t̃y iso ag jēgnēn k̃y. 12K̃y Topê kuprīg tóg inh m̃y: “ha jatun m̃y ag mré t̃ig,” he mū. K̃y tag ag tóg inh mré mū mū, ũ t̃y 6 (ke) tag ag, Jesus mré ke tag ag. K̃y ēg tóg ēn ĩn k̃āra ge mū sir.

13K̃y tóg ēg m̃y ā t̃y Topê t̃y jēnē jafā ve ja tó mū. Ti ĩn k̃ātá tóg nēji jē ja nī, Topê t̃y jēnē jafā ti. K̃y tóg nēji ti m̃y: “Jope ra ũ jēgnē,” he mū. “Tá Simão jé pr̃ēr, ũ t̃y Pedro he mū ēn,” he ja tóg nēji ti m̃y. 14“Ēn ṽy ā mré vīnh mū. Ti vī t̃y ā tóg kren ke mū, ā mré ke kar fag ke gé,” he ja tóg nēji nī ti m̃y, Topê t̃y jēnē jafā ti,” he tóg, Pedro ti.

15“K̃y sóg ag m̃y kāmén mū. Is̃y tó sī han mū ra Topê kuprīg tóg ag ki rā mū. Ti t̃y ēg ki rā ri ke han tóg mū, kurā ēn kā. 16K̃y sóg Jesus vī to jykren mū, ti t̃y ēg m̃y: João tóg goj t̃y ag kygpe ja ñgtī, hā ra Topê kuprīg tóg ag

kāra rānh mū, tỹ vēnh kype ri ke vē sir, he ěn to,” he tóg, Pedro ti. ¹⁷“Kỹ Topẽ vỹ ag jagrēn mū, ã kuprĩg tỹ, ti tỹ ěg jagrēn ri ke vē, ěg tỹ Jesus Cristo ki ge kỹ. Hã kỹ sóg Topẽ kato tẽ jāvānh ja nĩ,” he tóg, Pedro ti.

¹⁸Ag tỹ tag mẽ kỹ ag krĩ tóg kusa' he mū. Kỹ ag tóg: “Topẽ vỹ fóg ag krĩn mū gé, ag tỹ ãjag jykre tovānh jé, ag tỹ ěg rĩr krỹg ja tũ ve jé,” he ag tóg mū.

Antioquia tá ke ag tỹ Topẽ vĩ kri fi

¹⁹Ag tỹ Estêvão tén kar kỹ Jesus ki ge kỹ nỹtĩ ag tóg hēn ra mū mū, ag tỹ ag vóg kónān kỹ. Kỹ ag tóg ga tỹ Fenícia ra mū mū, goj vāso tỹ Chipre ra, cidade tỹ Antioquia ra ke gé. Ag mūn kỹ ag tóg Israel ag hã mỹ Topẽ vĩ tó mū.

²⁰Kejēn Chipre tá ke ù ag tóg cidade tỹ Antioquia ra mū mū, Cirene tá ke ag ke gé. ěn ag tóg fóg tỹ Grego vĩ tó mū ag mỹ Jesus Cristo kāmén mū, vēnh vĩ sér tag ti. ²¹Kỹ Topẽ tóg ag mré ag krĩn mū. Kỹ ù tỹ hēn ri ke ag tóg Jesus ki ge mū, Topẽ jykre han jé. ²²Kỹ Jerusalém tá ke ag tóg mẽg mū, fóg ag tỹ Jesus vĩ kri fig mū ti. Jerusalém tá Jesus ki ge kỹ nỹtĩ ag tóg mẽg mū gé, ù tỹ tá Topẽ vĩ mẽ jé vēnh mān tĩ ag. Kỹ ag tóg Barnabé jēnēg mū, ti tỹ Antioquia ra tĩg jé.

²³Tĩ tỹ tá jun kỹ ti fe tóg mrin ke mū, Topẽ tỹ ag jagāgtān kỹ. Kỹ tóg ag jyvēn mū, ag tỹ Jesus ki rā to krónh ke tũ nĩn jé, ag tỹ fe tar nỹtĩn jé.

²⁴Barnabé vỹ tỹ ùn vĩ há nĩ, Topẽ kuprĩg vỹ tỹ ti jagrē nĩ. Kỹ ti jykre kar tóg Jesus ki rā ja nĩ. Kỹ ù tỹ hēn ri ke ag vỹ Jesus ki ge mū gé sir, ti tỹ ag jyvēn kỹ.

²⁵Kỹ Barnabé tóg cidade tỹ Tarso ra tĩ mū, Saulo jāvānh jé, tá. ²⁶Tĩ tỹ ti ve kỹ tóg ti pére tĩ mū, Antioquia ra. Kỹ ag tóg prỹg pir han, Antioquia tá. Jesus ki ge kỹ nỹtĩ ag tỹ vēnh mān kỹ ag tóg ag kanhrān tĩ, Barnabé ti, Saulo ti ke gé. Kỹ ùn e vỹ Barnabé ag vĩ jēmēg tĩ. Kỹ ag tóg Antioquia tá ag tóg ù tỹ Jesus mré mū ag to: “Cristo mré ke ag,” he vén. Kỹ ag jiji vē sir, hã vỹ: Cristo mré ke ag, he mū.

²⁷Kejēn Jerusalém tá ke ù ag tóg Antioquia tá junjun mū, Topẽ vĩ tó tĩ ag. ²⁸Ag kã ù jijin hã vỹ: Ágabo, he mū. ěn vỹ kejēn Topẽ kuprĩg tỹ ti krĩn kỹ: “kejēn ěg tóg prỹg venh mū, kānhmar,” he mū, “ga kar mĩ hã,” he tóg. Kỹ tóg Cláudio tỹ pã'li tỹ imperador nĩn kỹ tóg ge nĩ. ²⁹Kỹ ag tóg prỹg nĩnh ken kỹ Jesus mré mū ag tóg Judéia tá ke ag to jykrén mū sir. Kỹ ag tóg: “ěg hỹn ag mỹ nén ù jēnēnh mū, ag tỹ kon jé,” he mū. Kỹ vēnh kar vỹ ag tũ kjuu vin han mū, ag tỹ Judéia tá Jesus mré ke ag mỹ jēnē jé. ³⁰Kỹ ag tóg Barnabé jēnēg mū, Saulo ke gé, ag tỹ gé(g) mū jé, kófa ag mỹ vin jé, ù tỹ Jesus ki ge kỹ nỹtĩ ag ki rĩr tĩ ag mỹ. Kỹ ag tóg ke mū sir.

Ag tỹ Pedro se

12 ¹Kejēn pã'li tỹ rei tỹ Herodes vỹ Jesus ki ge kỹ nỹtĩ ù ag sigség mū, ag vóg kónān jé. ²Kỹ tóg soldado jēnēg mū, ti tỹ Tiago tén jé, João kãke ěn. Kyfé téj tỹ tóg ti tén mū, rógro téj tỹ, soldado ti, Herodes tỹ ti jēnēn kỹ. ³Kỹ tóg Israel ag mỹ há tĩ, ti tỹ Tiago tén kỹ. Kỹ Herodes tóg Pedro kãgmĩg mū gé sir. Festa kãki tóg ti kãgmĩg mū. Festa ěn ki ag tóg pão jēgã tũ ko tĩ, Israel ag. Ag jykre vē.

⁴Soldado ag tỹ Pedro ve kỹ ag tóg vĕse ja kăki ti fón mũ. Soldado tỹ 16 ag vỹ ti ki rĩr mũ, ũ tỹ 4 tỹ ti ki rĩr nỹtĩn kỹ ũ tỹ 4 ũ ag nỹtĩg ja ki nỹtĩ ke tĩ, jagnĕ ri kĕn. “Festa tỹ Páscoa kar kỹ sóg ag mỹ ti ven mũ, ag tỹ ti vóg kónān jé,” he tóg, Herodes ti. ⁵Kỹ Pedro tóg se kỹ jĕ nĩ. Hă ra Jesus ki ge kỹ nỹtĩ ag tóg ti jo Topĕ mré vĩ kỹ nỹtĩ, ag tỹ to krónh ke tũ nĩn kỹ.

Pedro tỹ kavār nĩ

⁶Tỹ vaj kỹ Herodes vỹ ag mỹ ti ven sór mũ. Tỹ kuty ĕn kă Pedro tóg soldado régre ag kujū ki nũr mũ. Ferro régre tỹ tóg se kỹ nỹ ag mré. Soldado ũ ag tóg vĕse ja jănkă ki rĩr mũ.

⁷Kỹ vâhă Topĕ tỹ jĕnĕ jafă tóg ti mré jĕ nĩ, kỹ tóg ĩn ĕn krĕm jĕngrĕ nĩ, kuty hă ra. Ĕn tóg Pedro ki pérĕn ke mũ, ti kăvy ki. Ti rĩn tóg mũ, kỹ tóg ti mỹ: “kur nĩ,” he mũ. Kỹ ti nĩgĕ se ja tóg varan ke mũ, ferro ĕn ti. Kỹ tóg kavār kỹ nĩ nĩ, kyvar kỹ, Pedro ti. ⁸Kỹ Topĕ tỹ jĕnĕ jafă tóg ti mỹ: “vĕsóg fi ra,” he mũ. “Ā pĕn né tu ra gé, ā pĕn to ró ti,” he tóg. Kỹ tóg ke mũ sir. Kỹ tóg ti mỹ: “Ā kur rỹ tu kỹ inh nón kătĩg,” he mũ.

⁹Kỹ tóg kăkutĕ mũ. Ti nón tóg tĩ mũ, Pedro ti. Hă ra tóg ti mỹ tỹ nĕn ũ ve jĕ, ti tỹ vég mũ ti. Ti mỹ tóg tỹ ti vĕnhpĕti ve tĩ, Topĕ tỹ jĕnĕ jafă tỹ nĕn han mũ ti. ¹⁰Jănkă ki rĩr vĕn mũ ĕn pătĕn ag tóg mũ, jănkă ki rĩr mũ ũ ke gé. Kỹ ag tóg jănkă mág tá junjun mũ, ferro tỹ han kỹ jĕ ĕn, kyfé tỹ han kỹ jĕ ĕn, ũn tỹ cidade to nón mũ ĕn. Jănkă ĕn vỹ vĕsógki rām ke mũ ag jo. Kỹ ag tóg kăpa mũ sir. Ĕpřy jagma ag tóg mũ mũ, ĕmĩn jagma. Kỹ vâhă Topĕ tỹ jĕnĕ jafă tóg tĩ mũ sir. ¹¹Kỹ vâhă Pedro tóg mrin ke mũ, kỹ tóg: “vâhă sóg ki kanhró nĩ,” he mũ. “Topĕ vỹ ā tỹ jĕnĕ jafă jĕnĕ ja nĩ, kỹ tóg inh kren han mũ, păli tỹ Herodes jo. Israel kar ag tóg inh jagtar nĩnh ke jăvānh mũ, hă ra sóg venh ke tũ nĩ,” he tóg, Pedro ti.

¹²To jykrĕn kỹ tóg Maria fi ĩn ra tĩ mũ, João mỹnh ĕn fi, ag tỹ ũ to: Marcos, he mũ ĕn mỹnh fi. Fi ĩn krĕm ag tóg vĕnh măn kỹ nỹtĩ nĩ, Topĕ mré ag vĩ nỹtĩ nĩ, ũ tỹ hĕn ri ke ag. ¹³Kỹ tóg ĩn to ró jănkă tỹ tórón' tórón' ke mũ. Kỹ fi camarada fi tóg venh kătĩ mũ. Fi jyjy hă vỹ: Rode, he mũ. ¹⁴Kỹ fi tóg Pedro vĩ ki kanhró nĩ, hă ra fi tóg ti mỹ nón tũ nĩ, róm tũ fi nĩ, jănkă ti, fi fe tỹ mrin ke mũ ra. Fi tỹ ĩn kăra răn kỹ fi tóg vĕnh kar mỹ: “Pedro vỹ ró to jĕ,” he mũ.

¹⁵Kỹ ag tóg fi mỹ: “krĩ vĕnhmỹ ā nĩ,” he mũ. Hă ra fi tóg: “ti hă vĕ,” he mũ. Kỹ ag tóg fi mỹ: “ti ki rĩr tĩ ĕn vĕ hỹn,” he mũ.

¹⁶Kỹ Pedro tóg ver re tá jĕ nĩ, jănkă tỹ tórón' tórón' ke măn kỹ. Kỹ ag tóg ti mỹ róm mũ, jănkă ti. Ti vég ag tóg mũ sir, kỹ tóg ag mỹ e tĩ. ¹⁷Kỹ Pedro tóg ag mỹ ā nĩgĕ tỹ ge mũ, ag tỹ katy' he jĕ. Kỹ tóg ag mỹ Topĕ tỹ ti kavān tó mũ sir, Topĕ tỹ ti kyvān kỹ. Topĕ tỹ vĕse ja kătá ā kutĕm kāmĕn tóg mũ sir. Kỹ tóg ag mỹ: “Tiago mỹ kemnĩ, Jesus mré ke kar ag mỹ ke gé,” he mũ. Kỹ tóg Jerusalém tá kutĕ kỹ ĕmă ũ ra tĩ mũ sir.

¹⁸Tỹ vaj kỹ soldado ag fe tóg jũrũn ke mũ. “Pedro hỹn hĕ kătá vyr, ti hỹn ne kătá vyr?” he ag tóg mũ, ti jăvānh kỹ. ¹⁹Kỹ Herodes tóg ũ ag jĕgnĕg mũ gé, ti kăgmĩ jĕ. Hă ra ag tóg ti vég tũ nĩ gé. Kỹ Herodes tóg

Pedro ki rīr mū ag ki jēmēg mǎn mū. Kar kŷ tóg soldado ũ ag mŷ: “ag kǎgtén ra, ti ki rīr mū ag,” he mū. Kŷ ag tóg ag kǎgtén mū sir.

Kar kŷ Herodes tóg Judéia tá kutē kŷ cidade tŷ Cesaréia ra tí mū sir, tá nī jé.

Herodes ter

²⁰Herodes tóg cidade tŷ Tiro tá ke ag to jū mū, cidade tŷ Sidom tá ke ag to ke gé. Ēn ag tóg Herodes nĭgja tá junjun mū. Kŷ ag tóg pǎ'i sī mré vī mū, ti jiji hǎ vŷ: Blasto, he mū. Herodes vŷ ti tŷ pǎ'i han ja nī. Ēn mŷ ag tóg to vī mū, ti tŷ ag jagfy vī jé, pǎ'i tŷ Herodes mré, ti tŷ ti fe tŷ há' he jé. Herodes krēm ke ag tóg ag mŷ vējēn vēne he ja nĭgtī, Tiro tá ke ag mŷ, Sidom tá ke ag mŷ ke gé. Herodes tŷ ag to jū nĭn kŷ ag tóg tá vējēn ve mǎn tū nī sir. Hǎ kŷ ag tóg ti fe tŷ há' he sór mū, ti tŷ ag mŷ vēne he mǎn jé.

²¹Kŷ Herodes tóg ag mŷ kurā nĭm mū. Kŷ tóg ā kur sĭnvī ěn tu mū, pǎ'i kur ěn ti. Kŷ tóg ā nĭgja kri nī kŷ ag mŷ vī mág han mū. ²²Kŷ vēnh kar tóg ti to: “ěprā vēnh vī pijé,” he mū. “Tŷ tóg Topē vī mē tí, ti vī ti,” he ag tóg mū. ²³Kŷ vēsŷmér Topē tŷ jēnē jafā tóg ti vóg kónān mū sir, ti tŷ ag mŷ: “vó,” he tū nĭn kŷ. “Inh pi(jé) tŷ Topē nī,” he ja tū tóg nī, hǎ kŷ tóg ti vóg kónān mū sir. Kŷ ti nug ga vŷ ti kagrāg mū, hǎ kŷ tóg ter mū.

Barnabé tŷ Saulo mré Topē vī tónh tĭg

²⁴Jó ũ tŷ hēn ri ke ag vŷ Topē vī mēg mū, kŷ ag tóg Jesus ki ge mū.

²⁵Kŷ Barnabé vŷ Saulo mré ājag tŷ nén gé(g) kāmū mū ěn vin mū, Jerusalém tá ke ag mŷ. Prŷg nĭn kŷ Jesus ki ge kŷ nŷtī ag tóg Jerusalém tá ke ag mŷ vējēn jēgnē ja nĭgtī. Ag mŷ vējēn ěn vin kŷ ag tóg vŷnvŷn ke mū sir, Barnabé ti, Saulo ti ke gé. João pére ag tóg mū mū, Marcos he mū ěn ti.

13 ¹Antioquia tá ũ ag tóg nŷtī, Topē vī tó tí ũ ag, Jesus jykre tŷ vēnh kanhrān nŷtī ag ke gé. Jesus ki ge kŷ nŷtī ag mré ag tóg nŷtī, ũ tŷ vēnh mǎn tí ag mré, ag tŷ Topē vī mē jé. Kŷ ũ jijin hǎ vŷ: Barnabé, he mū, kar ũ jyjyn hǎ vŷ: Simão Negro, he mū. Ũ tóg tŷ Lúcio nī, Cirene tá ke tag ti. Kŷ ũ tóg tŷ Manaém nī, pǎ'i tŷ Herodes mré mog mū tag ti. Kŷ ũ tóg tŷ Saulo nī gé.

²Kejēn ag tóg jagnē mŷ Topē jykre tó mū, ag tŷ jēg tū nĭn kŷ. Kŷ Topē kuprĭg tóg ag mŷ: “Barnabé fēg ra, Saulo mré,” he mū, “ag tŷ inh rānhrāj han jé, isŷ nén to jykrén mū ěn ti, ag tŷ inh jykre tó jé, vēnh kar mŷ,” he tóg, Topē kuprĭg ti.

³Kŷ ag tóg jēg tū nĭn kŷ Topē mré vī mǎn mū. Ājag nĭgé tŷ ag tóg ag mēg mū, ag kymēn ag tóg mū, kŷ ag tóg: “ha mū jēg ge,” he mū. Hǎ kŷ Topē kuprĭg tóg ag jēgnēg mū sir.

Kujá tŷ Elimas

⁴Topē kuprĭg tŷ ag jēgnēn kŷ ag tóg cidade tŷ Selúcia ra mū mū. Tá junjun kŷ ag tóg goj vāso tŷ Chipre ra mū mū, canoa mág kāmī. ⁵Kŷ ag tóg cidade tŷ Salamina tá junjun mū. Tá ag tóg Topē vī kāmén mū, Israel ag tŷ vēnh kanhrān jafā kǎtá. João Marcos vŷ ag mré tí mū gé. Ag camarada vē, João Marcos ti.

⁶Goj vāso mī ag tóg pa mū. K̄y ag tóg cidade t̄y Pafos tá junjun mū, Topē vī kāmén k̄y. Tá ũ tóg nī nī, kujá ũ. Ōn k̄y tóg Topē vī tó sór mū. Israel ũ vē, ti jiji hā v̄y: Bar Jesus, he mū. ⁷Governador mré tóg nī nī. Governador jyjy hā v̄y: Sérgio Paulo, he mū. Krī há ti nī, Sérgio Paulo ti. K̄y tóg Barnabé jé prēr mū, Saulo jé ke gé, ti t̄y Topē vī jēmē sór k̄y.

⁸K̄y kujá ěn tóg ag vī kato tē mū, governador t̄y Topē vī kri fig tū nī jé. Kujá ěn jiji ũ hā v̄y: Elimas, he mū, hā v̄y: kujá, he mū, ti jyjy ti.

⁹K̄y vāhā Topē kuprīg tóg Saulo krīn mū. Saulo jiji ũ hā v̄y: Paulo, he mū.

K̄y Topē kuprīg t̄y ti krīn k̄y Paulo tóg kujá ěn ki kanē jū han k̄y ti ki ěvānh mū, ¹⁰k̄y tóg: “t̄y ā tóg ũn ón mé nī,” he mū. “Jykre pāno ā nī (m̄yr),” he tóg. “Japo kósín v̄y t̄y ā nī (m̄yr), vēnh jykre kuryj kato tē ā nī (m̄yr),” he tóg. “Topē japry v̄y kugryj n̄ytī, ti jamīn ti, hā ra ā tóg t̄y pāno ke sór tī (m̄yr), k̄y ā tóg vēnh jykre pāno to krónh ke tū nīgī (m̄yr),” he tóg. ¹¹“Ha vé, Topē v̄y ā vóg mū, k̄y ā tóg kyvān ha,” he tóg. “Rā venh ke tū ā nīnh mū, kurā t̄y hēn ri ke ki,” he tóg, Paulo ti.

K̄y tóg vēs̄ymér ti m̄y kuty' he mū. Kyvó tóg nī sir. K̄y tóg jēmīg mū. Ū jé tóg prēr mū, ti t̄y ti pére tīg jé.

¹²Governador t̄y tag ve k̄y tóg ti m̄y e tī. K̄y tóg Jesus ki rā mū. Topē jykre tóg ti m̄y tar ja nī.

Paulo t̄y cidade t̄y Antioquia tá Topē vī tó

¹³K̄y vāhā Paulo ag tóg Pafos tá pa mū. Canoa mág kāmī ag mū mū. K̄y ag tóg ga t̄y Panfília tá junjun mū, cidade t̄y Perge tá. Hā ra João Marcos tóg kyrā mū. Ag ré k̄y tóg Jerusalém ra v̄yn ke mū, João Marcos ti. ¹⁴Jó ag tóg Perge tá pa mū, ga t̄y Pisídia ra mū jé, cidade t̄y Antioquia ra. Tá junjun k̄y ag tóg vēnhkán ke kurā ki ag tóg Israel t̄y vēnh kanhrān jafā kára ge mū, tá ag nīgnī mū gé.

¹⁵Ū tóg tá Topē t̄y ěg m̄y vēnh jykre nīm ja ěn to ke mū, rán k̄y nī ěn to. Ti t̄y ěg jyvēn tó tóg mū gé, vās̄y Topē vī tó tī ag t̄y rán ja ěn ti. Kar k̄y pā'i ag tóg Paulo ag jé prēr mū. K̄y ag tóg: “kanhkā',” he mū. “Ājag t̄y ěg jyvēn sór n̄ytīn k̄y tóg há tī,” he ag tóg.

¹⁶K̄y Paulo tóg jēg nē mū. Ā nīgē t̄y tóg ag m̄y ge mū, ag t̄y katy' he jé. K̄y tóg ag m̄y: “ha mē, Israel kar',” he mū. “Jēmē ra ha, ũ t̄y Topē kamēg mū kar, ājag t̄y t̄y fóg n̄ytī ra,” he tóg. ¹⁷“Israel ag v̄y Topē kamēg tī. Topē tag tóg ěg jóg'jóg ag kuprēg ja nī. Ag t̄y tóg povo mág han, ag t̄y ver Egito tá ke ag mré n̄ytīn k̄y. Tá tóg ag kāpan mū, ā jykre tar ěn t̄y, Topē ti,” he tóg. ¹⁸“Ag to tóg fen mág mū, Topē tag ti, ag t̄y ěmā tūg ja mī mūn k̄y, pr̄yg t̄y 40 ěn ki. ¹⁹Povo t̄y 7 t̄y tóg tū' he mū, ga t̄y Canaā tá. K̄y tóg ěg jóg'jóg ag m̄y ag ga fig mū, t̄y ag tū nī jé. ²⁰K̄y tóg ag m̄y pā'i ag vin mū gé, ag jyvēn jafā ag, 100 t̄y 4 kri 50 anos ki. Kar k̄y Samuel v̄y t̄y Topē vī tó tī nī gé. ²¹K̄y ag tóg pā'i mág t̄y rei ve sór mū. K̄y ag tóg Topē m̄y to vī mū. Hā k̄y Topē tóg Saulo fēg mū, Quis kósín ěn. Benjamim krē'krē ũ vē, Saulo ti. 40 anos ki tóg t̄y pā'i mág t̄y rei nī. ²²Ti t̄y ěn kutēm kar tóg Davi fēg mū, Topē ti. Davi to tóg vī há han mū, Topē ti, k̄y

tóg: “Davi ve sóg, Jessé kósín,” he mū. “Nén há han tóg tīgī. Kǵ sóg ti to há nī. Ēn hā vǵ inh jykre kar han mū,” he tóg, Topē ti, Davi to,” he tóg, Paulo ti.

23 “Davi kósín ũ vē, hā vǵ: Jesus, he mū. Topē vǵ vāsǵ ti kātīg ke to ja nīgī. Kǵ tóg vāhā Jesus jēnē ja nī, ěg povo tǵ Israel to, ti tǵ ěg kren han jé. 24 João vǵ ti kātīg ke jo vēnh kar mǵ: “ājag jykre tovānh ra,” he ja nīgī, “isǵ ājag kygpe jé,” he ja tóg nīgī, ěg povo tǵ Israel kar mǵ. 25 João rānhraj tǵ tǵ! henh ken kǵ tóg ag mǵ: “iso ājag tóg Cristo he sór mū,” he ja nīgī, João ti. “Hā tǵ vē,” he ja tóg nīgī. “Inh pi(jé) tǵ Cristo nī,” he ja tóg nīgī. “Ha vé, inh nón tóg kātīg, inh Senhor ti, hā vǵ: Jesus, he mū. Sǵ tǵ ti camarada nīnh ke vē vē, sǵ ti pēn né kunū jé, ti pēn to ró ti, hā ra sóg tǵ ti krēm ke pē jē,” he ja tóg nī, João ti,” he tóg, Paulo ti.

26 “Inh kanhkǵ!” he tóg. “Abraão krē!” he tóg. “Ū tǵ Topē kamēg mū! fóg kāmī!” he tóg. “Topē vǵ ěg hā mǵ vēnh vī tag jēnē, ěg krenkren jé,” he tóg. 27 “Jerusalém tá ke ag vǵ Jesus ki kagtīg ja nǵtīgī. Ti tǵ tǵ Topē kósín nīn ki kagtīg ja ag tóg nǵtīgī, ag pǵi ag ke gé. Hā kǵ ag tóg vāsǵ rán kǵ nī ěn han. Vēnhkán ke kurā ki ag tóg vég tǵ, Topē vī tó tǵ ag tǵ nén rán ja ti. Hā ra ag tóg sir ag tǵ nén tó mū ěn ki króm, ājag tǵ Jesus to: ter jé tóg ke mū, henh kǵ. 28 Nén ũ kórég han ja tǵ ti nī, kǵ ti ter ke tǵ vē vē, hā ra ag tóg Pilatos mǵ: “ěg tǵ ti tén há tóg tǵ vē,” he ja nīgī. 29 Ag tǵ ti to rán ja ěn ki króm kǵ ag tóg cruz ěn to ti térem ja nīgī, vēnh kej kǵtá ag tóg ti fón ja nīgī.

30 Hā ra Topē tóg ti rīn mǵn ja nīgī, ti ter mū ra. 31 Kǵ tóg ā mré ke ag mǵ vēnh ven ja nīgī sir, Jesus ti, ũ tǵ ti mré Jerusalém ra mū ja ag mǵ, Galiléia tá kāmū kǵ. Ēn ag tóg ti kāmén mū sir, vēnh kar mǵ. 32 Vēnh vī tag tó ěg tóg mū,” he tóg, Paulo ti.

33 “Ēg jóg!jóg ag vǵ Topē vī ěn mē ja nīgī. Hā ra tóg ũri han mū, Topē ti, ā tǵ vāsǵ nén tó ja ěn ti. Ēg jóg!jóg ag krē!krē ag mǵ tóg han mū, ti tǵ vāsǵ nén tó ja ěn ti, Topē ti. Hā kǵ tóg Jesus rīn mǵn, ti ter kǵ. Kǵ tóg ti mǵ: “tǵ ā tóg inh kósín jē. Ūri sóg ā han,” he ja nīgī, Topē ti, Jesus mǵ. Topē mǵ jān jafǵ ki tóg rán kǵ nī, jān tǵ 2 ki,” he tóg, Paulo ti.

34 “Hā ra tóg ti tǵ ti rīn mǵn ke tó ja nīgī gé, ti mur ke to hā. Ti vag ke tǵ ěn tó ja tóg nīgī gé, kǵ tóg: “sǵ Davi mǵ nén tó ja ěn ki króm jé sóg ke mū,” he ja nīgī. “Ājag mǵ sóg han mū, sǵ ti mǵ nén tó ja ěn ti,” he ja tóg nīgī, Topē ti,” he tóg, Paulo ti.

35 “Kǵ tóg tag tó ja nīgī gé: “ā tǵ vǵ vag ke tǵ nī,” he ja tóg nīgī gé, Topē ti,” he tóg, Paulo ti.

36 “Hā ra Davi vǵ ter ja nīgī, ā jóg!jóg ag nón. Kǵ tóg vag ja nī inhhā. Topē tǵ ti mǵ nén tó jan ki króm ja tóg nīgī, Davi ti. Ā mré ke ag mǵ tóg han, Topē tǵ ti mǵ nén tó ja ti. Hā ra tóg ter kǵ vag ja nīgī inhhā, Davi ti. 37 Ti jāvo tóg vag ja tǵ nī inhhā, Jesus ti, Topē tǵ ti rīn mǵn kǵ,” he tóg, Paulo ti.

38 “Ha vé, inh kanhkǵ!” he tóg. “Jesus tag tugrīn Topē vǵ ājag mǵ vēnh pǵte fón sór mū, ājag tǵ ti vī mranh ja ti. Hā kǵ sóg ājag mǵ tó mū,” he tóg. 39 “Ājag tǵ Moisés vī mēg mū ra ājag jykre tóg kuryj ja tǵ nī ver. Ājag tǵ hā ra Jesus ki ge kǵ tóg ke mū sir, Topē ti. Ājag kugrynh tóg mū sir. 40 Hā ra ti to é he tǵg nī.

Ke tū nī mū ra ājag tóg venh ke mū, vās̄y nén rán k̄y nī ěn ti, Topē vī tó tī t̄y nén tó ěn ti, ⁴¹hã v̄y: “iso ājag tóg é he mū (m̄ȳr),” he mū. “S̄y nén han ke ve jé ājag tóg ke mū, k̄y ājag kanē jur ke mū, ājag fe tóg jūr̄in kenh ke mū gé,” he ja tóg n̄gtī, Topē ti. “Ājag t̄y kri finh ke tū vē vē, ũ t̄y ājag m̄y tó mū ra. Hã ra ājag tóg venh ke mū,” he ja tóg n̄gtī, Topē vī tó tī ti,” he tóg, Paulo ti.

⁴²Ag t̄y Paulo vī mē k̄n k̄y ag tóg ĩn ěn k̄at̄a pa mū. ĩn k̄at̄a pa k̄y ag tóg ti m̄y: “vēnh k̄n ke kur̄a ũ tá ěg m̄y k̄amén m̄n nī,” he mū. ⁴³K̄y Israel t̄y hēn ri ke ag tóg Paulo ag nón mū mū. Fóg ag tóg ag nón mū mū gé, fóg t̄y Israel jykre han mū ag, ũ t̄y Topē kamēg mū ag. K̄y Paulo ag tóg ag jyvēn mū, ag t̄y Topē to jykrén k̄y n̄t̄i jé, ag t̄y ti t̄y ěg jagāgt̄an to jykrén k̄y n̄t̄i jé.

⁴⁴Vēnhk̄n ke kur̄a ũ tá cidade ěn tá ke kar ag v̄y vēnh m̄n mū, Topē vī jēmē jé. ⁴⁵K̄y Israel ag tóg ũn e ěn vэг mū. K̄y ag tóg jūgjū mū, vēnh kar t̄y Paulo ag to há n̄t̄in k̄y. Hã k̄y ag tóg Paulo vī kaf̄an mū sir, ti t̄y ag m̄y Topē vī tón k̄y. Ti to ag tóg vī vī he mū gé.

⁴⁶Hã ra Paulo ag tóg ag kamēg tū nī. Ag m̄y ag tóg: “ājag hã m̄y ěg tóg tó vén, Topē vī ti,” he mū, “ti t̄y ěg m̄y: Israel ag m̄y tó vén, hen k̄y. Hã ra ājag tóg mē jāvānh n̄t̄i,” he ag tóg. “Ēg r̄ir kr̄ȳg ja tū venh ke tū ājag nī, ājag t̄y mē jāvānh n̄t̄in k̄y,” he ag tóg. “Hã k̄y ěg tóg sir fóg ag hã m̄y tónh ke mū, Topē vī ti,” he ag tóg. ⁴⁷“Topē v̄y ěg m̄y: “ājag t̄y sóg néj gru ri ke han mū,” he mū, “fóg kar ag t̄y ājag ki Topē ve jé, kanhgág ag ke gé. Ājag ki ag tóg mēnh ke mū, Jesus t̄y ag krenkren han ke ti, ga fyn ja mī hã,” he ja tóg nī ěg m̄y, Topē ti,” he ag tóg, Paulo ag.

⁴⁸Fóg ag t̄y tag mē k̄y tóg ag m̄y sér t̄i sir. K̄y ag tóg Topē vī to há n̄t̄i, ti m̄y vī há han k̄y. K̄y ag tóg Jesus ki ge mū, Topē t̄y ũn kuprēg mū ag, ag t̄y ěg r̄ir kr̄ȳg ja tū ve jé. ⁴⁹K̄y ga ěn tá ke kar ag v̄y Topē vī jēmēg mū.

⁵⁰Hã ra Israel ag tóg ũn t̄at̄a há ũ fag mré vī mū, fóg t̄y Israel jykre han mū fag. P̄a'i ag mré ag tóg vī mū gé. Paulo ag kato ag tóg vī mū. K̄y ag tóg ag vóg kónān mū. “Ha mū jég, ěm̄a ũ ra,” he ag tóg mū sir, ag vóg kónān kar k̄y.

⁵¹K̄y Paulo ag tóg ājag pēn kykūnhkūnh mū, ag m̄y: “Topē tovānh ājag huri,” he jé. K̄y ag tóg cidade t̄y Icônio ra mū mū sir. ⁵²Jesus mré mū ag m̄y tóg hã ra sér t̄i. Topē kupr̄ig v̄y t̄y ag jagrē nī, k̄y tóg ag m̄y sér t̄i sir.

Cidade t̄y Icônio tá Topē vī tó

14 ¹Ag t̄y cidade t̄y Icônio tá junjun k̄y ag tóg sir Israel t̄y vēnh kanhr̄an jaf̄a k̄ara ge mū. K̄y ag tóg ag m̄y Topē vī k̄amén mū. K̄y Israel t̄y hēn ri ke ag tóg Jesus ki ge mū gé, fóg t̄y hēn ri ke ag ke gé, ũ t̄y Grego vī tó mū ěn ag. ²K̄y Israel ag tóg, ũ t̄y Jesus ki ge jāvānh ag tóg fóg ag kr̄in kónān mū sir, Jesus mré ke ag to.

³Hã ra Paulo ag tóg tá n̄t̄i mág han mū. K̄y ag tóg Topē vī tó mū, ag t̄y ag kamēg tū n̄n k̄y, Topē vī kri fi k̄y. K̄y Topē tóg ag m̄y ã jykre fig mū, ag t̄y ěg t̄y nén han vānh hyn han jé. Hã k̄y vēnh kar tóg Topē jykre ki kanhró n̄t̄i sir.

⁴Kỹ vênh kar tóg vênh kăpugpóv kŷ nŷtĩ nĩ. Ũ ag tóg Israel ag to há nŷtĩ, jó ũ ag tóg Jesus tŷ ũn vin mũ ag tó há nŷtĩ. ⁵Kỹ Israel ag tóg fóg ag mré jykrén mũ, fóg tŷ pãĩ ag mré, ag tŷ Paulo ag vóg kónãn jé, ag tŷ pó tŷ ag pin jé. ⁶Kỹ Paulo ag tóg jēmēg mũ, kŷ ag tóg cidade ũ ra mũ mũ, cidade tŷ Lистра ra, cidade tŷ Derbe ra ke gé. Ga tŷ Licaônia tá ti nŷtĩ, cidade tag ti. ⁷Cidade ên mũ mũn kŷ ag tóg tá Jesus vĩ há tugtó mũ sir.

Ag tŷ cidade tŷ Lистра tá Paulo vóg kónãn

⁸Cidade tŷ Lистра tá ke ũ tóg nĩ nĩ, ũn tīg vãnh. Ti pên vŷ grĩ nŷtĩ. Ge pê tóg nĩ, ã mur mũn kã. Pên krój tóg nĩ.

⁹Ên tóg sir Paulo vĩ mēg mũ. Kŷ Paulo tóg ti tugnŷm mũ. Kŷ tóg ti tŷ Jesus vĩ kri fig mũ vég mũ, Jesus tŷ ti tŷ há' he jé. ¹⁰Kỹ tóg jamã hár(a) ti mŷ ke mũ, kŷ tóg: “jēg nē ra,” he mũ. “Vênhrã hã jēg,” he tóg ti mŷ, Paulo ti. Kŷ tóg vãhã hũm he mũ. Kŷ tóg mũ tĩ mũ.

¹¹Kỹ tóg vênh kar ên mŷ e tĩ, ag tŷ Paulo tŷ nén han mũ ven kŷ. Kŷ ag tóg ãjag vĩ ki jagnē mŷ ke mũ, vĩ tŷ Licaônia he mũn ki. Jamã hár(a) ag tóg: “topē ag vŷ ěg tá junjun,” he mũ. “Ěg ri ke ag nŷtĩ, topē ag, kŷ ag tóg ěg tá re mũ,” he ag tóg, Paulo ag to. ¹²Kỹ ag tóg Barnabé to: Júpiter, he mũ. Paulo to ag tóg: Mercúrio, he mũ sir, ti vĩ mág to. Ón kŷ ag topē jygi vê, hã vŷ: Júpiter, Mercúrio, he mũ.

Hã ra Paulo ag tóg ag vĩ ki kagtīg nŷtĩ.

¹³Júpiter jo ĩn vŷ cidade fyr tá jē nĩ, kŷ ti tũ ki rĩr tĩ tóg tá nĩ gé. Kŷ tóg monh gé(g) tĩ mũ, ka fej tŷ coroa ke gé, Júpiter tũ ki rĩr tĩ ên ti. Cidade to ró jãnkã mãra tóg gé(g) tĩ mũ. Tá tóg monh kugprũn sór mũ, Barnabé mŷ, Paulo mŷ ke gé. Ón kŷ ag tóg Paulo ag to: “topē ag vê,” he mũ, hã kŷ ag tóg ag mŷ monh kuprũn sór mũ, tá ke kar ên ag.

¹⁴Hã ra Paulo ag tóg mēg mũ, kŷ ag tóg ãjag kur janjãn mũ, jũgũ kŷ. Ũ tŷ vênh mãn kŷ nŷtĩ ag to ag tóg pētē mũ. Prēr kŷ ag tóg ag mŷ: ¹⁵“ne nē?” he mũ. “Tŷ ěg ěprã ke nŷtĩ, ãjag ri ke,” he ag tóg. “Hã ra ěg tóg ãjag mŷ kãmén sór mũ, ãjag tŷ ón kŷ topē tag ag tovãnh jé. Topē pē ki gemnĩ, ũn rĩr mũn ki. Kanhkã han tóg, ga ke gé, goj ke gé, mũ mũ kar ên ke gé, Topē ti,” he ag tóg. ¹⁶“Vãsŷ Topē tóg nação ag mŷ nén ũ to ja tũ nĩgtĩ, kŷ ag tóg ãjag jykre mũ mĩgtĩ. ¹⁷Ge ra tóg ag ki rĩr há han mũ, Topē ti, ag tŷ tag to vãhã ti ki kanhrãn jé. Hã jé tóg ta jēnē, kŷ ãjag jakré tóg mogmog mũ. Kŷ ãjag tóg konh ke mũ. Kŷ ãjag fe tóg há' he mũ sir. ãjag mŷ tóg sér tĩ sir, ti tŷ ãjag mŷ vĕjĕn han kŷ, Topē ti,” he ag tóg, Paulo ag.

¹⁸Ag vĩ ki ag tóg ag mŷ nén ũ kugprũn tovãnh mũ, Paulo ag mŷ, vênh kar ên ag. Hã ra ag tóg ag mŷ nén ũ kugprũn kren ja nĩgtĩ, tá.

¹⁹Kar kŷ cidade tŷ Antioquia tá ke ag tóg tá junjun mũ, cidade tŷ Icónio tá ke ag ke gé. Israel ag vê, tá junjun mũ ag. Ên ag vênh kar krĩn kónãn mũ, kŷ ag tóg Paulo pin mũ, pó tŷ. “Ter ti huri,” he ag tóg mũ sir, ti pin kar kŷ. Kŷ ag tóg ti raran mũ sir. Cidade fyr tá ag tóg ti raran kŷ ti fón mũ sir. ²⁰Kỹ Jesus mré mũ ag tóg ti venh kãmũ mũ, hã ra tóg jēg nē mũ, Paulo ti. Cidade kãra tóg rã mũ.

Tỹ vaj kỹ tóg hā ra cidade tỹ Derbe ra tĩ mũ, Barnabé mré. ²¹Tá ag tóg Jesus kãme há tó mũ gé, Derbe tá. Kỹ ũ tỹ hēn ri ke ag tóg Jesus ki ge mũ sir.

Paulo ag tỹ cidade tỹ Antioquia ra vỹnvỹn ke

Kar kỹ ag tóg cidade tỹ Listra ra vỹnvỹn ke mũ, cidade tỹ Icônio ra ke gé, cidade tỹ Antioquia ra ke gé, Paulo ag. ²²Vỹnvỹn ke ki ag tóg Jesus mré mũ ag jyvēn mũ sir, ag tỹ Jesus vĩ kri fi to krónh ke tũ nĩn jé, ag tỹ to fe tar nĩn jé ke gé. “Ēg tỹ Topē tỹ tỹ ěg pã'i nĩ ve sór nỹtĩn kỹ ěg tóg ti venh ke jo vēnh jagāgtar jagy venh ke mũ,” he ag tóg, Jesus ki ge kỹ nỹtĩ ag mỹ, Paulo ag. ²³Kỹ ag tóg ag mỹ kófa ag kuprēg mũ, ag tỹ Jesus ki ge kỹ nỹtĩ ag ki rĩr jé, ũ tỹ Topē vĩ mē jé vēnh mǎn tĩ ag ki. Ag to ag tóg Topē mré vĩ mũ gé, nén ũ ko tũ nĩn kỹ. Kỹ ag tóg: “Topē vỹ ājag ki rĩr há han mũ,” he mũ. Kỹ ag tóg mũ mũ sir. ²⁴Kỹ ag tóg ga tỹ Pisídia fĩn pa mũ. Ga tỹ Panfília tá ag tóg junjun mũ. ²⁵Cidade tỹ Perge tá ag tóg Topē vĩ tó mũ gé sir. Kar kỹ ag tóg cidade tỹ Atália ra mũ mũ. ²⁶Tá junjun kỹ ag tóg cidade tỹ Antioquia ra mũ mũ gé, canoa mág kãmĩ. Antioquia ěn tá ag tóg pa ja nĩ (mỹr). Tá ke ag tóg ag to Topē mré vĩ ja nĩgtĩ, ti tỹ ag jy nĩgān jé, ag tỹ ti rǎnhrāj han kỹ. Vēnh rǎnhrāj ěn han kǎn ag tóg mũ (mỹr) sir, kỹ ag tóg Antioquia ra vỹnvỹn ke mũ. ²⁷Tá junjun kỹ ag tóg Jesus ki ge mũ kar jé prēr mũ, ag tỹ vēnh mǎn jé. Kỹ ag tóg ag mỹ Topē tỹ nén han mũ kar kãmén mũ. “Fóg ag ne tóg Jesus ki ge mũ gé, Topē tỹ ag krĩn kỹ,” he ag tóg mũ ag mỹ.

²⁸Kỹ ag tóg tá nỹtĩ, kysā tỹ hēn ri ke ki. Jesus mré mũ ag mré ag tóg nỹtĩgtĩ.

Ag tỹ Topē jykre to jykrén

15 ¹Kejēn Judéia tá ke ũ ag tóg tá junjun mũ, Antioquia tá. Tá junjun kỹ ag tóg Jesus mré ke ag mỹ kãmén mũ, kỹ ag tóg: “ājag gré junun fār kym nĩ,” he mũ. “Moisés tỹ ěg mỹ nén tó mũ ěn han nĩ. Ke tũ nĩ mũ ra ājag tóg krenkren ke tũ nĩ,” he ag tóg.

²Hā ra Paulo ag tóg: “ke tũ vē,” he mũ. Kỹ ag tóg jagnē vĩ kafān mũ sir. Kỹ Jesus mré ke kar ag tóg Paulo ag mỹ ke mũ, ag tỹ Jerusalém ra mũ jé. “Tag ag mré mũmnĩ, Jerusalém ra,” he ag tóg. “Tá Jesus tỹ ũn vin mũ ag mré vĩmnĩ, kófa ag mré. Ag mỹ: ěg hỹn hē ri kenh mũ, vēnh gré junun fār kym ke to? hemnĩ,” he ag tóg.

³Kỹ Paulo ag tóg: “ěg mũnh ke nē ha,” he mũ. Jesus ki ge kỹ nỹtĩ ag tóg ag mré mũ sĩ han, kỹ ag tóg mũ mũ. Kỹ ag tóg ga tỹ Fenícia fĩn pa mũ sir, ga tỹ Samaria fĩn ke gé. Ag mũn kỹ ag tóg Jesus mré ke kar ag mỹ fóg ag kãmén mũ, fóg ag tỹ Jesus ki ge mũ ag. Kỹ tóg vēnh kar mỹ sér tĩ sir. ⁴Hā kỹ ag tóg Jerusalém tá junjun mũ. Kỹ tá Jesus ki ge kỹ nỹtĩ ag tóg vēnh mǎn mũ, Jesus tỹ ũn vin mũ ag mré hā, kófa ag mré hā. Kỹ ag tóg ag mỹ Topē tỹ nén han mũ kar tugtó mũ.

⁵Hā ra Fariseu ũ ag tóg tá nỹtĩ gé, ũ tỹ Jesus ki ge mũ ag. Ēn ag tóg ag mỹ ke mũ. “Ēg mỹ tóg há tĩ, ag tỹ ājag gré junun fār kym kym ken kỹ,” he ag tóg

mũ, fóg ag to. “Ag tỹ Moisés tỹ ěg mỹ vĕnh jykre nĩm ja ki kanhrĕn kỹ tóg ěg mỹ há tĩ,” he ag tóg mũ sir, Fariseu ag, fóg ag to, ũ tỹ Israel jykre han tũ ag to.

6Kỹ vĕhĕ Jesus tỹ ũn vin mũ ag vỹ kófa ag mré vĕnh mĕn mũ, vyr mỹ, to vĕmĕn jé. 7Kỹ ag tóg to vĕmĕn mág han mũ sir. Kỹ kejĕn Pedro tóg jĕg nĕ kỹ ag mỹ: “inh kanhkĕ!,” he mũ. “Vĕsỹ Topĕ tóg inh kuprĕg ja nĩ, isỹ fóg ag mỹ Jesus vĩ há tó jé, ag tỹ jĕmĕ kỹ krenkren jé,” he tóg. “Tag ki kanhró ĕjag tóg nỹtĩ,” he tóg. 8“Kỹ Topĕ tóg ag mỹ ĕ kuprĩg jĕnĕg mũ. Ag fe ki kanhró tóg nĩ, Topĕ ti, kỹ tóg ag mỹ ti jĕnĕg mũ. Hĕ ki tóg ěg mỹ ven mũ, ag tỹ Jesus ki ge kỹ nỹtĩ ti, ěg ri kĕn,” he tóg. 9“Hĕ kỹ Topĕ tóg ag to: vyr mỹ ke ag vĕ, he tũ nĩgtĩ. Ag tỹ ti ki ge kỹ nỹtĩn kỹ tóg ag fe tỹ jĕnhkri! he mũ, fóg ag fe tỹ,” he tóg. 10“Topĕ tỹ há vĕ (mỹr). To: vĕnhmỹ ti nĩ, he tũg nĩ,” he tóg. “Ag mỹ ĕjag tóg vĕnh jykre jagy ĕn fi sór mũ, ti tỹ ěg mỹ han jagy ja ra. ěg jóg!jóg ag mỹ tóg han jagy ja nĩ, kỹ tóg ag mỹ ag tỹ ki króm tũ nĩnh ha mĕ tóg tĩ, ěg mỹ ke gé. Hĕ ra ĕjag tóg ag mỹ fi sór mũ,” he tóg. 11“Ke tũg nĩ. Jesus tỹ ěg jagĕgtĕn kỹ tóg ěg kren han mũ, ěg tỹ ti vĩ kri fi kỹ. Kỹ ěg tóg ag ri ke tĕvĩ nỹtĩ,” he tóg, Pedro ti.

12Kỹ vĕnh kar ag tóg ĕmĕ kỹ nỹtĩ nĩ. Kỹ ag tóg Barnabé tỹ ag mỹ nĕn tó mũ mĕg mũ, Paulo tỹ ag mỹ nĕn kĕmĕn ti ke gé. Ag tỹ ěg tỹ nĕn han vĕnh hyn han mũ tó ag tóg mũ gé. Ag tỹ Topĕ jykre ki fóg ag mỹ nĕn hyn han mũ tó ag tóg mũ gé sir.

13Ag tỹ tó kĕn kỹ Tiago tóg sir ag mỹ: “ha mĕ, inh kanhkĕ!,” he mũ. 14“Simĕo vỹ ěg mỹ tó ja nĩ, Topĕ tỹ nĕn han ve ti, Simĕo tỹ fóg ag mỹ Topĕ vĩ tó ve ti. Kỹ ag tóg tỹ Topĕ tũ nỹtĩ sir, fóg tỹ ti vĩ mĕg mũ ag. Jesus mré ke vỹ tỹ ag nỹtĩ, ag tỹ ti ki ge kỹ nỹtĩn kỹ. 15Hĕ ra tóg vĕsỹ rán kỹ nĩ. Topĕ vĩ tó tĩ tóg tag rán ja nĩgtĩ, ha mĕ: 16“kĕtĩg jé sóg ke mũ, he tóg, Topĕ ti. Davi krĕm Israel ag tóg e pĕ ja nỹtĩ ja nĩgtĩ. Hĕ ra Davi jykre tóg tũ! he mũ. Kỹ tóg ĩn vag ri ke nĩ sir. ĩn tĕg han jé sóg ke mũ, hĕ vỹ: Davi krĕ!krĕ ũ vỹ tỹ pĕlĩ nĩnh mĕn mũ, he mũ. Isỹ han ken hĕ vĕ. 17Ti tỹ sóg ũn mág pĕ han ke mũ, povo kar kĕmĩ ke ag tỹ inh ki ge sór jé, fóg kar kĕmĩ ke ag tỹ isũ nỹtĩ jé, kanhgĕg kar kĕmĩ ke ag ke gé, isỹ ũn kuprĕg mũ ag, he tóg. 18Topĕ tỹ tón hĕ vĕ. ũ tỹ vĕsỹ tag kĕmĕn mũ tỹ tón hĕ vĕ,” he tóg, Topĕ vĩ tó ti. Hĕ kỹ ěg tóg tag ki kanhró tĕvĩ nỹtĩ,” he tóg, Tiago ti.

19“Isỹ nĕn to jykrĕn hĕ vĕ, ěg tỹ ag mỹ ěg jykre jagy ĕn tó tũ nĩn jé, ũ tỹ fóg kar kĕmĩ Topĕ jykre han sór mũ ag mỹ, kanhgĕg ag mỹ ke gé,” he tóg. 20“ěg tỹ ag mỹ tónh ke, ha mĕ: vĕnh kĕggrĕ to festa ko tũg nĩ, ĕ prũ tũ fi mré nỹ tũg nĩ, nĕn ũ tỹ vĕsókĩ ter mũ ko tũg nĩ, nĕn ũ kyvĕnh ko tũg nĩ gé,” he tóg, Tiago ti. 21“Moisés jykre tugtó ag tóg tĩ, ěg mré Israel ag, cidade kar ki. Vĕnh kĕn ke kurĕ ki ag tóg ti tỹ rán mũ to ke tĩ. Vĕsỹ ag tóg ke ja nỹtĩ, kỹ ag tóg ũri ke tĕvĩ tĩ gé,” he tóg. “Hĕ kỹ ũ tỹ han sór mũ tóg han tĩ, Moisés jykre ti,” he tóg, Tiago ti.

Apóstolo ag tỹ carta rán mũ

22Kỹ Jesus tỹ ũn vin mũ ag tóg to jykrĕn mũ, kófa ag ke gé, Jesus ki ge mũ ag kar ke gé, ũ tỹ Topĕ vĩ mĕ jé vĕnh mĕn tĩ ag. Kỹ ag tóg ũ ag kuprĕg mũ, ag tỹ Antioquia ra mũ jé, Paulo mré, Barnabé mré. Ag tỹ ũn

kuprēg mū ag hã vë, hã vỹ: Judas, he mū, ti jiji ũ hã vỹ: Barsabás, he mū. Silas kuprēg ag tóg mū gé. Ēn ag tóg tỹ Jesus mré ke ag pã'i nỹtĩ. ²³Ag mỹ ag tóg vënh rán nĩm mū gé. Ag tỹ rán hã vë, ha mē:

“Jesus tỹ ũn vin mū ag tỹ rán hã vë, kófa ag tỹ rán ke gé, Jesus mré ke ag. Ēg tỹ cidade tỹ Antioquia tá ke ag mỹ rán hã vë, fóg tỹ Jesus mré ke ag mỹ, ga tỹ Síria tá ke ag mỹ, ga tỹ Cilícia tá ke ag mỹ ke gé. Ājag mỹ há?

²⁴Ēg kã ũ ag tỹ ājag tá junjun mē ēg tóg. Ājag krĩn ũ han ag tóg mū, kỹ ājag krĩ tóg kufy' he mū. Hã ra ēg tóg ag mỹ: ha vënh jykre tag tó, he ja tũ nĩgtĩ. ²⁵Kỹ ēg tóg vënh mãn, ēg tỹ to jykrén jé. Kỹ ēg kar tóg to jykrén kỹ tag ag kuprēg, ēg tỹ ājag to ag jëgnë jé, ag tỹ Barnabé mré mū jé, Paulo mré. Ag to ēg há tãvĩ nỹtĩ, Barnabé to, Paulo to ke gé. ²⁶Ag hã ne tóg fe tũmë nỹtĩgtĩ!, fe tar kamë ag nỹtĩgtĩ!. Kỹ ag tóg ēg Senhor tỹ Jesus Cristo vĩ tó mũgtĩ, ũ tỹ hën ri ke tỹ ag tén sór mū hã ra. ²⁷Ēg tỹ ag to há nỹtĩn kỹ ēg tóg Judas jënëg mū, Silas ke gé, ag tỹ ājag mỹ ēg tỹ rán mū tag ti kãmén jé.

²⁸Topë kuprĩg vỹ ēg mỹ tó, kỹ tóg ēg mỹ há tĩ gé, ēg tỹ ājag mỹ vënh jykre jagy ěn fig tũ nĩn jé. Tag hã han jé ājag tóg ke mū, ha mē: ²⁹vënh kãgrá to festa ko tũg nĩ, nén ũ kyvénh ko tũg nĩ gé. Nén ũ tỹ vësóg ki ter mū ěn ko tũg nĩ gé. Ājag prũ tũ fag mré nỹ tũg nĩ gé. Ājag tỹ tag ki króm kỹ tóg há tĩ. Jatun mỹ nỹtĩmnĩ.” Vënhrán hã vë.

³⁰Kỹ ag tóg ag mỹ: “ha mū jëg ge,” he mū. Kỹ ag tóg mū kỹ Antioquia tá junjun mū. Tá ag tóg vënh kar jé prër mū. Jesus ki ge mū kar jé ag tóg prër mū sir, ag tỹ to vënh mãn jé. Kỹ ag tóg ag mỹ vënh rán ěn nĩm mū.

³¹Kỹ ag tóg to ke mū, vënh rán to. Kỹ tóg ag mỹ há tĩ, ag tỹ vënh jyvën rá ěn ven kỹ. Kỹ ag krĩ tóg kãnhvy' he mū sir.

³²Kỹ Judas vỹ Silas mré vënh kar jyvën mū gé. Topë vĩ tó tĩ ag vë. Hã kỹ ag tóg ag jyvën tỹ hën ri ke han mū. Ag fe tỹ ag tóg tar' he mū. ³³Tá ag tóg semana tỹ hën ri ke han mū. Kỹ Jesus mré ke ag tóg ag mỹ: “ha jatun mỹ mū jëg,” he mū, ag tỹ Jerusalém ra vỹnvyn ke jé, ũ tỹ ājag jëgnëg mū ěn to. ³⁴Hã ra tóg Silas mỹ há nĩ, kỹ tóg tá nĩ nĩ sir, tĩ tũ tóg nĩ sir.

³⁵Kỹ Paulo tóg Barnabé mré Antioquia tá nĩ nĩ. Topë vĩ tỹ ag tóg ag kanhrán mū, kãmén kỹ. Hã ra ũ tỹ hën ri ke ag tóg ag ri kén Topë vĩ tó mū gé.

Paulo tỹ ã pir mỹ tĩg, Barnabé tỹ ã pir mỹ tĩg

³⁶Si há tũ ra Paulo tóg Barnabé mỹ: “mū nỹ, ēg tỹ ěmã ěn kar mĩ mū mãn jé, ēg tỹ Jesus vĩ tó ja tá,” he mū. “Isỹ Jesus mré ke ag venh há tóg tĩ. Ag mỹ hën ri ke mũn mū há han mū vỹ? he sóg tĩ,” he tóg, Paulo ti, Barnabé mỹ.

³⁷Kỹ Barnabé tóg João Marcos pére tĩg sór mū. ³⁸Hã ra Paulo mỹ tóg kórég nĩ, Marcos tỹ ag ré kỹ tĩg ja nĩn kỹ, ga tỹ Panfília tá. “Ũ tỹ ēg mré Topë rãnhraj han ja tũ ěn pére sóg tĩg mãn ke tũ nĩ ha,” he tóg, Paulo ti.

³⁹Hã to ag tóg jagnë to jũgĩjũ mū. Kỹ ag tóg vënh kãpugpóv kỹ mū mū. Kỹ Barnabé tóg Marcos mré goj vãso tỹ Chipre ra tĩ mū, canoa mág kãmĩ.

⁴⁰Jó Paulo tóg Silas kuprëg mũ, ti tỹ ti mré tĩg jé. Kỹ tóg tĩ mũ sir. Jesus mré ke ag tóg Paulo to Topẽ mré vĩ mũ, ti tỹ ti jy nĩgãn jé. ⁴¹Kỹ ag tóg ga tỹ Síria mũ pa mũ, ga tỹ Cilícia mũ ke gé. Jesus ki ge mũ kar jyvẽn tóg mũ, ã tĩg kỹ, Paulo ti.

Timóteo tỹ Paulo mré tĩg

16 ¹Kỹ Paulo ag tóg cidade tỹ Derbe tá junjun mũ, cidade tỹ Listra tá ke gé. Kỹ tá ù tóg nĩ nĩ, Jesus mré tĩ ù, ti jyjy hã vỹ: Timóteo, he mũ. Ti mỹnh fi ne tóg tỹ Israel nĩ!, hã ra fi tóg Jesus ki rã ja nĩgtĩ. Ti panh tóg tỹ fóg tỹ Grego nĩ, Timóteo panh ti.

²Ti to ag tóg vĩ há han mũ, Jesus mré ka ag, Listra tá ke ag, Icônio tá ke ag ke gé, Timóteo to. ³Kỹ Paulo tóg ti pére tĩg sór mũ, kỹ tóg ti gré junun fár kym mũ, Israel ag tugrĩn. Vẽn kar tóg ti panh tỹ tỹ fóg tỹ Grego nĩ ki kanhró nỹtĩ, hã kỹ tóg ti fár kym ja tù nĩ. Hã ra ag tỹ ra mũnh ke tá ag tóg e nỹtĩ, Israel ag, hã kỹ Paulo tóg ti fár kym mũ sir.

⁴Kỹ ag tóg cidade ên mũ mũ mũ. Kỹ ag tóg ag mỹ Jesus tỹ ùn vin mũ ag tỹ rá kãmén mũ sir, kófa ag tỹ Jerusalém tá nén rán ja ti, Jesus mré ke ag mỹ. Ag tỹ nén ki króm ke hã tỹ ag tóg ag mỹ kãmén mũ. ⁵Hã kỹ Jesus ki ge mũ ag tóg tar nỹtĩ sir, Jesus jykren ki. Vẽn mãn ag tóg tĩ, ag tỹ Topẽ vĩ mẽ jé. E ag tóg nĩgtĩ sir, komêr hã.

Paulo tỹ nén nẽ vég mũ

⁶Kỹ Paulo ag tóg ga tỹ Frigia mũ pa mũ, ga tỹ Galácia mũ ke gé. Kỹ ag tóg ga tỹ Ásia tá Topẽ vĩ tó sór mũ, hã ra Topẽ kuprĩg tóg ag mỹn nenh mũ. ⁷Kỹ ag tóg ga tỹ Mísia tá junjun mũ. Kỹ ag tóg ga tỹ Bitínia ra mũ sór mũ, hã ra Topẽ kuprĩg tóg ag mỹn nenh mũ gé. ⁸Kỹ ag tóg Mísia jy mũ kỹ cidade tỹ Trôade tá junjun mũ. ⁹Kỹ kutyg kỹ Paulo tóg nén nẽ vég mũ. Ga tỹ Macedônia tá ke vég tóg mũ, ti vẽnhpéti ki. Kỹ tóg ti jo jẽ nĩ. Kỹ tóg ti mỹ: “Macedônia to kãtĩg, êg kanhrãn jé,” he mũ ti mỹ, ga tỹ Macedônia tá ke ên ti. Kỹ Paulo tóg rĩr mũ sir.

¹⁰Paulo tỹ nén nẽ ên ve kar kỹ êg tóg vêsỹmér Macedônia ra mũ sór mũ sir. “Jesus hỹn êg mỹ: ha mũ jêg, hé,” he êg tóg. “Ag mỹ inh vĩn tó, he ti hỹn, Jesus ti,” he êg tóg, Paulo tỹ nén nẽ ên ve kỹ. ¹¹Kỹ êg tóg cidade tỹ Trôade ki pa mũ. Vêsỹmér êg tóg goj vãso tỹ Samotrácia ra mũ mũ. Tỹ vaj kỹ êg tóg cidade tỹ Neápolis ra mũ mũ. ¹²Tá pa kỹ êg tóg cidade tỹ Filipos ra mũ mũ. Ga tỹ Macedônia ki cidade ve vẽ. Êg tỹ tá junjun vén jan hã vẽ. Fóg tỹ Romano ag jamã ù vẽ. Tá êg tóg kurã e sĩ ki nỹtĩ nĩ.

Lídia fi tỹ Jesus ki rã

¹³Vẽn kãn ke kurã ki êg tóg cidade to ró mãra mũ mũ, goj ra. “Tãn hỹn Topẽ mré vĩ jafã nĩ,” he êg tóg. Tá êg tóg nĩgnĩ mũ sir. Ûn tãtã fag tóg tá nỹtĩ nĩ, kỹ êg tóg fag mré vĩ mũ.

¹⁴Tá ù fi tóg nĩ nĩ, fi jiji hã vỹ: Lídia, he mũ. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topẽ kamêg fi tóg tĩ. Ên fi vỹ

Paulo vī mēg mū sir. Kŷ Topē tóg fi mŷ krī há nīm mū, kŷ fi tóg Paulo vī jēmē há han mū. ¹⁵Kŷ ěg tóg fi kypég mū, fi mré ke kar mré hā. Kŷ fi tóg ěg mŷ: “isŷ Jesus ki rā kŷ jē ve ājag (mŷr),” he mū. “Ti tŷ ājag mŷ gen kŷ inh ĩn ki gemnī,” he fi tóg. “Tá inh mré nŷtīmī,” he fi tóg. Vī ki fi tóg ěg kutān mū. Kŷ ěg tóg ke mū.

Paulo ag tŷ Filipos tá se kŷ nŷtī

¹⁶Ěg tŷ kejēn Topē mré vī jafā ra mū mǎn kŷ ũ fi tóg ěg kato tē mū. Ũ camarada fi vē. Hā ra fi tóg jagrē kórég nī, kŷ fi jagrē tóg vēnh kar mŷ ag tŷ nén venh ke tó tī. Fi patrāo ag tóg fi tugnīn jānkamy mág vég tī, fi tŷ jānkamy to vēnh kar mŷ ag tŷ nén venh ke tón kŷ.

¹⁷Ěn fi vŷ Paulo nón tī mū, ěg nón, kŷ fi tóg jamā hár(a) prēr mū, kŷ fi tóg: “Topē pē camarada ag vē (mŷr),” he mū. “Vēnh kar káfór camarada ag vē mŷr. Ag hā ne tóg ājag mŷ vēnh vī tó tī, ājag tŷ to krenkren jé!” he fi tóg ěg to. ¹⁸Kurā tŷ hēn ri ke han fi tóg, vī tŷ ge han kŷ. Kŷ tóg Paulo mŷ tŷ ũ nŷ, kŷ tóg kyrā kŷ fi jagrē mŷ: “Jesus Cristo jykre tŷ sóg ā mŷ tó mū, ā tŷ fi tovānh jé,” he mū. Kŷ tóg vēsŷmēr fi tovānh mū sir, fi jagrē kórég ěn ti.

¹⁹Hā ra fi patrāo ag mŷ tóg tŷ ũ nŷ, ag tŷ fi tugrīn ganho ve mǎn tū nīn kŷ. Kŷ ag tóg Paulo ség mū, Silas ke gé. Pā'i ag mŷ ag tóg ag ven mū, cidade kuju ki. ²⁰Pā'i ag mŷ ag ven kŷ ag tóg: “Israel tag ag ve ra ha,” he mū. “Vēnh kar jūgŷū han ag tóg mū nī (mŷr), ěg jamā tag mī,” he ag tóg. ²¹“Vēnh jykre vēnhmŷ tó ag tóg mū (mŷr), ěg tŷ nén han ke tū tó ag tóg mū (mŷr). Tŷ ěg tóg Romano nŷtī, kŷ ag jykre tóg ěg mŷ tŷ ũ nŷ,” he ag tóg. ²²Povo ěn kar tóg ag to kórég nŷtī, kŷ ag tóg ag kato vī mū.

Kŷ pā'i ag tóg polícia ag mŷ: “ag kur nū ra,” he mū. “Ag mrānmrān ra,” he ag tóg mū gé. ²³Ag mrānmrān tŷ hēn ri ke han ag tóg mū, ka téj tŷ. Kar ag tóg vēse ja kākī ag vām mū. Vēse ja ki rīr tī mŷ ag tóg: “ag nīgfénh há han nī, ag tŷ kāpa tū nī jé,” he mū. ²⁴Ag tŷ ti mŷ tag tó to tóg vēse ja kuju tá ag vām mū, vēse ja mág ěn kuju tá. Ka tŷ tóg ag sigség mū sir.

²⁵Meia noite ki Paulo tóg Silas mré Topē mré vī mū. Tī mŷ ag tóg jānjān mū, Topē mŷ. Kŷ vēse ag kar vŷ jēmēg mū sir. ²⁶Kŷ vāhā ga tóg jūrūn ke mū. Vēse ja krēm tóg jūrūn ke mū. Kŷ vēsŷmēr jānkā kar vŷ nognor kǎn tī mū, rómrom kǎn tóg mū. Kŷ vēse ag kar ěn ferro tóg kygvar kǎn mū, ag se ja ti. ²⁷Kŷ tóg vēse ja ki rīr tī nūnmǎn mū gé. hā ra vēse ja jānkā kar tóg nognor kŷ nŷtī nī, rómrom kŷ tóg nŷtī nī. Kŷ ũ tŷ ag ki rīr tī ěn tóg ā kyfé téj, ā rógro ěn kunūnh kŷ tóg vēnh kusón sór mū. “Vēse kar ag hŷn vēnh pigju kǎn,” he tóg. Hā kŷ tóg vēnh kusón sór mū.

²⁸Hā ra Paulo tóg jamā hár(a): “ker vēnh vóg kónān hē!” he mū. “Ěg kar vŷ ki nŷtī,” he tóg.

²⁹Kŷ tóg néj gru to vī mū, ũ tŷ ag ki rīr tī ěn ti. Kŷ tóg Paulo ag se ja kāra vēnhvāg rā mū, jūrūn ke kŷ. Paulo jo tóg mŷg ke mū, Silas jo ke gé, ag tŷ ti mŷ ti káfór nŷtīn kŷ. ³⁰Ag gé(g) tóg tī mū, vēse ja kátá kākutē kŷ, kŷ tóg ag mŷ: “inh hŷn hē ri kenh mū vŷ?” he mū. “Topē vī mranh sóg, hā ra tóg ti tŷ inh kren han há tī,” he tóg, ũ tŷ vēse ja ki rīr tī ěn ti.

³¹Kỹ ag tóg ti mỹ: “Jesus Cristo ki rã ge,” he mũ. “Kỹ ã tóg kren mũ, ã mré ke kar ag mré hã,” he ag tóg ti mỹ, Paulo ag. ³²Kỹ ag tóg ti mỹ Jesus vĩ kāmén mũ, ti mré nỹtĩ ag mỹ ke gé. ³³Kỹ tóg ag ki rĩr mũ vèsymér, kuty ke nỹ ra. Ag tỹ ag mrãnmrãn ja ěn kupég tóg mũ ag mỹ. Kỹ ag tóg vènh kaja jé ti kypég mũ gé, ti mré nỹtĩ ag mré, ag tỹ Jesus ki ge kỹ. ³⁴Kỹ tóg ã ĩn ra ag tatĩn ti mũ. Ag jèn tóg mũ. Ti fe tóg mrin ke mũ sir, ti tỹ Jesus ki rã kỹ. Ti mré nỹtĩ ag kar mỹ tóg sér tĩ gé sir, ù tỹ vèse ja ki rĩr tĩ ěn mré ke fag mỹ.

³⁵Tỹ vaj kỹ pã'i ag tóg polícia ag jègnèg mũ, ù tỹ vèse ja ki rĩr tĩ ěn mỹ. “Ěn ag mỹ: ha mũ jèg, hemní,” he ag tóg ti mỹ. ³⁶Kỹ ù tỹ vèse ja ki rĩr tĩ ěn tóg Paulo mỹ ke mũ. “Pã'i ag vỹ inh mỹ vènh vĩ jènè, isỹ àjag mỹ: ha mũ jèg, he jé. Hã kỹ jatun mỹ mũ jèg,” he tóg, Paulo ag mỹ.

³⁷Kỹ Paulo tóg ti mỹ: “hã ra ag tóg vènh ó to èg mrãnmrãn ja nĩ,” he mũ. “Vènh kar vỹ ag tỹ èg mrãnmrãn ve kãn. Hã ra ag tóg èg ki jèmè ja tũ nĩ, èg jyvèn ja tũ ag nĩ gé. Tỹ èg Romano nỹtĩ, hã ra ag tóg vèse ja kãki èg vãm. Jó ag tóg vènh kar vatánh tá èg mỹ: ha mũ jèg, he sór mũ. Mũnh ke tũ èg nĩ. Ag hã tóg kãmũnh mũ, pã'i ag. Èg tatĩ ag tóg mũnh mũ. Kỹ èg mũnh mũ ha,” he tóg, Paulo ti.

³⁸Kỹ polícia ag tóg pã'i ag mỹ tag tó mũ sir, kỹ tóg ag mỹ e tí. Ag tỹ Romano ù vóg kónãn ke tũ vè vè, hã kỹ ag fe tóg jürũn ke mũ, pã'i ag.

³⁹“Èg mỹ vènh pãte fón nĩ, èg tỹ àjag se ja ti,” he ag tóg mũ. Kỹ ag tóg ag tatĩ mũ mũ. “Àjag tỹ èg jamã ki pa kỹ tóg há tĩ,” he ag tóg mũ sir ag mỹ.

⁴⁰Ag tỹ vèse ja ki pa kỹ ag tóg Lídia fi ĩn ra mũ mũ sir. Jesus mré ke ag vég ag tóg mũ. Kỹ ag tóg ag jyvèn mũ. Kỹ ag tóg cidade ěn ki pa mũ sir.

Cidade tỹ Tessalônica tá

17 ¹Kỹ ag tóg cidade tỹ Anfípõlis mĩ pa mũ, cidade tỹ Apolônica mĩ ke gé. Kỹ ag tóg cidade tỹ Tessalônica tá junjun mũ. Tá Israel tỹ vènh kanhrãn jafã tóg nĩ. ²Kỹ Paulo tóg ã tỹ nén han tĩ ěn han mũ sir.

Israel tỹ vènh kanhrãn jafã kãra tóg rã mũ. Ag mré tóg vĩ mũ, vènh kãn ke kurã tägtũ ki. Topè vĩ tó tóg mũ sir ag mỹ, Paulo ti, vãsỹ rán kỹ nĩ ěn ti. ³Ag mỹ tóg Cristo kãmén mũ, ti jagtar ti, ti ter kar rĩr mãn ja ěn ti.

“Jesus hã vè, hã vỹ: Cristo, he mũ,” he tóg. “Cristo tóg vãsỹ rán kỹ nĩ, ti jagtar ke ti, ti rĩr mãn ke ti ke gé, hã vỹ: Jesus, he mũ,” he tóg, Paulo ti.

⁴Kỹ tóg ù ag mỹ ge nĩ, Israel kãmĩ ù ag mỹ. Kỹ ag tóg Paulo mré mũgtĩ, Silas mré ke gé. Kỹ fóg tỹ Grego he mũ tỹ hèn ri ke ag tóg to há nỹtĩ gé sir, ù tỹ Topè kamèg mũ ag, ùn tãtã há fag ke gé.

⁵Hã ra Israel ù ag mỹ tóg tỹ ù nỹ. Hã kỹ ag tóg ùn kórég ag mỹ: “kãmũ jèg ra,” he mũ, ùn rãnhrãj vãnħ ag mỹ. Vènh génh kỹ ag tóg vènh kar jũgũ han mũ. Kỹ ag tóg Jasão he mũ ěn ĩn jy nỹtĩ nĩ sir. Paulo ag kanèg ag tóg mũ, ag jãvãnħ kỹ, ag tỹ vènh kar jũgũ ěn ag mỹ ag ven jé. ⁶Hã ra ag tóg ag vég tũ nĩ, Paulo ag. Kỹ ag tóg Jasão pére mũ mũ, Jesus mré ke ù ag mré ke gé. Pã'i ag mỹ ag tóg ag vin mũ. Kỹ ag tóg jamã hár(a) prèr mũ. “Ú tỹ mundo kar ki vènh kar jũgũ han mũ ag tóg tag ki junjun mũ (mỹr),” he ag tóg mũ. ⁷“Jasão tóg ag mỹ: kãge jèg ra, hé.

Hã ra ag kar tóg pã'i mág tỹ imperador vĩ mranh ja tĩgtĩ. “Vyr mỹ ãg pã'i mág nĩ, hã vỹ: Jesus, he mũ,” he ag tóg. “Kỹ ãg pi(jé) imperador krêm nỹtĩgtĩ!” he ag tóg, Paulo ag,” he ag tóg mũ. Ag tỹ Paulo to ón hã vẽ, pã'i ag mỹ.

⁸Kỹ ù tỹ mẽg mũ ag vỹ fe ù nỹtĩ sir, cidade ãn tá pã'i ù ag, cidade ãn tá ke kar ag ke gé. ⁹Kỹ pã'i ag tóg Jasão ag mỹ: “ãg mỹ jãnkamy nĩm ké, ãg tỹ to ve jé, ãjag tỹ imperador kato tẽnh ke tũ ti,” he ag tóg. Ag tỹ ag mỹ nĩm kar kỹ ag tóg: “ha mũ jẽg (ge),” he mũ sir.

Cidade tỹ Beréia tá

¹⁰Kuty ãn kã Jesus mré ke ag tóg Paulo mỹ: “ha tĩg, cidade tỹ Beréia ra,” he mũ. Silas mỹ ag tóg ke mũ gé. Kỹ ag tóg mũ mũ.

Ag tỹ Beréia tá junjun kỹ ag tóg Israel tỹ vẽnhanhrãnjafã kãra ge mũ, ag mỹ Topẽ vĩ tó jé.

¹¹Beréia tá ke ag tóg jykre há nỹtĩ. Ag pi(jé) Tessalônica tá ke ag ri ke nỹtĩ'. Kỹ ag tóg Paulo ag vĩ kri fig mũ. Ag mỹ tóg há tĩ sir. Kurã kar ki ag tóg Topẽ vĩ ki estudar he mũ, ag tỹ to: “ki hã tóg tó tĩ,” hen kỹ. ¹²Kỹ ù tỹ hẽn ri ke ag tóg Jesus ki ge mũ, fóg tỹ Grego ag mré hã, ùn tãtã há fag mré hã.

¹³Kỹ Israel ag tóg mẽg mũ, cidade tỹ Tessalônica tá. Paulo tỹ Beréia tá Topẽ vĩ tó mũ mẽg ag tóg mũ sir. Kỹ ag tóg Beréia tá junjun mũ, ag tỹ tá vẽnhanhrãnjafã han jé. ¹⁴Kỹ Jesus mré ke ag tóg Paulo mỹ: “ha tĩg, canoa mág kãmĩ,” he mũ. Hã ra Silas vỹ tĩ tũ nĩ, Timóteo ke gé. Beréia tá ag nỹtĩ. ¹⁵Kỹ ù ag tóg Paulo mré mũ mũ. Cidade tỹ Atenas ra ag tóg ti pére mũ mũ. Ag tỹ tá vỹnvỹn kenh ken kỹ Paulo tóg ag mỹ ke mũ, ag tỹ Silas jé prẽr jé, ag tỹ Timóteo jé prẽr jé ke gé, ag tỹ vẽsỹmẽr cidade tỹ Atenas kukãm kãmũ jé.

Cidade tỹ Atenas tá

¹⁶Kỹ Paulo tóg Atenas tá nĩ nĩ, Silas jãvãnh kỹ, Timóteo jãvãnh kỹ ke gé. Hã ra tóg sir krĩ ù nĩ, ti tỹ tá vẽnhanhrãnjafã tỹ hẽn ri ke ven kỹ, ti tỹ ag tỹ to jãnjafã ãn ven kỹ. ¹⁷Kỹ tóg Israel tỹ vẽnhanhrãnjafã ki Israel ag mré vĩ mũ, fóg tỹ Israel jykre han mũ ag mré ke gé. Kurã kar ki tóg cidade kaju tá vẽnhanhrãnjafã vĩ mũ gé sir, ù tỹ tá nỹtĩ ag mré.

¹⁸Kỹ ù ag tóg ti mré vĩ mũ, ù tỹ Epicuro tỹ nẽn rán ja to jykrén mũ ag, ù tỹ Estóico he mũ ag tỹ nẽn rán ja to jykrén mũ ag ke gé. Kỹ ag tóg ti to: “vĩ mã pẽ tóg nĩ, vĩ kamẽ tóg nĩ,” he mũ. “Ti hỹn tóg ne tó'?” he ag tóg. Kỹ ù ag tóg ti to: “topẽ ù tugtó ti hỹn, kór há tá topẽ,” he mũ. Hã ra Paulo tóg Jesus tỹ vẽme sér tó mũ. Jesus rĩr mãn tó tóg mũ, Paulo ti.

¹⁹Kỹ ag tóg sór tỹ Areópago ra ti pére mũ mũ. Tá pã'i ag tóg ag jyvẽn tĩ, sór tỹ Areópago tá. Kỹ pã'i ag tóg ti mỹ: “ã tỹ vẽnhanhrãnjafã jykre tag tó mũ kãmén há han ra ãg mỹ,” he mũ, ti mỹ. ²⁰“(Ge) mẽ ja tũ ãg nỹtĩ, ã tỹ ãg mỹ tó mũ tag ti. Kỹ ãg mỹ kãmén há han nĩ,” he ag tóg, pã'i ag.

²¹Hã ra Atenas tá ke ag tóg vẽnhanhrãnjafã vĩ tãg mẽ to há nỹtĩ, cidade ù tá kãmũ kỹ tá nỹtĩ ag ke gé. Ag tỹ vẽnhanhrãnjafã vĩ tãg mẽ kỹ ag fe tóg mrin ke tĩ.

²²Kỹ Paulo tóg sór tỹ Areópago kri jě kỹ ag mỹ: “Atenas tá ke!” he mũ. “Topě tỹ hên ri ke kaměg ājag tóg tĩ (mỹr). Tag ve sóg,” he tóg. ²³“Ājag jamā mĩ sóg tĩ, kỹ sóg ājag tỹ topě jo ĩn kāsir kar vigvé. Kỹ sóg topě jo ĩn sĩ ù vé, kỹ tóg to rán kỹ nĩ, hā vỹ: ěg tỹ topě ki kagtĩg jo ĩn, he mũ, ti rá ti. Topě ěn tó sóg tĩ, ājag tỹ Topě ki kagtĩg ěn. Ājag tỹ ti ki kagtĩg nĩ ra ājag tóg ti mỹ nén ù kugrũn tĩ,” he tóg.

²⁴“Topě ěn vỹ mundo kar han, mĩ mũ kar ke gé. Kanhkā tãn vỹ mỹr, kỹ tóg tỹ ga to pã'i nĩ gé. Hã kỹ tóg ěg tỹ ti jo ĩn han krēm nĩ tũ nĩgtĩ (mỹr),” he tóg. ²⁵“Kỹ ěg tóg ti ki rĩr ke tũ nĩ gé, ti jagtar tũ nĩn kỹ. Věnh kar rĩn tóg nĩgtĩ (mỹr), Topě ti, kỹ tóg vėnh kar tỹ hãmhãm ke han tĩ. Vėnh kar tỹ nén precisar he kar nĩm tóg tĩ (mỹr),” he tóg. ²⁶“Kỹ tóg vėnh kvvėnh pir tỹ ěprã ke kar hyn han, nação kar (mỹr), ga kar mĩ mũ mũ ag (mỹr). Tỹ ěg vėnh kvvėnh pir nỹti. Kỹ tóg ěg mỹ ěg mur kurã nĩm mũ gé, ěg ter kurã ti ke gé. Ěg mỹ tóg ěg jamã nĩm mũ gé, Topě ti,” he tóg. ²⁷“Vėnh kar hyn han tóg, Topě ti, ěg tỹ ti to há nĩn jé, ěg tỹ ti ki kanhró nỹti jé. Kór gy tũ ti nĩ, ti pi(jé) kuvar gy nĩ! Kakó ti nĩ, Topě ti,” he tóg. ²⁸“Ti tỹ ěg han vỹ mỹr, hã kỹ ěg tóg rĩnrĩr nỹti nĩ, ti tugrĩn. Ti tugnĩn ěg tóg mũgtĩ (mỹr), kỹ ěg tóg ti tugrĩn nỹti gé (mỹr), Topě tugrĩn. Hã kỹ ājag kãmĩ vėnh rãn tĩ ag tóg tó ja nĩgtĩ gé, kỹ ag tóg: tỹ ěg Topě krē nỹti, he ja nĩgtĩ. ²⁹Ěg tỹ tỹ ti krē nỹtĩn kỹ ěg tóg ti ki kanhró nỹti gé. Ouro ri ke tũ ti nĩ, Topě ti. Ti pi(jé) prata ri ke nĩ! Ti pi(jé) pó ri ke nĩ! Ti pi(jé) tỹ vėnh kãgrã nĩ, retrato ke gé, ti sinvĩ ra. Ěprã ke tỹ nén to jykrén mũ ri ke tũ ti nĩ, ěg tỹ nén han mũ ri ke tũ ti nĩ. Topě vỹ (mỹr), Topě,” he tóg, Paulo ti.

³⁰“Hã ra Topě tóg ěg to fe mág mũ, ěg tỹ ti ki kagtĩg nỹtĩn kỹ. Hã kỹ tóg vãhã vėnh kar mỹ vėnh vĩ jėnėg mũ, ěg tỹ ěg jykre tovãnh jé. ³¹Kurã nĩm tóg huri, kỹ tóg kurã ěn ki ěprã ke jykre kar tugnỹm ke mũ. Kurã ěn ki tóg vėnh jykre kuryj han ke mũ inhhã, Topě ti, ti tỹ ěg jykre tugnỹm ke mũn kỹ. Ûn pir kuprėg tóg, ti tỹ ti jagfy ěg kar jykre tugnỹm jé. Ěn tóg ter ja nĩ, hã ra Topě tóg ti ter kỹ ti rĩn mãn ja nĩ, ěg tỹ ti ki kanhró nỹti jé, ù tỹ Topě jagfy ěg jykre tugnỹm ke ti,” he tóg, Paulo ti.

³²Ti tỹ ag mỹ ti ter kar rĩr mãn tón kỹ ù ag tóg to é he mũ. Jó ù ag tóg: “kurã ù kã ěg hên ri ke mũn ã vĩ mẽ mãn sór mũ,” he mũ. ³³Hã kỹ Paulo tóg tĩ mũ, ag ré kỹ. ³⁴Kỹ ù ag tóg ti nón mũ mũ, kỹ ag tóg Jesus ki ge mũ sir. Ag kã ù vỹ tỹ Dionísio nĩ. Areópago tá ag jyvėn tĩ ag kã ù vỹ, Dionísio ti. Kỹ ù fi tóg Jesus ki rã mũ gé. Fi jyjy hã vỹ: Damáris, he mũ. Kỹ ù ag vỹ ti ki ge mũ gé sir.

Cidade tỹ Corinto tá

18 ¹Kỹ Paulo tóg cidade tỹ Atenas ki kutě kỹ cidade tỹ Corinto ra tĩ mũ. ²Tá Israel ù tóg nĩ nĩ, ti jiji hã vỹ: Áquila, he mũ. Ponto tá ke vỹ. Ûri tóg ga tỹ Itália tá kãtĩg ja nĩ, ã prũ fi mré. Fi jyjy hã vỹ: Priscila, he mũ. Pã'i mág tỹ imperador tỹ Cláudio he mũ tóg Israel kar ag mỹ: “cidade tỹ Roma ki pa jėg,” he ja nĩgtĩ. Hã kỹ fag tóg cidade tỹ Corinto tá junjun ja nĩgtĩ.

³Kỹ Paulo tóg fag mré nĩ nĩ sir. Fag mré tóg rãnrãj mũ sir. Hã ra fag tóg kur tỹ ĩn han mũgtĩ, Paulo kóm. Fag rãnrãj hã vỹ. Hã kỹ Paulo tóg

fag mré rānhrāj mū sir, ti tỹ fag mré nīn kỹ. ⁴Kỹ tóg vēnhkán ke kurā kar ki ag mỹ Topē vī tó mū, Israel tỹ vēnh kanhrān jafā krēm, Israel ag tỹ ti vī kri fi jé, fóg tỹ Grego ag ke gé. ⁵Kỹ Silas vỹ Macedônia tá kātī mū, Timóteo ke gé. Kỹ Paulo tóg Topē vī tó tāvī nī nī, īn tỹ kur han mǎn tū tóg nī. Israel ag mỹ tóg Jesus kāmén mū, ti tỹ tỹ Cristo nī ti.

⁶Hā ra ag tóg ti kato vī mū. Kỹ ag tóg Jesus to é he mū. Kỹ Paulo tóg ā kur rūmrūm mū, ag mỹ: “vēnh hā ki ājag tóg vāgfor kenh mū, nūgme ki vār kỹ, inferno ki,” he jé. “Ājag mỹ sóg tó, Jesus ti, hā ra ājag tóg mē jāvānh nỹti. Kỹ ājag tỹ vēsóg ki vēsýrénh ke vē. Inh hā tóg fóg ag kar mỹ tónh tĩg ha, kanhgág ag kar mỹ ke gé,” he tóg mū, Paulo ti. ⁷Hā kỹ tóg tá kutē kỹ fóg īn kára rā mū, ti jiji hā vỹ: Tício Justo, he mū. Topē kamēg ti tī. Ti īn vỹ Israel tỹ vēnh kanhrān jafā rā jē gé. Kỹ Paulo tóg ti īn kára rā mū sir.

⁸Hā ra Israel tỹ vēnh kanhrān jafā to pā'i vỹ Jesus ki rā mū, ti jyjy hā vỹ: Crispo, he mū. Ti mré ke kar vỹ Jesus ki ge mū gé, Corinto tá ke tỹ hēn ri ke ag ke gé, ag tỹ Paulo vī mē kỹ. Kỹ ag tóg kygpe kỹ nỹti sir.

⁹Kejēn Paulo tóg kuty kā nén nē vég mū. Topē tỹ ti mỹ vēnh ven vē, kỹ tóg ti mỹ: “kamēg tũg ra,” he mū. “Inh vī kāmén ra, ha mē kỹ nī tũg,” he tóg. ¹⁰“Ā mré sóg nīnh mū. Ū pi(jé) ā vóg kónān mū!” he tóg. “Cidade tag ki ū tỹ hēn ri ke ag vỹ tỹ isū nỹtīnh mū,” he tóg, Topē ti.

¹¹Kỹ Paulo tóg prỹg pir kri kysā tỹ 6 ke ki tá nī nī. Ag mỹ tóg Topē vī kāmén tī nī sir, tá.

¹²Kejēn ū tỹ Gálio he mū tóg tỹ Romano tỹ governador nī, ga tỹ Grécia ki. Kỹ Israel ag kar tóg Paulo kato vāsānsān mū. Kỹ ag tóg ti kāgmī kỹ pā'i mág mỹ ti ven mū mū. ¹³Kỹ ag tóg governador mỹ: “tag tóg ēg jykre tỹ tū! he sór mū!” he mū. “Vēnh kar tóg ti vī tugnīn Topē to jānjān tī, vēnh jykre tåg tỹ hā ra,” he ag tóg ti mỹ.

¹⁴Kỹ Paulo tóg vī sór mū, hā ra Gálio tóg Israel ag mỹ: “Israel!” he mū. “Ti tỹ nén ū kórég han mū ra sóg ājag jagfy vī tī vē, ti tỹ crime han mū ra, Paulo ti,” he tóg. ¹⁵“Hā ra ājag jykre to ājag tóg ti to jū mū, ājag jiji to, ājag vēnh rá to (mỹr). Isū pijé!, ājag tū tag ti!. Ājag hā ne tag to jykrén ke mū inhhā!. Inh pi(jé) ājag tū to jykrén sór mū!” he tóg, Gálio ti, pā'i mág ēn ti. ¹⁶Kỹ tóg ag mỹ: “ha mū jēg,” he mū sir, vī tar han kỹ.

¹⁷Kỹ tá nỹti ag tóg Sóstenes kāgmīg mū. Israel tỹ vēnh kanhrān jafā to pā'i vē. Ti kāgmī kỹ ag tóg ti mrānmrān mū, pā'i mág ēn īn tá, hā ra Gálio tóg ki ēmē sór tū nī.

Paulo tỹ Antioquia ra vỹn ke

¹⁸Kỹ Paulo tóg tá nī sir, kurā tỹ hēn ri ke ki. Kỹ tóg kejēn Jesus mré ke ag mỹ: “isīg vē ha,” he mū. Kỹ Áquila tóg ti mré tī mū, ti prū tỹ Priscila fi mré hā. Ag tỹ ga tỹ Síria ra mūnh ke vē. Cidade tỹ Cencreía tá ag tóg canoa mág ki ge sór mū, va mū jé. To hā tóg vēnh jārég mū, Paulo ti, Topē mỹ promessa han kỹ. ¹⁹Kỹ ag kar tóg canoa mág kākī cidade tỹ Éfeso ra mū mū. Hā ra Áquila fag vỹ tá nỹti, mū mǎn tū fag nī sir.

Kỹ Paulo tóg Israel tỹ vĕnh kanhrĕn jafĕ kĕra rĕ mŭ, Israel ag mrĕ vĭ jĕ. ²⁰Ag tỹ ti vĭ mĕ kỹ tá ke ag tóg ti mỹ: “ĕg mrĕ nĭ nĭ,” he mŭ.

Hĕ ra tóg ag mỹ: “hĕ ra sóg ver tĭg mŭ ha,” he mŭ. ²¹“Kĕnhmar sóg vĕn kenh ke mŭ hĕ ra, Topĕ tỹ inh vĕn kenh ke to há nĭn kỹ,” he tóg. Kỹ tóg cidade tỹ Ēfeso tá kutĕ mŭ. ²²Kỹ tóg cidade tỹ Cesarĕia tá jun mŭ. Kỹ tóg cidade tỹ Jerusalĕm ra tĭg kỹ Jesus ki ge mŭ kar vigvĕg mŭ, ũ tỹ Topĕ vĭ mĕ jĕ vĕnh mĕn tĭ ag. Kar kỹ tóg cidade tỹ Antioquia ra tĭ mŭ. ²³Tá tóg nĭ sĭ han mŭ. Kar kỹ tóg tá kutĕ kỹ ga tỹ Galĕcia mĭ kutĕ mŭ, ga tỹ Frĭgia mĭ ke gé. Jesus mrĕ mŭ ag jyvĕn tóg mŭ sir, ag tỹ tar nỹtĭ jĕ.

Apolo tỹ Topĕ vĭ tó

²⁴Kejĕn Israel ũ tóg cidade tỹ Ēfeso tá jun mŭ, ti jiji hĕ vỹ: Apolo, he mŭ. Cidade tỹ Alexandria tá tóg mur ja nĭ. Vĭ há ti nĭ. Topĕ vĭ tó tóg tĭ gé, vĕsỹ rán kỹ nĭ ĕn to tóg tar nĭ.

²⁵Ēn tóg Jesus japy ki kanhró nĭ, Jesus jamĭn ki. Mŭmĕg vĕnh nĭn kỹ tóg Jesus vĭ tó tĭ mŭ, ti tỹ to krónh ke vĕnh nĭn kỹ. Hĕ ra tóg Joĕo tỹ ag kygpĕg mŭ ĕn hĕ ki kanhró nĭ. Ēg tỹ Jesus jyyjy tó kỹ kygpe kỹ nĭ tag ki kagtĭg tóg nĭ ver.

²⁶Ēn tóg Israel tỹ vĕnh kanhrĕn jafĕ krĕm ag kanhrĕn mŭ sir, ti tỹ mŭmĕg vĕnh nĭn kỹ. Áquila fag tỹ ti vĭ mĕg kỹ fag tóg ti mỹ: “ĕg venh kĕtĭg nĭ,” he mŭ. Kỹ fag tóg ti mỹ Topĕ japy kĕmĕn kĕn mŭ, Topĕ jamĭn ti. ²⁷Kar tóg ga tỹ Grĕcia ra tĭg sór mŭ, Apolo ti. Kỹ Jesus mrĕ ke ag tóg ti mỹ: “há ti nỹ, ha tĭg ge,” he mŭ. Kỹ ag tóg Jesus mrĕ mŭ ag mỹ vĕnh rá jĕnĕg mŭ, ag tỹ ti mỹ: “kĕrĕ ra,” hen jĕ. Tá jun kỹ tóg Jesus ki ge kỹ nỹtĭ ag jyvĕn mŭ, kỹ ag tóg ti tỹ ag jyvĕn to tar han kỹ nỹtĭ nĭ sir, Topĕ tỹ ũn jagĕgtĕn mŭ ag. ²⁸Israel ag mrĕ tóg vĭ tĭ, Apolo ti, vĕnh kar jo. Ag mỹ tóg Topĕ vĭ tó tĭ, vĕsỹ rán kỹ nĭ ĕn ti. Kỹ tóg ag mỹ Cristo kĕmĕn mŭ sir. “Cristo vỹ tỹ Jesus nĭ,” he tóg mŭ ag mỹ, Apolo ti, ag mỹ Topĕ vĭ rá kĕmĕn kỹ.

Paulo tỹ cidade tỹ Ēfeso tá nĭ

19 ¹Kỹ Apolo tóg cidade tỹ Corinto tá nĭ nĭ sir. Hĕ ra Paulo tóg cidade tỹ Ēfeso tá jun mŭ. Ga ĕn mĭ tóg tĭg ja nĭgtĭ, pĕnónh kri kyjer ĕn mĭ. Kỹ tóg Ēfeso tá jun mŭ sir.

²Tá ũ ag tóg Jesus ki ge ja nĭgtĭ. Kỹ Paulo tóg ag mỹ: “ĕjag mỹ Topĕ kuprĭg tỹ jagrĕ nỹtĭ, ĕjag tỹ Jesus ki gen kĕ?” he mŭ. Kỹ ag tóg ti mỹ: “kỹ ne nĕ ge, Topĕ kuprĭg ti?” he mŭ, Paulo mỹ. ³Kỹ Paulo tóg: “ĕjag tỹ kygpe kỹ ĕjag hĕ ri kĕ?” he mŭ. Kỹ ag tóg: “Joĕo tỹ ag kygpe ri ke ti nĭ, ĕg kygpe ti,” he mŭ. ⁴Kỹ Paulo tóg: “Joĕo tóg ag kygpe ja nĭgtĭ, ag tỹ ĕjag jykre tovĕnh sór nỹtĭn kỹ,” he mŭ. “Kỹ tóg vĕnh kar mỹ kĕmĕn ja nĭ gé, ag tỹ ũ tỹ ti nón kĕtĭ ĕn ki ge jĕ, hĕ vỹ: Jesus, he mŭ,” he tóg, Paulo ti. ⁵Ag tỹ tag mĕ kỹ ag tóg ti mỹ: “Jesus jiji tó kỹ ĕg kygpe ge,” he mŭ. ⁶Kỹ Paulo tóg ĕ nĭgĕ tỹ ag mĕg mŭ, kỹ Topĕ kuprĭg tóg ag ki rĕ mŭ sir. Vĕnh vĭ ũ han ag tóg mŭ sir. Kỹ ag tóg Topĕ vĭ tó mŭ gé. ⁷Ũ tỹ 12 ag hĕn, vĕnh vĭ ũ han mŭ ĕn ag.

⁸Kỹ Paulo tóg Israel tỹ vĕnh kanhrĕn jafĕ kĕra rĕ mŭ. Ti tỹ mŭmĕg vĕnh nĭn kỹ tóg Topĕ tỹ tỹ ĕg pĕ'i nĭ kĕmĕn mŭ. Kysĕ tĕgtŭ ki tóg ag mỹ

kāmén mǔ, ag tǔ hēn ri ke mǔn ti vī kri fi jé. ⁹Hā ra ũ ag tóg ti vī to fe ũ nǔtǐ sir, ag tǔ kri fi jāvānh nǔtǐn kǔ. Kǔ ag tóg to é hen kǔ ag tóg to vī kónān mǔ, vēnh kar jo. Kǔ Paulo tóg ag mré vī mǎn tǔ nǐ sir. Jesus mré mǔ ag mǔ tóg: “vyr mǔ ěg nǔtǐ,” he mǔ. Kǔ tóg escola krēm ag kanhrān mǔ sir, kurā kar ki. Escola to professor ěn jiji hǎ vǔ: Tirano, he mǔ.

¹⁰Prǔg régre ki tóg tá nǐ nǐ, gen kǔ, Paulo ti. Hǎ kǔ ga tǔ Ásia tá ke ag kar vǔ Jesus vī mēg mǔgtǐ, Israel ag kar, fóg tǔ Grego he mǔ ag kar ke gé. ¹¹Kǔ Topē tóg Paulo mǔ vēnh jykre nǐm mǔ gé, kǔ tóg ěg tǔ nén han vānh tǔ hēn ri ke hyn han mǔ. ¹²Kejēn ag tóg Paulo kur tǔ ũn kagyga ag mēgmēg mǔ, ag tǔ há! he jé. Paulo tǔ kur mē kar kǔ ag tóg tǔ ũn kagyga ag mēgmēg mǔ. Kǔ ag tóg hághá! he mǔ. Vēnh jagrē kórég ag vǔ gen kǔ pa mǔ gé, ũn kaga ag tǔ ti kur mē kǔ.

Kujá ag

¹³Kǔ Israel ag kujá ag vǔ tá nǔtǐ gé. Kujá ěn ag tóg ěmā kar kri rǔm ke tí. Kejēn ag tóg ājag tǔ vēnh jagrē kórég ven kǔ ag tóg Jesus jyjy tó tí. Ón kǔ ag tóg tó tí. Kǔ ag tóg ũ mǔ: “Jesus jykre tǔ sóg ā kutēm ke mǔ, Paulo tǔ ũn kāmén tí ěn jykre tǔ,” he mǔ, ũn jagrē kórég mǔ. Hǎ ra ag tǔ ón kǔ Jesus jiji tó vē. Ti mré ke pijé! ¹⁴Ũ tǔ ge tó mǔ ag vǔ tǔ Israel ag nǔtǐ. Topē tǔ ki rǔr tí to pǎ!i mág krē ag vē, kǔ ti jiji hǎ vǔ: Ceva, he mǔ, ag panh jyjy ti. Ũ tǔ 7 ke ag vē, ti krē ěn ag.

¹⁵Ag tǔ ũn jagrē kórég mǔ Jesus jiji tó kǔ vēnh jagrē kórég ěn tóg ag mǔ: “Jesus ki kanhró sóg nǐ, Paulo mē inh huri ke gé, hǎ ra ājag tóg tǔ ũ nǔtǐ?” he mǔ ag mǔ, kujá ag mǔ. ¹⁶Kǔ ũn jagrē kórég ěn tóg ag to hǔm he mǔ. Ag kygrēg tóg mǔ, hǎ ra ag tóg ti tǔ hē ri ke tǔ nǐ. Kǔ ag tóg kator kǔ rinfig mǔ sir, kygvēnh kǔ. ¹⁷Kǔ Éfeso tá ke ag kar tóg mēg mǔ, Israel kar, fóg tǔ Grego ag kar ke gé. Kǔ ag tóg mǔmēgmēg mǔ sir. Kǔ Jesus Cristo jiji tóg ag mǔ tar nǐ, ag mǔ tóg nén kar kǎfór nǐ, Jesus Cristo jyjy ti.

¹⁸Kǔ Jesus ki ge kǔ nǔtǐ ag tóg ājag jykre kórég tugtó mǔ sir, jagnē mǔ. ¹⁹Ũ ag tóg curandeiro tǔ han ja nǔgtǐ, kujá tǔ ke gé. Kǔ ag tóg ājag vēnh rán gé kāmǔ mǔ, curandeiro tǔ vēnh rán ěn ti. Kǔ ag tóg kuprǔn kǎn mǔ sir, vēnh kar rǐnve. Ag tǔ ti kaja nǐkrén kǔ tóg kaja e ja nǐ, jānkamy tǔ 50 mil hǔn. ²⁰Hǎ kǔ Topē vī tóg sir vēnh kar kri rǔm ke mǔ. Kǔ ũ tǔ hēn ri ke ag tóg kri fig mǔ sir.

Éfeso tá vēnh génh

²¹Kar kǔ Paulo tóg to jykrén mǔ. Ga tǔ Macedônia mǐ tóg kutē sór mǔ, ga tǔ Grécia mǐ, Jerusalém ra tǔg jé. “Isǔ Jerusalém ra tǔg kar kǔ sóg cidade tǔ Roma ra tǔg sór mǔ gé,” he tóg, Paulo ti. ²²Kǔ tóg ga tǔ Macedônia ra ũn régre ag jēgnēg mǔ, ti mré rǎnhrāj mǔ ag, hǎ vǔ: Timóteo mré Erasto, he mǔ. Ti hǎ tóg hǎ ra ga tǔ Ásia tá nǐ nǐ ver, Paulo ti.

²³Kejēn vēnh génh tóg kutē mǔ, Jesus japry tugrǐn, ti jamǐn tugnǐn. ²⁴Ũ tóg Éfeso tá nǐ nǐ, ũ tǔ prata tǔ ĩn sǐ kǎggrá han mǔ ti, ũ tǔ topē tǔ Diana he mǔ fi jo ĩn sǐ ěn kǎggrá han mǔ ti, retrato ěn. Ũ tǔ han mǔ jiji hǎ vǔ: Demétrio, he mǔ. Ti camarada tǔ hēn ri ke ag tóg vēnh rǎnhrāj ěn ki nén há vég tí. Ag ganho vē.

²⁵Kỹ tóg ã camarada ag jé prēr kãn mũ, Demétrio ti. Ũ tỹ ã ri kén rãnrhāj mũ ag jé prēr tóg mũ gé. Ag vènh mãn kỹ tóg ag mỹ: “ha vé,” he mũ. “Vènh rãnrhāj tag ki ãg tóg nén ũ há vég mũgtĩ, ãg ganho ti. Tag ki ãg há nỹti,” he tóg. ²⁶“Hã ra Paulo tag tóg cidade tag ki tóg ũ tỹ hèn ri ke krĩn mũ sir, ga tỹ Ásia mĩ ke gé. Ag mỹ tóg: “vènh nĩgẽ tỹ han ja pi(jé) tỹ Topẽ nĩ,” he tĩ. Kỹ ag tóg ti vi kri fig mũ sir. Tag vég ãg mũ (mỹr),” he tóg. ²⁷“Kỹ ãg tỹ nén tag tóg tũ! he sór mũ sir ti tugrĩn, ãg ganho ti. Hã ra Diana fi jo ãn tóg tỹ nén ũ tũ nĩ ke gé, ti sinvi nĩ ra. Kỹ fi tóg tỹ nén ũ tũ nĩ gé sir, fi tỹ tỹ ãn mág nĩ ra. Ásia kar mĩ ag tóg fi to jãnjan tĩ, ga kar mĩ ke gé. Hã ra tóg fi tỹ tũg! henh ha, Paulo ti, ti tỹ: “vènh kãggrá pi(jé) tỹ Topẽ nĩ, hen kỹ,” he tóg, Demétrio ti, ũ tỹ fi jo ãn sĩ han mũ ãn ti.

²⁸Ag tỹ tag mẽ kỹ ag fe tóg gỹm ke mũ sir. Kỹ ag tóg jamã hár(a) prēr kỹ: “!..topẽ tỹ Diana fi vỹ kãfór ne..! !..Tỹ fi Éfeso ag tũ ne..!” he mũ sir, prẽnrẽr kỹ. ²⁹Kỹ cidade ãn ki ag vènh génh vẽ sir, kỹ vènh kar tóg ãn mág ãn ra pêtẽ mũ, ãn kri ãn tũ ãn ra. Gaio he mũ ti pére ag tóg mũ mũ, ti kãgmĩ kỹ, Aristarco ke gé. Macedônia tá ke ag vẽ. ãn ag tóg Paulo mré kãmũ ja nĩgtĩ. ãn ag kugmĩg ag tóg mũ, ag tỹ ãn mág ãn ra ag tatĩ mũ jé.

³⁰Kỹ Paulo tóg ra tĩg sór mũ, ag mré vĩ jé, hã ra ũ tỹ Jesus ki ge kỹ nỹti ag tóg ti mỹ: “tĩ tũg ra,” he mũ. ³¹Kỹ ga tỹ Ásia tá pã'i ag tóg ti mỹ vènh vĩ jènẽg mũ gé, ti tỹ ãn mág ãn ra tĩ tũ nĩ jé. Ti to ag tóg há nỹti, pã'i ag.

³²ãn mág tá ag tóg vènh mãn kỹ nỹti nĩ, ũ tỹ hèn ri ke ag. Kỹ ũ ag tóg nén ũ tó tĩ, prẽnrẽr kỹ, jó ũ ag tóg nén ũ tó tĩ, prẽnrẽr kỹ. Kỹ vènh kar tóg vĩ vĩ he kãn mũ sir. Vènh mãn kỹ ag nỹti, hã ra ag tóg: “ãg tỹ hẽ ri ke jé vènh mãn nẽ hỹn?” he mũ. ³³Kỹ Israel ag tóg vènh kar mỹ ũ ven mũ gé, Alexandre he mũ ãn. Kỹ Alexandre tóg ã nĩgẽ tỹ ge mũ, ag tỹ katy! he jé. Kỹ tóg ag mỹ kãmén sór mũ. ³⁴Kỹ ag tóg vég mũ sir, ti tỹ tỹ Israel nĩ ti, Alexandre ti. Hã ra ag tóg tỹ fóg nỹti, tá vènh mãn kỹ nỹti ag. Kỹ ag tóg Israel ag to jũgũ nỹti nĩ. Ag tỹ ti tỹ tỹ Israel nĩ ãn ven kỹ vènh kar tóg prēr pir han mũ, hã vỹ: “!..Éfeso tá ke fi tỹ vènh kar kãfór ne..! !..Diana he mũ fi vỹ vènh kar kãfór ne..!” he mũ, prẽnrẽr kỹ. Hora régre han ag tóg mũ sir, ge nỹti ki.

³⁵Governo mỹ rán tĩ ãn tóg hã ra ag fe tỹ há! he mũ. Kar kỹ tóg ag mỹ: “Éfeso tá ke!,” he mũ. “Vènh kar vỹ Diana fi ki kanhró nỹti,” he tóg. “Éfeso tá ãg tóg fi ki rĩr mũ. Fi kãggrá ãnĩ tóg kanhkã tá kãkutẽ ja nĩ. Vènh kar tóg tag ki kanhró nỹti,” he tóg. ³⁶“Ũ tóg tag kato vĩ tũ nĩgtĩ (mỹr),” he tóg. “Hã kỹ jatu ké. Krĩ rỹg tũg ra,” he tóg. ³⁷“Tag ag tatĩ ãjag tóg kãmũ ja nĩgtĩ, hã ra ag tóg topẽ fi jo ãn tá nén ũ pēju ja tũ nĩgtĩ. ãg topẽ fi to ag tóg vĩ kónãn tũ nĩgtĩ (mỹr),” he tóg. ³⁸“Demétrio mỹ ag kato vĩ sór ke mũ?” he tóg. “Vènh kãggrá han mũ ag mỹ ti mré ag vĩ kafãn sór mũ?” he tóg. “Kỹ kófa ag mỹ tómnĩ ge, vènh jyvẽn ke kurã ãn kã. Ag kato vĩmnĩ ge,” he tóg. ³⁹“ãjag tỹ hã ra nén ũ tó sór kỹ ãjag tóg ãg tũ ki kanhró nỹti. Kurã nĩm jé ãg tóg ke mũ, kỹ ãg vènh mãn kỹ venh mũ ha,” he tóg. ⁴⁰“Hã ra ãg tỹ ón kỹ vènh génh kỹ ũ ag hỹn ãg to: pã'i mág tỹ imperador kato ag tẽ sór mũ, he mũ. Nén ũ tũ to ãjag tóg vènh mãn mũ (mỹr),”

he tóg. “Ũ tỹ ěg mỹ: ne nẽ? he mũ ra ěg tỹ ne tónh ke tóg tũ tĩ,” he tóg, governo mỹ rán tĩ ti. ⁴¹Kar kỹ tóg ag mỹ: “ha mũ jẽg,” he mũ. Kỹ ag tóg mũ mũ sir.

Paulo tỹ ga tỹ Macedônia mĩ tĩg

20 ¹Vẽn kar tỹ jatu ke mãn kỹ Paulo tóg Jesus ki ge kỹ nỹtĩ ag jé prẽr mũ. Ag jyvẽn tóg mũ, kỹ tóg ag mỹ: “sỹ tĩ ma,” he mũ. Kỹ tóg ga tỹ Macedônia ra tĩ mũ. ²Kỹ tóg ga ěn mĩ tĩ mũ, kỹ tóg fĩn kutẽ mũ. Jesus ki ge kỹ nỹtĩ kar ag jyvẽn mág tóg mũ. Kỹ tóg tĩg mãn kỹ ga tỹ Grécia tá jun mũ. ³Tá tóg kysã tágtũ tũg mũ. Kỹ tóg ga tỹ Sírĩa ra vỹn ke sór mũ, canoa mág kãmĩ. Hã ra Israel ag tóg tá ti vóg kónãn sór mũ. Kỹ tóg to jykren kỹ ga tỹ Macedônia mĩ kutẽ mũ, ga tỹ Sírĩa ra vỹn ken jé. ⁴Ti mré ag tóg mũ mũ, hã vỹ: Sópattro, he mũ, Pirro kósĩn tag ti, Beréia tá ke tag ti. Kỹ Tessalônica tá Artistarco tóg ti mré tĩ mũ, Segundo ke gé. Derbe tá Gaio tóg ti mré tĩ mũ, Timóteo ke gé. Ásia tá Tíquico tóg ti mré tĩ mũ, Trófimo ke gé. ⁵Ěn ag kar vỹ ěg jo mũ mũ, cidade tỹ Trõade ra. Tá ag tóg ěg jãvãnh mũ sir. ⁶Kỹ ěg tóg cidade tỹ Filipos tá pa mũ, festa tỹ pão jẽgja tũ ke kurã kar kỹ. Kỹ ěg tóg kurã tỹ 5 (ke) tũg kỹ Trõade tá junjun mũ ag tá, ěg jo mũ ag tá. Tá ěg tóg kurã tỹ 7 (ke) tũg mũ sir.

Cidade tỹ Trõade tá

⁷Semana tỹ kurã ve ki ěg tóg vẽn mãn mũ sir, Domingo kã, Jesus jamĩ kó jé. Kỹ Paulo tóg tỹ vaj kỹ tĩg sór mũ, hã kỹ tóg ag mré vēmẽn mág mũ. Kỹ ěg tóg meia noite pětẽm mũ, vēmẽn nỹtĩn ki. ⁸Īn to jãpry jafã tá ěg nỹtĩ, kỹ něj gru tỹ hẽn ri ke tá grug kỹ nỹtĩ nĩ.

⁹Kỹ kyrũ tóg tá nĩ nĩ, ti jyjy hã vỹ: Ěutico, he mũ. Jãnkã ror kã tóg nĩ nĩ, janela kã. Hã ra tóg nũr mũ sir. Nũr sér han tóg mũ sir. Jó Paulo tóg vēmẽn jẽ nĩ. Kỹ tóg ã nũr kỹ jãnkã ror ki kutẽ mũ. Janela tágtũ tá nĩ kỹ tóg ěprã kutẽ mũ. Kỹ tóg ter ja nĩ sir, ag tỹ re kỹ, ti ve jé.

¹⁰Kỹ Paulo tóg tere mũ gé sir. Ti kri tóg pãnh ke mũ. Kỹ tóg ti kãgũg mũ, ã nĩgnó tỹ. Kỹ tóg ag mỹ: “fe kaj tũg ra,” he mũ. “Ti kuprĩg vỹ ti kãkã nĩ nĩ,” he tóg. ¹¹Kỹ tóg tãpry mũ, Paulo ti. Jesus jamĩ kãnhkrég tóg mũ sir, kỹ tóg ko mũ gé. Ag mỹ tóg vēmẽn mág han mãn mũ gé, kỹ tóg tỹ vaj mũ. Vaj kỹ tóg tĩ mũ, cidade ěn ki kutẽ kỹ, Paulo ti.

¹²Hã ra ag tóg kyrũ ěn pẽre kãmũ mũ. Rĩr tóg nĩ nĩ, kỹ ag krĩ tóg hál he mũ sir.

Cidade tỹ Mileto ra

¹³Kỹ ěg tóg ti jo canoa mág kãra ge mũ, Paulo jo. Kỹ ěg tóg cidade tỹ Assõs ra mũ mũ. Tá Paulo tóg ěg mré canoa kãra rã sór mũ gé, ti tỹ ěg mré tĩg jé. “Iso ra mũ jẽg, inh hã vỹ inh pẽn kã ra tĩ mũ,” he ja tóg nĩgtĩ, Paulo ti. ¹⁴Ěg tỹ cidade tỹ Assõs tá pa kỹ tóg ěg mré tĩ mũ gé, Paulo ti, canoa mág kãmĩ. Kỹ ěg tóg cidade tỹ Mitilene tá junjun mũ. ¹⁵Tá pa kỹ ěg tóg tỹ vaj kỹ goj vãso tỹ Quios kakãm krỹg mũ. Tỹ vaj kỹ ěg tóg goj vãso tỹ Samos to hã nũgnũr mũ, kỹ ěg tóg tỹ vaj kỹ

cidade tỹ Mileto tá junjun mũ sir. ¹⁶Paulo tóg: “Éfeso ra ěg mũnh ke tũ nĩ,” he ja nĩgtĩ. “Ěg tỹ Jerusalém kukām mũnh ke vĕ, hã kỹ ěg tóg Ásia ki nỹtĩnh ke tũ nĩ. Festa tỹ Pentecoste ki tóg sỹ Jerusalém tá nĩnh há tí,” he ja tóg nĩgtĩ, Paulo ti.

Paulo tỹ Jesus mré ke ag mré vĩ

¹⁷Mileto tá nĩ kỹ tóg Éfeso ra vĕnh vĩ jĕnĕg mũ, Paulo ti, kófa ag mỹ, Jesus ki ge kỹ nỹtĩ to pã'i ag mỹ, ag kãmũ jé. ¹⁸Ag tỹ tá junjun kỹ tóg ag mỹ: “inh ve ja ājag tóg (mỹr),” he mũ. “Inh kãtĩg ven kã ājag tóg inh vé, isỹ ga tỹ Ásia tá jun vén kã,” he tóg. ¹⁹“Ěg Senhor tỹ Jesus tỹ inh mỹ nĕn nĩm ja han isóg tí. Vĕnh kãfór han tũ sóg tí. Kejĕn sóg fỹ tí gé, sỹ vĕnh jykre pãno ven kỹ. Israel ag tóg iso jũgũ tí gé, kỹ sóg vĕsỹrĕnh tí gé,” he tóg.

²⁰“Nĕn há kar tó sóg tí ājag mỹ. Inh pi(jé) ājag mỹ tó tũ nĩgtĩ, sỹ nĕn ki kanhrãn mũ ti! Ěg vĕnh mãn ki sóg tó ja nĩgtĩ, ājag ĩn krĕm ke gé,” he tóg. ²¹“Israel ag mỹ sóg tó ja nĩgtĩ, inh mré ke ag mỹ, fóg tỹ Grego ag mỹ ke gé, ag tỹ ājag jykre tovãnh jé, Topĕ jykre han jé, Jesus Cristo ki rã jé, ěg Senhor ki. Tag tó ja sóg nĩgtĩ,” he tóg, Paulo ti.

²²“Ha vé, Jerusalém ra sóg tí mũ, Topĕ kuprĩg tỹ inh mỹ: ha tĩg, hen kỹ. Isỹ tá nĕn venh ke ki kagtĩg sóg nĩ ver,” he tóg. ²³“Hã ra Topĕ kuprĩg tóg inh mỹ tag tó tí, ha mĕ: “ã se jé ag tóg ke mũ, ã vóg kónãn jé ag tóg ke mũ,” he tóg tí. Isỹ ěmã ũ ki rã tóg inh mỹ inh vĕsỹrĕnh ke tó tí, Topĕ kuprĩg ti,” he tóg. ²⁴“Hã ra tóg inh mỹ tỹ nĕn ũ tũ nĩ. Ag tỹ isĕn ke mũ ra tóg inh mỹ tỹ nĕn ũ tũ nĩ gé. Sỹ inh rãnrãj kãn há tóg tí, Jesus Cristo tỹ inh mỹ vĕnh rãnrãj nĩm ja ěn ti, hã vỹ: sỹ vĕnh kar mỹ Jesus to vĩ sér ěn tó jé, he mũ, sỹ Topĕ tỹ ěg jagĕgtãn mũ ti tó jé, he mũ,” he tóg.

²⁵“Ha vé, inh ve mãn ke tũ ājag tóg nĩ ha, ki kanhró sóg nĩ. Ũ tỹ hĕn ri ke ag mỹ sóg Topĕ tỹ tỹ ěg pã'i nĩ tó ja nĩgtĩ, isỹ ag venh tĩg kỹ. Hã ra ag kar ěn tóg inh ve mãn ke tũ nĩ ha,” he tóg. ²⁶“Hã kỹ sóg ājag mỹ tó mũ. Ũ tỹ Jesus ki rã tũ nĩn kỹ tóg iso: inh mỹ tóg tó ja tũ nĩ, henh ke tũ nĩ,” he tóg. ²⁷“Ājag mỹ sóg tó kãn, Topĕ jykre kar tó sóg ājag mỹ. Inh pi(jé) ājag mỹ nĕn ũ tó tũg ja nĩ,” he tóg. ²⁸“Vĕnh ki rĩrmnĩ, vĕso jykrĕn kỹ. Kỹ Jesus ki ge mũ kar ag ki rĩrmnĩ gé. Topĕ kuprĩg vỹ ājag tỹ ag to pã'i hyn han, kỹ ag ki rĩr há han nĩ. Ā kyvĕnh tỹ tóg ag kygĩãm mũ mỹr, Jesus ti. Ti mỹ ag tóg tỹ ti mĕg ri ke nỹtĩ, kỹ ājag tỹ ti mĕg ěn jĕn ke,” he tóg. ²⁹“Isĩg kỹ ũ ag tóg ājag to junjun ke mũ, kỹ ag tóg mĩg ri ke nỹtĩ, ti mĕg mãn sór kỹ, hã vỹ: Jesus ki ge kỹ nỹtĩ ag kókĕn sór mũ, he mũ,” he tóg. ³⁰“Ājag kãmĩ ũ tóg vĕnh ó tónh ke mũ gé, Jesus mré mũ ag tỹ ag mré mũ kónãn han jé,” he tóg. ³¹“Kỹ vĕnh ki rĩr. Iso jykrĕn. Prỹg tãgtũ ki sóg ājag jyvĕn, kurã ki, kuty ki ke gé. Ājag kar jyvĕn sóg (mỹr). Ājag jyvĕn kỹ sóg fỹ tí gé kejĕn,” he tóg. ³²“Hã ra sóg Topĕ mỹ: ag ki rĩr, he mũ, ājag to. Topĕ vỹ ã vĩ tỹ ājag ki rĩr ke mũ gé, ti tỹ ājag jagãgtãn kỹ. Ti hã vỹ ti ki rã to ājag tar han ke mũ, Topĕ ti. Ājag mỹ tóg ěmã há tãvĩ nĩm ke mũ gé, kar kỹ, ti tũ kar ag mré hã,” he tóg, Paulo ti.

³³“Inh pi(jé) ājag mỹ: inh mỹ jãnkamy nĩm, inh mỹ kur nĩm, he mũ!” he tóg. ³⁴“Isỹ nĕn ũ génh jé sóg rãnrãj ja nĩgtĩ (mỹr), inh nĩgé tỹ. Kỹ inh rãnrãj

ki inh companheiro ag vỹ ājag tũ ti vigve ja nĩgtĩ gé inh kóm,” he tóg. ³⁵“Hã ki sóg ājag mỹ Jesus jykre ti ven mũ. Ēg rãnhràj ki ěg tũ ven kỹ ěg tóg ùn krónhkrój ag mỹ nén ù vin ke mũ gé, ěg tỹ ti jykre han kỹ. Ēg Senhor tỹ Jesus vỹ mĩ sóg ěkregĩ tí. Ti hã tóg ěg mỹ tag tó ja nĩgtĩ, kỹ tóg: “ù tỹ ěg mỹ nén ù nĩm kỹ tóg pãgsĩ nỹ,” he ja nĩgtĩ. “Há sĩ tóg nỹ. Ēg tỹ ù mỹ ěg tũ nĩm hã kỹ tóg há nỹ,” he ja tóg nĩgtĩ, Jesus ti,” he tóg, Paulo ti. Paulo tỹ ag mỹ ken hã vỹ.

³⁶Ti tỹ tó kãn kỹ tóg ā jakrĩ tỹ jẽ mũ, kỹ tóg Topẽ mré vỹ mũ, vẽn h kar to. ³⁷Kỹ ag tóg kygfỹ! he mũ. Paulo nunh jãgmỹ ag tóg ājag nĩgnó fón mũ, ti ki ag tóg nhun ke mũ. ³⁸Ag mỹ tóg e tí, ti tỹ ag mỹ: “inh ve mãn ke tũ ājag nĩ ha,” hen kỹ. Kỹ ag tóg canoa mág ra ti mré mũ mũ sir.

Jerusalém ra

21 ¹Vãhã ěg tóg ag mỹ: “ěg mũ sór vỹ,” he mũ. Ēg tỹ ag ré kỹ mũ kỹ tóg ag mỹ jagy tí. Ge ra ěg tóg tá pa mũ. Kỹ ěg tóg canoa mág kãmĩ mũ mũ, goj vãso tỹ Cós kukãm, vēsỹméri. Tỹ vaj kỹ ěg tóg goj vãso tỹ Rodes tá junjun mũ. Kar ěg tóg cidade tỹ Pátara tá junjun mũ sir. ²Tã ěg tóg canoa mág ù vėg mũ gé, ù tỹ ga tỹ Fenícia ra tí mũ ěn. Kỹ ěg tóg kãra ge kỹ kãmĩ mũ mũ sir. ³Goj vãso tỹ Chipre vėg ěg tóg mũ, ěg jakãnh tá. Kỹ ěg tóg ga tỹ Sírĩa kukãm mũ mũ. Cidade tỹ Tiro tá ěg tóg krỹg mũ. Ag tỹ canoa tỹ nén rĩnh tí ěn tỹ tá vin han ke vỹ, cidade tỹ Tiro tá. ⁴Tã ěg tóg Jesus mré mũ ag vėg mũ. Hã kỹ ěg tóg kurã tỹ 7 (ke) ki tá nỹtĩ nĩ. Topẽ kuprĩg tỹ ag krĩn kỹ ag tóg Paulo mỹ ke mũ, ti tỹ Jerusalém ra tũg tũ nĩ jé, he ag tóg. ⁵Ge ra ěg tóg kurã tỹ 7 (ke) tũg kỹ mũ mãn mũ. Hã ra ag tóg ěg mré mũ sĩ han mũ, ājag prũ fag mré hã ke gé. Cidade tá ag tóg pa mũ ěg mré, kỹ ěg tóg goj fyr tá ěg jakrĩ tỹ nỹtĩn kỹ Topẽ mré vỹ mũ. ⁶Kỹ ěg tóg: “ěg mũnh ken vỹ ha,” he mũ. Kỹ ěg tóg canoa kãra ge mũ. Jó ag tóg ājag jamã ra vỹnvỹn ke mũ gé.

⁷Kỹ ěg tóg cidade tỹ Tiro tá pa kỹ mũ mãn kỹ cidade tỹ Ptolemaida tá junjun mũ. Jesus mré ke ag vėg ěg tóg mũ sir tá. Ag mré ěg tóg kurã pir han mũ.

⁸Tỹ vaj kỹ ěg tóg tá pa kỹ cidade tỹ Cesaréia ra mũ mũ, ěg pẽn kã. Tá ěg tóg Jesus vỹ tó tí ù ĩn krēm nỹtĩ mũ, ti jiji hã vỹ: Filipe, he mũ. Û tỹ 7 (ke) ěn ag kã ù vỹ, ù tỹ vėjẽn vẽn kãpópãm mũ ěn ag kã ù vỹ. ⁹Ti kósĩn fag vỹ tỹ 4 (ke) nỹtĩ, ùn mèn ja tũ fag. Ēn fag vỹ Topẽ vỹ tó mũgtĩ.

¹⁰Si há tũ tá Judéia tá ke ù tóg kãtĩ mũ, ù tỹ Topẽ vỹ tó tí ti, ti jyjy hã vỹ: Ágabo, he mũ. ¹¹Ēn tóg ěg tá jun kỹ Paulo vėsógfĩn ja tỹ ā nĩgẽ sigsėg mũ, ā pẽn ke gé. Kỹ tóg: “Topẽ kuprĩg tỹ tón hã vỹ, ha mē: ù tỹ vėsógfĩn ja tag tỹ tũ nĩ ěn vỹ se kỹ jẽn h mũ,” he mũ. “Israel ag vỹ ti senh mũ, kỹ ag tóg fóg ag mỹ ti fėg mũ, he tóg, Topẽ kuprĩg ti,” he tóg, Ágabo ti.

¹²Ēg tỹ tag mē kỹ ěg tóg Paulo mỹ: “Jerusalém ra tí tũg nĩ,” he mũ. Kỹ tá ke ag tóg ge mũ sir ěg mré. ¹³Hã ra Paulo tóg: “ājag hã ne tóg kygfỹ! he mũ!” he mũ. “Inh fe kaj han ājag tóg mũ,” he tóg. “Ag tỹ ise sór nỹtĩn kỹ tóg inh mỹ tỹ nén ù tũ nỹ gé, ag tỹ Jerusalém tá inh vóg kónãn sór kỹ, ěg Senhor tỹ Jesus tugnĩn,” he tóg, Paulo ti.

¹⁴Ēg vī mẽ jāvānh tóg nī. Kǵ ěg tóg vī mǎn tũ nī sir. “Jesus tǵ nén han mũ vỹ tóg há nī,” he ěg tóg mũ sir. ¹⁵Kar kǵ ěg tóg nén kar kǎn mũ. Kǵ ěg tóg Jerusalém ra mũ mũ. ¹⁶Cesaréia tá ke ũ ag tóg ěg mré mũ mũ gé, Jesus mré ke ũ ag. Ēg mǵ ag tóg ũ ven mũ, ěg tǵ ti ĩn krēm nǵtǵ jé. Tǵ jǵi hǎ vỹ: Menasom, he mũ. Goj vǎso tǵ Chipre tá ke vė. Vǎsỹ tóg Jesus ki rǎ ja nǵtǵ. Ēg tǵ ti ĩn krēm nũgnũr ke vė.

Paulo tǵ Tiago mré vėmėn

¹⁷Ēg tǵ Jerusalém tá junjun kǵ Jesus mré ke ag fe tóg mrin ke mũ sir.

¹⁸Tǵ vaj kǵ Paulo tóg ěg mré Tiago venh tǵ mũ. Kǵ kófa ag kar tóg tá vėnh mǎn mũ gé. ¹⁹Ag mǵ tóg: “ǎjag mǵ há?” he mũ. Kǵ tóg ag mǵ Topė tǵ nén han kar tugtó mũ. Tugtó kǎn tóg mũ, Topė tǵ fóg kar krĳn mũ ti, ti tǵ ag mǵ Topė vỹ tón kǵ. ²⁰Ag tǵ mẽ kǵ ag tóg Topė mǵ vỹ há han mũ. Kǵ ag tóg Paulo mǵ: “régre!” he mũ. “Israel tǵ hėn ri ke ag vỹ Jesus ki ge kǵ nǵtǵ, ũ tǵ mil tǵ hėn ri ke ag. Ēn kar tóg Moisés tǵ ěg mǵ vėnh jykre nĳm ja han (ka)mė nǵtǵ!” he ag tóg. ²¹“Hǎ ra ũ ag tóg ag mǵ ǎ to ón ja nǵtǵ. ǎ to ag tóg: “Israel kar krĳn kónǎn tóg tǵ,” he tǵ. “Israel tǵ fóg mǵ mũ kar krĳn kónǎn tóg tǵ, ag tǵ Moisés tǵ ěg mǵ nén nĳm ja tovānh jé,” he ag tóg tǵ ǎ to, ón kǵ. ǎjag krė grė junun fǎr kym tũg nī, he ǎ nėji tǵ. Moisés tǵ ěg mǵ nén nĳm ja hǎn mǎn tũg nī, he ǎ nėji tǵ,” he ag tóg, Paulo mǵ. ²²“Kǵ ěg ne han mũ ha?” he ag tóg. “Ū tǵ hėn ri ke ag vỹ vėnh mǎn ke mũ, ag tǵ ǎ kǎtig mėn kǵ,” he ag tóg, Paulo mǵ. ²³“Tag hǎ han jé ǎ tóg ke mũ, ha mẽ. Ū tǵ 4 (ke) ag vỹ ki nǵtǵ ěg mré, Topė mǵ promessa han mũ ag,” he ag tóg. ²⁴“Ag mǵ: “inh mré nǵtĩmnĩ,” hemnĩ. Ag mré vėnh jǎnhkri han nī, ěg jykre ki. Ag tǵ vėjǎrėg mũ kǵ ag jo kajǎm nī. Hǎ kǵ vėnh kar tóg ǎ jykre ki kanhró nǵtǵ sir. Ū ěn ag tǵ ǎ to ón mũ ve jé ag tóg ke mũ, ǎ tǵ Moisés tǵ ěg mǵ nén nĳm ja ěn han kǵ,” he ag tóg mũ, Tiago ag, Paulo mǵ.

²⁵“Jó ěg tóg fóg ag tǵ Jesus ki ge mũ ag mǵ vėnh rá jėnė ja nǵtǵ, kanhgág ag mǵ ke gé. Ū tǵ Israel jykre han tũ kar to ěg tóg jykrėn, kǵ ěg tóg ag mǵ vėnh rá ěn jėnė ja nī. Ag mǵ ěg tóg: Moisés tǵ ěg mǵ nén nĳm ja ěn han ke tũ ǎjag nī, he ja nǵtǵ. ǎjag tǵ nén han ken hǎ vė, ha mẽ: vėnh kǎgrǎ to festa ko tũg nī, retrato to festa ěn. Nén ũ kyvėnh ko tũg nī gé. Nén tǵ vėsóg ki ter ja ěn ko tũg nī gé. ǎjag prũ tũ fag mré nỹ tũg nī gé, he ja ěg tóg nǵtǵ ag mǵ, ũ tǵ Israel jykre han tũ ag mǵ,” he ag tóg, kófa ag, Paulo mǵ.

²⁶Kǵ Paulo tóg ũ tǵ 4 (ke) ěn ag mǵ: “inh mré nǵtĩmnĩ,” he mũ, ũ tǵ promessa han mũ ag mǵ. Tǵ vaj kǵ tóg ag mré vėnh jǎnhkri mũ, Israel ag jykre ki. Kǵ tóg Topė jo ĩn to tũg kǵ ũ tǵ ki rĳr tǵ ag mǵ: “ag mré sóg vėnh jǎnhkri mũ,” he mũ sir. Ag mǵ tóg kurǎ nĳm, Paulo ti, ag tǵ kurǎ ěn kǎ Topė mǵ ti tũ pũn jé, ũ tǵ 4 (ke) ag jo, Topė tũ ki rĳr tǵ ag. Kurǎ ěn to hǎ ag tóg vėnh jǎnhkri tǵ, kurǎ tǵ 7 (ke) ki, promessa han mũ ag.

Ag tǵ Paulo se

²⁷Kǵ tóg kurǎ tǵ 7 (ke) ěn tũ ken kǵ Israel tǵ ǎsia tá ke ag tóg Topė jo ĩn tá ti vėg mũ sir, Paulo ti. Kǵ ag tóg vėnh gėnh mág han mũ. Ti kǎmĳ ag tóg

mũ, kŷ ag tóg prĕnprĕr mũ sir. ²⁸“!..Israel kar, kāmũ jĕg ra..!” he ag tóg. “!.. Ũn gré ěn ve ra..! !..Ũ tŷ vĕnh kar krĭn kónĀn mũ ěn ve ra..! !..Ĕg povo to tóg vĭ kónĀn mo..! !..Moisés tŷ ěg mŷ nĕn nĭm ja to..! !..Topĕ jo ĩn to tóg vĭ kónĀn mo..! !..Kŷ tóg fóg ag mŷ: Topĕ jo ĩn kĀra ge jĕg, he ja ne..! !..HĀ kŷ tóg Topĕ jo ĩn kavĕnh mo..!” he ag tóg, prĕnprĕr kŷ, Paulo to. ²⁹Fóg tŷ Trófimo ěn ve ja ag tóg nĭgtĭ, Ēfeso tá ke ěn, Paulo mré tĭ mũ ěn. Jerusalém tá ag tóg ti ve ja nĭgtĭ, kŷ ag tóg ón kŷ: “Paulo hŷn ti pére vyr, Topĕ jo ĩn kĀra,” he mũ.

³⁰Kŷ cidade ěn tá ke kar ag vŷ vĕnh génh mũ sir, jŷgju kŷ. Ag tŷ Paulo kĀgmĭ kŷ ag tóg Topĕ jo ĩn kĀtá ti kutĕm mũ. Kŷ ũ tŷ ki rĭr tĭ ag tóg Topĕ jo ĩn nĭgfĕnh mũ sir. ³¹Kŷ ag tóg ti rĕg mũ, Paulo ti.

HĀ ra soldado ag pĀi vŷ mĕg mũ, major ti, Jerusalém tá ke kar ag tŷ vĕnh génh kŷ. ³²Kŷ tóg soldado ag jé prĕr kŷ, ag pĀi jé prĕr kŷ tóg ag to pétĕ mũ. Ag tŷ soldado ag ve kŷ, ag tŷ major ve kŷ ag tóg sir krŷg he mũ, Paulo rĕn kŷ. ³³HĀ ra major tóg tá jun mũ. “Ti kĀgmĭ ra,” he tóg, soldado ag mŷ. “Ti se ra, ferro régre tŷ,” he tóg. “Ũ nĕ?” he tóg. “Ti tŷ ne han nĕ?” he tóg, vĕnh kar mŷ, major ti. ³⁴HĀ ra ũ ag tóg ti mŷ nĕn ũ tó, kŷ ũ ag tóg ti mŷ nĕn ũ tó, kŷ tóg ki kanhrĀn tũ nĭ sir. Kŷ tóg soldado ag mŷ: “ĕg ĩn kĀra ti rĀg,” he mũ.

³⁵Ag tŷ sĀnsĀn he jafĀ tá junjun kŷ ag tóg ti vĀg mũ. Vĕnh kar tŷ ti to vĕnh génh kŷ ag tóg ti vĀg mũ, ag tŷ ti kĀ kyn ke jé. ³⁶Vĕnh kar tóg ag nón mũ kŷ: “!..ti rĕ ra..!” he mũ, prĕnprĕr kŷ.

Paulo tŷ ag mŷ vĕnh kĀmén mũ

³⁷Ag tŷ ĩn kĀra ti rĀg sór kŷ Paulo tóg major mŷ: “sŷ Ā mré vĕmén há tóg tĭ,” he mũ. Grego vĭ ki tóg ti mŷ ke mũ. Fóg tŷ major vĕ, hĀ kŷ tóg Grego vĭ hĀ tó tĭ.

³⁸Kŷ major tóg ti mŷ: “Ā hĀ ne tóg Grego vĭ tó há nĭ!” he mũ. “Kŷ Ā mŷ tŷ Egito tá ke ěn tũ nĭ, ũ tŷ kurĀ ěn kĀ vĕnh génh han mũ ěn!, ũ tŷ mil tŷ 4 (ke) mré tĭ mũ ěn, governo kato tĕ mũ ěn ag mré, ĕmĀ tũ mĭ tĭ mũ ěn?” he tóg, Paulo mŷ, major ti.

³⁹Kŷ Paulo tóg ti mŷ: “hŷ,” he mũ. “Tŷ sóg Israel nĭ,” he tóg. “Tŷ sóg cidade tŷ Tarso tá ke nĭ. Ga tŷ Cilícia tá cidade mág kĀfór vĕ, inh mur ja ti. Isŷ povo tag mré vĭnh há tóg tĭ,” he tóg, Paulo ti, major mŷ. ⁴⁰Kŷ tóg ti mŷ: “ha vĭ ge,” he mũ.

Kŷ Paulo tóg sĀnsĀn he jafĀ kri jĕ kŷ ag mŷ ke mũ sir. Hebreu vĭ ki tóg ag mŷ ke mũ, kŷ tóg:

22 ¹“inh kanhkĀ!,” he mũ. “Ijóg!,” he tóg. “Isŷ Ājag mŷ inh jykre kĀmén ke vĕ, ki ĕmĕ,” he tóg ag mŷ.

²Kŷ ag tóg ti tŷ Hebreu vĭ ki ag mŷ vĭ mĕg mũ sir, kŷ ag tóg katy! he mũ sir.

³Kŷ tóg ag mŷ: “tŷ sóg Israel nĭ,” he mũ. “Cidade tŷ Tarso tá inh mur, ga tŷ Cilícia tá. Cidade tag ki sóg hĀ ra mog mũ, kŷ Gamaliel tóg inh kanhrĀn. Inh mŷ tóg ĕg jóg!jóg ag jykre tó kĀn, kŷ sóg to tar ja nĭ. Topĕ jykre to sóg tar tĀvĭ ja nĭgtĭ, Ājag tŷ ũri han mũ ri kĕn,” he tóg. “Topĕ jykre hŷn, he sóg tĭ gé, ĕg jykre ěn to, hĀ ra sóg kygnĕ. ⁴HĀ kŷ sóg Jesus mré mũ ag to jũ tĀvĭ ja nĭgtĭ. Ag kĀgtĕn sór ja inh nĭgtĭ, ũn tĀtĀ fag ke gé. Ag sigse ja sóg nĭgtĭ, vĕse ja kĀki sóg ag vĀm ja nĭgtĭ gé. ⁵Topĕ tũ ki rĭr tĭ to pĀi mág vŷ ki kanhró nĭ, kófa ag kar ke

gé. Ag hã tóg inh m̄y permissão han ja nĩgtĩ, s̄y cidade t̄y Damasco ra tĩg jé, tá ěg mré ke ag m̄y ven jé. Tá sóg Jesus mré ke ag sigse sór ja nĩ gé, Jerusalém ra ag tatĩ kãtĩg jé, tag ki ag vóg kónãn jé,” he tóg, Paulo ti.

Paulo t̄y ã t̄y Jesus ki rã kãmén

(Hk 9.1-19; 26.12-18)

6“Isĩg k̄y sóg Damasco tá jun m̄. K̄y tóg vãhã vẽnh jẽngrẽ tar tãvĩ tóg vãhã inh ki kómkóm ke m̄. Kanhkã tá ke vẽ, vẽnh jẽngrẽ tag ti. Rã t̄y ěg nĩno kã sa ra tóg ke m̄. 7K̄y sóg kutẽ m̄. K̄y sóg vẽnh vĩ m̄eg m̄, k̄y tóg inh m̄y: “Saulo! Saulo!, ã t̄y ne jé isũ ag vóg kónãn nẽ?” he m̄, vẽnh vĩ ti. 8K̄y sóg ěg Senhor m̄y: “ã t̄y ù nẽ?” he m̄. K̄y tóg inh m̄y: “t̄y sóg Jesus nĩ, Nazaré tá ke ěn,” he m̄, “ã t̄y ùn vóg kónãn sór tí ěn hã v̄y t̄y inh nĩ,” he tóg inh m̄y. 9Inh mré m̄ ag v̄y vẽnh jẽngrẽ ěn vigvég m̄. Hã ra ag tóg ù t̄y inh m̄y vĩ m̄ m̄eg tũ nĩ.

10K̄y sóg ěg Senhor ti m̄y: “k̄y s̄y hẽ ri kenh ke nẽ?” he m̄. K̄y tóg inh m̄y: “jẽg nẽ ra,” he m̄. “Damasco ki rã. Tá ù tóg ã m̄y tó kãn m̄, ã t̄y nén han ke ti,” he tóg inh m̄y, vẽnh vĩ ti. 11Hã ra sóg nén ù vég tũ nĩ, vẽnh jẽngrẽ ěn tar tãvĩ nĩn k̄y. K̄y inh mré m̄ ag tóg inh nĩgẽ kãgmĩ k̄y inh pére m̄ m̄. Hã ki ěg tóg Damasco tá junjun m̄ sir.

12K̄y ù t̄y Ananias he m̄ ěn tóg inh venh kãtĩ m̄. Moisés t̄y ěg m̄y vẽnh jykre nĩm ja ěn han kãn tóg nĩgtĩ, Ananias ti. Damasco tá ke kar v̄y ti to vĩ há han m̄gtĩ, Israel ěn ag kar. 13Ěn tóg inh venh kãtĩ m̄, k̄y tóg iso jun k̄y inh m̄y: “régrẽ!” he m̄. “Saulo!” he tóg m̄. “Inh ki ěvãnh ra,” he tóg. K̄y sóg v̄es̄ymér ti vég m̄ sir. 14K̄y tóg inh m̄y: “ẽg jóg!jóg ag t̄y Topẽ v̄y ã kuprẽg, vãs̄y,” he m̄, “ã t̄y ti jykre ki kanhró nĩ jé, ã t̄y ùn kuryj nĩ ěn ve jé, Cristo ěn. Ti hã tóg ã mré vĩnh m̄,” he tóg inh m̄y, Ananias ti. 15“Ã t̄y vẽnh kar m̄y ã t̄y nén vég m̄ tónh ke vẽ, ã t̄y nén m̄eg m̄ ti,” he tóg inh m̄y. 16“K̄y ěmẽ k̄y nĩ tũg nĩ. Jẽg nẽ ra, ã t̄y kype k̄y jẽ jé, Topẽ t̄y ã t̄y ti vĩ mranh t̄y tũ! he jé. Ti mré vĩ, ti jiji tó k̄y,” he tóg inh m̄y, Ananias ti,” he tóg, Paulo ti.

Paulo t̄y ã rãnrãj kãmén

17“Is̄y Jerusalém ra v̄yn ke k̄y sóg Topẽ jo ìn krẽm ti mré vĩ m̄. K̄y sóg nén nẽ vég m̄. 18Ti hã vẽ, ěg Senhor hã vẽ. K̄y tóg inh m̄y: “kur Jerusalém tá kutẽ,” he m̄. “Ã vĩ m̄enh ke tũ ag nĩ, ã t̄y ag m̄y inh kãmén m̄ ra,” he tóg inh m̄y.

19K̄y sóg ěg Senhor ti m̄y: “hã ra ag tóg is̄y nén han ja ki kanhró n̄tĩ,” he m̄. “Ag sigse han ja isóg tũgtĩ. Vẽnh kanhrãn jafã krẽm sóg ag mrãnrãn ja tũgtĩ gé, ù t̄y ã ki ge k̄y n̄tĩ ag,” he sóg ti m̄y. 20“K̄y sóg ag t̄y Estêvão tén k̄y, ag t̄y ù t̄y ã vĩ tó m̄ ěn tén k̄y sóg tá jẽ ja nĩ gé, k̄y tóg inh m̄y há ja tĩ, ag t̄y ti tén k̄y. Ag kur ki sóg rĩr ja nĩgtĩ gé, ù t̄y Estêvão tén m̄ ag kur ki,” he sóg, ěg Senhor m̄y.

21Hã ra tóg inh m̄y: “vó, ha tũg,” he m̄. “Kór há ra sóg ã jẽnẽnh m̄, kuvar há ra. Fóg kar to sóg ã jẽnẽnh m̄, kanhgág kar to ke gé,” he tóg inh m̄y,” he tóg, Paulo ti.

22Hã ra vẽnh kar ěn ag tóg ěmẽ k̄y n̄tĩ nĩ. Ag t̄y ti vĩ tag m̄ k̄y ag tóg prẽnrẽr m̄ sir. “!..Ti tén ra..!” he ag tóg. “!..Û t̄y ge v̄y kórég ne..!” he ag

tóg. “!..Ti rīr nīn kŷ tóg ěg mŷ tŷ ũ nŷnh mo..!” he ag tóg. ²³Prēnprēr ag tóg mŷ. Ājag kur vām ag tóg mŷ, ga funfur han ag tóg mŷ sir. Ag jŷgŷj vĕ.

²⁴Kŷ major vŷ: “īn kĀra ti rĀg,” he mŷ. “Nĕn fĀr tŷ ti mrĀnmrĀn, cavalo tŷ mrĀn ke jafĀ ri ke ěn tŷ. HĀ tŷ ti ki jĕmĕ. Ag tŷ hĕ ri ke jĕ Ā to vĭ kŏnĀn nĕ? hemnĭ ti mŷ,” he tóg, major ti, soldado ag mŷ. Major tóg Paulo tŷ ag mŷ nĕn tŏ ja ěn mĕ ja tŷ nĭ, ti tŷ Hebreu ag vĭ ki kagtĭg nĭn kŷ. HĀ kŷ tóg soldado ag mŷ: “ti ki jĕmĕ,” he mŷ sir.

²⁵Kŷ ag tóg ti sĕg mŷ, nĕn fĀr tŷ, ag tŷ ti mrĀnmrĀn jĕ. HĀ ra Paulo tóg capitĀo mŷ, ũ tŷ tĀ jĕ ěn mŷ tóg: “mŷ Ā mŷ kuryj, ag tŷ inh mrĀnmrĀn ke ti?” he mŷ. “Tŷ sŏg Romano nĭ, hĀ ra ag tóg nĕn fĀr tŷ inh mrĀnmrĀn sŏr mŷ, ũ tŷ inh ki jĕmĕg tŷ ra, ag tŷ inh jyvĕn tŷ ra,” he tóg, Paulo ti. ²⁶Kŷ tóg capitĀo mŷ e tĭ, kŷ tóg major mŷ tŏnh tĭ mŷ. Ti mŷ tóg: “Ā tŷ ne han ke nĕ ha?” he mŷ. “Romano vĕ mŷr,” he tóg ti mŷ. ²⁷Kŷ major tóg ti to kĀtĭ mŷ, kŷ tóg ti mŷ: “kŷ Ā mŷ tŷ Romano nĭ?” he mŷ. Kŷ Paulo tóg: “hŷ,” he mŷ. ²⁸Kŷ major tóg ti mŷ: “isŷ tŷ Romano nĭ jĕ sŏg jĀnkamy tŷ hĕn ri ke tŷ kajĀm,” he mŷ ti mŷ. Kŷ Paulo tóg ti mŷ: “inh mur kĀ sŏg ge nĭ hĀ ra, inh panh ri kĕn,” he mŷ. ²⁹Kŷ ag tóg ti tovĀnh mŷ sir, ũ tŷ ti mrĀnmrĀn ke mŷ ěn ag. HĀ ra tóg major mŷ e tĭ, ti tŷ ti se kŷ. Ti tŷ ũn Romano senh ke tŷ vĕ vĕ, hĀ kŷ tóg ti mŷ e tĭ.

Israel tŷ pĀ'i ag tŷ Paulo vĭ mĕg mŷ

³⁰Tŷ vaj kŷ major tóg Israel ag ki jĕmĕ mĀn sŏr mŷ, ag tŷ hĕ ri ke kŷ Paulo to jŷ mŷ ti. Kŷ tóg ti kavĀn mŷ. Kŷ tóg Topĕ tŷ ki rĭr tĭ to pĀ'i mĀg ag jĕ prĕr mŷ, vĕnh jyvĕn tĭ kar ag ke gĕ. Kŷ tóg Paulo pĕre tĭ mŷ, ag jo ti fĕg jĕ.

23 ¹Kŷ Paulo tóg vĕnh jyvĕn ti ag vĕg mŷ, kŷ tóg: “inh kanhkĀ,” he mŷ. “Vĕnh jykre hĀ kar han isŏg nĭgtĭ (mŷr), kurĀ kar ki, ũri ke gĕ, isŷ Topĕ mĭ ěkrĕn kŷ,” he tóg.

²Kŷ Topĕ tŷ ki rĭr tĭ to pĀ'i mĀg tóg ke mŷ, ũ tŷ Ananias he mŷ ěn vŷ: “ti jĕnky ki tĀnh,” he mŷ, ti jy nŷtĭ ag mŷ.

³Kŷ Paulo tóg ti mŷ: “Topĕ vŷ Ā tĀnh ke mŷ,” he mŷ. “Jykre rĕgre Ā nĭ, kŷ Ā tóg tŷ ĩn to rŏ ri ke nĭ. ěg tŷ tinta kupri tŷ to tĭn kŷ ěg tóg ti kŏrĕg vĕg tŷ nĭgtĭ, tinta krĕm ti kŏrĕg ti,” he tóg. “Inh jyvĕn sŏr Ā tóg mŷ, Topĕ jykre ki, hĀ ra Ā hĀ tóg Topĕ jykre mranh, Ā tŷ ag mŷ: ti tĀnh ra, hen kŷ,” he tóg, Paulo ti.

⁴Kŷ tĀ nŷtĭ ag tóg ti mŷ: “Ā hĀ tóg Topĕ camarada mŷ vĭ kŏnĀn, Topĕ tŷ ki rĭr tĭ to pĀ'i mĀg mŷ,” he mŷ, Paulo mŷ. ⁵Kŷ Paulo tóg: “mĕi,” he mŷ. “Ti tŷ tŷ pĀ'i mĀg nĭn ki sŏg kagtĭg ja nĭ, ke tŷ nĭ mŷ ra sŏg ti to vĭ kŏnĀn ja tŷ nĭ vĕ,” he tóg. “Topĕ vĭ ki tag tóg rĀn kŷ nĭ nĭ, hĀ vŷ: Ā povo tŷ pĀ'i mĀg to vĭ kŏnĀn tŷg nĭ, he mŷ,” he tóg, Paulo ti.

⁶HĀ ra Paulo tóg ag vĕg mŷ, vĕnh jyvĕn tĭ ag. Ũ ag tóg tŷ Saduceu nŷtĭ, kŷ ũ ag tóg tŷ Fariseu nŷtĭ. Vyrmy ag jykre nŷtĭ. Kŷ Paulo tóg jamĀ hĀr(a) ke kŷ ag mŷ: “inh kanhkĀ,” he mŷ. “Tŷ sŏg Fariseu nĭ, kŷ inh panh tóg tŷ Fariseu nĭ gĕ,” he tóg. “Topĕ vŷ ũn ter mŷ ag rĭnrĭn mĀn ke mŷ. Tag vŷ inh mŷ ki hĀ ke nĭ, hĀ kŷ Ājag tóg iso jŷgŷj mŷ,” he tóg, Paulo ti.

7Ti tỹ tag tó kar kỹ vĕnh jyvĕn tĩ ag tóg vĕnh kĀpugpóv kỹ nỹtĩ. Fariseu ag tóg Saduceu ag mré vĩ jũgũ han mũ, jagnĕ vĩ kafĀn kỹ. 8Saduceu ag mỹ tóg tũ tĩ, Topĕ tỹ ěg ter mũ rĩn mĀn mũ ti. Topĕ tỹ jĕnĕ jafĀ tóg ag mỹ tũ tĩ gé. Kỹ vĕnh kuprĩg tóg ag mỹ tũ tĩ gé. HĀ ra Fariseu ag mỹ tóg nỹtĩ, vĕnh kuprĩg, Topĕ tỹ jĕnĕ jafĀ, ti tỹ ěg rĩn mĀn mũ ke gé. HĀ kỹ ag tóg jagnĕ vĩ kafĀn mũ sir. 9Kỹ ag tóg jagnĕ to jũgũ kỹ prĕnprĕr mũ. Fariseu ag kĀmĩ ũ ag tóg jĕg nĕ nĕ kỹ, Saduceu vĩ kafĀn kỹ ag tóg: “nĕn ũ kórég han tũ ti nĩ, Paulo ti,” he mũ. “Hĕn ri ke mũn ti hỹn nĕn nĕ ve ja nĩ, vĕnh kuprĩg hĕn ri ke mũn, ke tũ nĩ kỹ Topĕ tỹ jĕnĕ jafĀ,” he ag tóg, Fariseu ag, Topĕ vĩ to professor ag. 10Kỹ vĕnh génh tóg kutĕ mũ ve nĩ. Kỹ major tóg Paulo to jykrĕn mũ. “Ag hỹn gen kỹ ti janjĀn ke mũ, ti jónjĀn kỹ,” he tóg, vĕnh génh ven kỹ. Kỹ tóg soldado ag mỹ: “kur mũ jĕg, ti kĀgmĩ jé, ěg ĩn kĀra ti rĀg jé,” he mũ, major ti. Kỹ ag tóg ĩn kĀra ti rĀg mũ.

11Tỹ kuty kỹ Jesus tóg Paulo mré vĩ mũ. “Kamĕg tũg ra,” he tóg ti mỹ. “Jerusalém tá Ā tóg inh vĩ tó há han. Ge jé Ā tóg ke mũ, cidade tỹ Roma tá,” he tóg, Paulo mỹ, Jesus ti.

Ag tỹ Paulo tén sór

12Tỹ vaj kỹ Israel ag tóg vĕnh mĀn mũ sir. Jagnĕ mré ag tóg jykrĕn mũ. “Paulo tén jé ěg tóg ke mũ,” he ag tóg. “Jĕn ke tũ ěg nĩ, kron ke tũ ěg nĩ gé, ěg tỹ Paulo tén ke jo, ke tũ nĩ mũ ra Topĕ jé ěg vóg kónĀn,” he ag tóg. 13Ũ tỹ 40 (ke) kĀfór vĕ, jagnĕ mré jykrĕn mũ ag. 14Ēn ag vỹ Topĕ tũ ki rĩr tĩ to pĀli mág ag mré vĩnh kĀmũ mũ, kófa ag mré hĀ. “Jagnĕ mré ěg jykrĕn,” he ag tóg. “Nĕn ũ kĀmĕnh ke tũ ěg nĩ, ěg tỹ Paulo tén ke jo, ke tũ nĩ mũ ra Topĕ jé ěg vóg kónĀn,” he ag tóg. 15“Kỹ major mré vĩnh mũmnĩ. Vĕnh jyvĕn tĩ ag mré mũmnĩ, Ājag tỹ ti mré vĩ jé. Ti mỹ: ěg tỹ ti tỹ nĕn ũ kórég han mũ to jykrĕn mĀn ke vĕ, hemnĩ, hĀ to ěg mỹ ti ven mĀn nĩ, hemnĩ ti mỹ. Ti tỹ: hej, hen kỹ ěg tóg ti tén ke mũ, kỹ tóg Ājag to jun ke tũ nĩ,” he ag tóg, pĀli ag mỹ.

16HĀ ra Paulo ve fi kósĩn tóg ag tỹ han sór mũ ěn mĕg mũ. Kỹ tóg soldado jo ĩn kĀra rĀ kỹ Paulo mỹ tó mũ. 17Kỹ Paulo tóg capitĀo ũ jé prĕr kỹ ti mỹ: “major mỹ kyrũ tag pére tĩg, ti tỹ ti mỹ nĕn ũ tó jé,” he mũ ti mỹ.

18Kỹ tóg ti pére tĩ mũ sir, major to. Kỹ tóg ti mỹ: “ũ se kỹ jĕ ěn tóg, Paulo ěn tóg inh jé prĕr,” he mũ, “kỹ tóg inh mỹ: “kyrũ tag tỹ major mỹ ti pére tĩg,” he mũ. Ti tỹ nĕji Ā mré vĩ sór nĕ,” he tóg, capitĀo ti.

19Kỹ major tóg ti nigé kĀgmĩ kỹ ti pére tĩ mũ, vĕnh péju kỹ. Kỹ tóg ti mỹ: “Ā hĕ ri ké?” he mũ.

20Kỹ tóg ti mỹ: “Israel ag tóg to jykrĕn, ag tỹ Ā mỹ to vĩ jé, Ā tỹ vaj kỹ Paulo jĕnĕ jé, vĕnh jyvĕn tĩ ag to. Ón kỹ ag tóg Ā mỹ: “ti ve mĀn jé ěg tóg ke mũ, ěg tỹ ti to jykrĕn mĀn jé,” hĕnh ke mũ. HĀ ra ag ón vĕ,” he tóg, major mỹ. 21“Ag mỹ: hej, he tũg nĩ. Ũ tỹ 49 (ke) ag tóg, ti jo vĀjig mũ. Jagnĕ mré ag jykrĕn, ag tỹ nĕn ũ konh ke tũ nĩ jé, kron ke tũ nĩ jé, ti tén ken jo. “Ke tũ nĩ mũ ra Topĕ jé ěg vóg kónĀn,” he ag tóg. Ēn ag tóg Ā tỹ ag mỹ: hej, hĕnh ke jĀvĀnh mũ sir,” he tóg, kyrũ ti, major mỹ.

22Kỹ major tóg ti mỹ: “ũ mỹ: ti mỹ sóg tó, he tũg nĩ,” he mũ. “Ha jatun mỹ tĩg,” he tóg ti mỹ.

Major tỹ Paulo jĕnĕnh ke, pã'i mág tỹ governador ra

23Kỹ major tóg capitão régre ag mỹ: “kãmũ jĕg ra,” he mũ. Kỹ tóg ag mỹ: “ãjag tũ kãnkã ra,” he mũ. “Cidade tỹ Cesaréia ra ãjag mũnh mũ, kuty tag kã 9 horas ki. Kỹ soldado tỹ 200 (ke) ag vỹ mũnh mũ, cavalo kri mũ ag tỹ 70 (ke) ag ke gé, kỹ ù tỹ 200 (ke) ù ag vỹ rógro pu gég mũnh mũ,” he tóg. 24“Kỹ cavalo ù ag vỹ mũnh ke mũ gé, Paulo tỹ kri nĩ jé. Governador tỹ Félix to ti pére mũ jĕg, tĩ tỹ jatun mỹ tá jun jé,” he tóg, major ti, capitão ag mỹ.

25Kỹ tóg pã'i mág tỹ Félix mỹ rán mũ, major ti, kỹ tóg:

26“Cláudio Lísias tỹ rá vĕ,” he mũ. “Isỹ Governador tỹ Félix mỹ rán hã vĕ, ã tỹ inh kãfór nĩn kỹ. ã mỹ sóg: ã mỹ há? he mũ,” he tóg.

27“Tag vỹ tỹ Israel ag vĕse jĕ. Ti tén kren ag tóg. Hã ra sóg ti tỹ tỹ Romano nĩ jĕmĕ, kỹ sóg inh soldado ag mré ti kren han. 28Hã ra sóg ti kato tĕ mũ ag ki jĕmĕ sór mũ. Ag tỹ hĕ ri ke jé ti to jũgũ nĕ? he sóg. Hã kỹ sóg vĕnh jyvĕn tĩ ag mỹ ti ven mũ. 29Kỹ sóg vég mũ. Ag jykre tigrin ag tóg ti to jũgũ mũ. Crime han tũ ti nĩ. Ti tỹ nĕn ù to ter jé han tũ ti nĩ gé. Kỹ tóg ti tỹ nĕn ù to se kỹ nỹ jé tóg han tũ nĩ gé. 30Hã ra sóg nĕn ù mĕ gé. Ti to ag tóg vãjig mũ sir, hã kỹ sóg vĕsýmĕr ti jĕnĕg mũ ã to. Ti kato vĩ mũ ag mỹ sóg: ti hã mré vĩmnĩ, he mũ gé,” he tóg.

Vĕnh rá ki tóg tó ja nĩ, major ti, governador mỹ.

31Kỹ soldado ag tóg han mũ sir, ti tỹ ag mỹ nĕn tó mũ ti. Paulo pére ag tóg mũ mũ. Kuty tá mũ kỹ ag tóg cidade tỹ Antipátride tá junjun mũ. 32Tỹ vaj kỹ ag tóg kyrãgrã mũ, ãjag jamã ra, ù tỹ ãjag pĕn kã mũ mũ ag. Cavalo kri mũ ag tóg ti pére mũ mũ inhhã. 33Ēn ag vỹ Cesaréia tá junjun mũ. Governador mỹ ag tóg vĕnh rá ĕn nĩm mũ. Kỹ ag tóg ti mỹ Paulo ven mũ.

34Kỹ pã'i mág ĕn tóg vĕnh rá vég mũ, kỹ tóg Paulo mỹ: “tỹ ã ga tỹ hĕ tá ke nĩ, ga tỹ ne tá?” he mũ. Kỹ tóg ti mỹ: “ga tỹ Cilícia tá,” he mũ. 35Kỹ tóg Paulo mỹ: “ã kato vĩ mũ ag tỹ junjun kỹ sóg ã ki jĕmĕnh mũ,” he mũ. Kỹ tóg soldado ag mỹ: “pã'i mág tỹ Herodes tỹ vĕnh jyvĕn jafã krĕm ti nĩm,” he mũ, pã'i mág tỹ Félix ti.

Ag tỹ Paulo kato vĩ

24 15 dias tũg kỹ pã'i tỹ Ananias vỹ tá jun mũ, cidade tỹ Cesaréia tá. Topĕ tũ ki rĩr tĩ to pã'i mág vĕ. Kófa ag vỹ junjun mũ gé ti mré. Û vỹ vĩ kãfór han tĩ gé, ti jiji hã vỹ: Tértulo, he mũ. Kỹ ag tóg pã'i mág tỹ governador mỹ Paulo tó mũ, ón kỹ ti kato vĩ kỹ. 2Kỹ tóg Paulo jé prĕr mũ.

Kỹ Tértulo tóg ti kato vĩ mũ, kỹ tóg: “Félix!,” he mũ. “Hã tãvĩ ã tóg jĕ,” he tóg ti mỹ. “Ēg ki ã tóg rĩr há tãvĩ han tĩ, kỹ ĕg tóg jatun mỹ nỹtĩ. ã tỹ nĕn to jykren mũ kar tóg ĕg mỹ há tĩ,” he tóg, Félix mỹ. 3“Hã kỹ ĕg tóg ã to há (pĕ) tãvĩ nỹtĩ. ã to ĕg jykren há han tĩ. Kurã kar ki ĕg tóg ã to vĩ há han tĩ,” he tóg. 4“Kỹ ĕg tóg ã

mré nén ũ sī (pē) to vīnh kāmū mū. Kutar ã nĩ, ěg ki rĩr há han kȳ, hã kȳ ěg tóg ã mȳ vĩ mág han sór tũ nĩ. ěg to ã há nĩ, hã kȳ ã tóg ěg vĩ mē sór mū,” he tóg.

⁵“Tag ti vȳ vĩ kónān tāvĩ han tĩ. Israel kar ag krĩn kónān tóg tĩ, kȳ ag tóg tĩ tigrĩn vėnh kāpugpóp kȳ nȳtĩ. Ga kar mĩ tóg ke tĩ. Kȳ tóg tȳ Nazaré tá ke ěn mré ke ag pã'i mág nĩ gé,” he tóg. Paulo to tóg ke mū. ⁶“Kȳ tóg Topē jo ĩn kāvėnh sór mū gé, hã kȳ ěg tóg ti kágmi. ěg tȳ ěg jykre ki ti jyvėn ke vė vė. ⁷Hã ra Lísias tóg kãtĩ mū, major ěn ti. Kȳ tóg ti kágmiġ mū. ěg kuju ki tóg ti tȳ hãn ke mū, jũ kȳ. ⁸Kȳ tóg ti kato vĩ mū ag mȳ ké, ag tȳ ã venh kāmū jé. Ā tȳ vėse tag ti ki jēmē kȳ ã tóg venh mū. Ki hã ěg tóg ke tĩ. Ā mȳ ti tónh mū,” he tóg, Tértulo ti. Ti tȳ Paulo to ón hã vė.

⁹Kȳ Israel ag tóg ti mré tó mū gé, pã'i ěn ag. “Ti tȳ ki hã ke vė,” he ag tóg, Tértulo to.

Paulo tȳ vėnh kāmén

¹⁰Kȳ governador tóg Paulo mȳ ã nĩgé tȳ ven mū, Paulo vĩ jé. Kȳ Paulo tóg: “prȳg tȳ hėn ri ke ki ã tóg tȳ pã'i mág nĩ, Israel ag mȳ,” he mū. “Hã kȳ tóg sȳ ã mȳ inh jykre tón kȳ tóg inh mȳ sér tĩ,” he tóg.

¹¹“Kurã tȳ 12 pátėn tũ tóg nĩ, sȳ Jerusalém tá jun ti. Sȳ tá Topē tũ han jé sóg ra tĩg ja nĩgtĩ. Vėnh kar vȳ tá inh ve ja nĩgtĩ. Ag hȳn ã mȳ tónh mū, ã tȳ ag ki jēmėn kȳ,” he tóg. ¹²“Hã ra sóg jatun mȳ isũ han ti ja nĩ. Topē jo ĩn krėm sóg ũ vĩ kafān ja tũ nĩ. Vėnh génh han ja tũ sóg nĩ gé, ěg vėnh kanhrān jafã krėm. Cidade ki sóg nén ũ kórég han ja tũ nĩ gé,” he tóg. ¹³“Ag tȳ inh kato vĩ mū pi(jé) tȳ ki hã ke nĩ! Ā tȳ ve há nĩn kȳ ã tóg ki kanhró nĩnh mū,” he tóg. ¹⁴“Kȳ sóg ã mȳ ki hã tónh mū ha,” he tóg. “Inh jóg!jóg ag tȳ Topē jykre han tĩ ěn hã han isóg tĩ gé, kȳ sóg vāsȳ nén rán kȳ nĩ ěn kri fig tĩ gé, ũ tȳ Topē vĩ tó ti ag tȳ nén rán ja ěn ti, Moisés mré hã. Hã ra sóg vėnh jykre tãg tag han mū gé, Topē tȳ ũri ěg mȳ nén tó mū ti. Tag to ag tóg: “vyr mȳ vėnh jykre vė,” he tĩ, pã'i ag. ¹⁵Hã ra sóg ag ri kėn Topē tȳ nén han ke ěn ve sór mū. Ti tȳ ěg ter kar kȳ ěg rĩn mǎn ěn ve sór isóg mū. ũn jykre kuryj ag rĩn mǎn jé tóg ke mū, ũn jykre pāno ag ke gé,” he tóg. ¹⁶“Kȳ sóg tĩg há han sór mū (mȳr), ũ tȳ iso: nén ũ kórég han ti huri, he tũ nĩn jé,” he tóg. “Topē rĩnve sóg tĩg há han sór mū,” he tóg.

¹⁷“Vãhã sóg Jerusalém tá jun mǎn. Prȳg tȳ hėn ri ke ki sóg tá jun ja tũ nĩ vė. Hã ra sóg ra vyr, sȳ inh povo ki ũn jagãgtar fag mȳ nén ũ vin jé, sȳ Topē mȳ nén ũ pũn jé gé,” he tóg. ¹⁸“Vėnh jãnhkrig ja sóg nĩ, ěg jykre ki. Kȳ sóg Topē jo ĩn kãra rã ja nĩ, jatun mȳ, vėnh génh han tũ kȳ. ¹⁹Hã ra Israel ag tȳ Āsia tá ke ag vȳ tá inh ve ja nĩgtĩ gé,” he tóg. “ěn ag tȳ ã jo nȳtĩn kȳ, ag tȳ inh kato vĩ kȳ tóg há tĩ vė, ag tȳ iso jykren mū ra, ag tȳ iso jũ mū ra,” he tóg. ²⁰“Hã ra ũ tȳ ki nȳtĩ ag tȳ ã mȳ inh jykre kórég tónh ke vė. Vėnh jyvėn tĩ ag vȳ inh ki jēmē ja nĩ, kȳ tag ag vȳ tá nȳtĩ ja nĩ. Hã ra ag tóg tá isȳ nén ũ vėnhmȳ han ve ja tũ nĩ,” he tóg. ²¹“Vėnh vĩ pir tȳ sóg jamã hár(a) tó ja nĩ, isȳ ag rĩnve jėn kȳ, hã vȳ: Topē tȳ ũn ter mū rĩn mǎn mū ěn kri sóg fig mū, hã kȳ ãjag tóg ũri iso jũgũ mū, he ja sóg nĩ ag mȳ,” he tóg, Paulo ti.

²²Kȳ Félix tóg kurã ũ kã ti ve mǎn sór mū, pã'i mág tȳ governador ěn ti. Jesus japry ki kanhró tóg nĩ, Jesus jamĩn ki, ti jykre ki, Félix ti. Hã kȳ tóg: “major tȳ

Lísias kătĩg k̄y sóg ājag ki jēmē k̄an m̄ũ,” he m̄ũ. ²³K̄y tóg capitão m̄y: “ti f̄eg han ra,” he m̄ũ. “Ti jagāgt̄an ra h̄a ra,” he tóg. “Ti mré ke ag t̄y ti m̄y n̄en ũ n̄im sór k̄y tóg há n̄i. Ag m̄y nenh t̄ug n̄i,” he tóg, capitão m̄y, Félix ti. Ti t̄y Paulo to ken h̄a v̄e.

Félix t̄y Paulo ki jēmē m̄an

²⁴Si há t̄u ra Félix v̄y Paulo v̄i m̄e m̄an sór m̄ũ, ti pr̄ũ fi mré. Fi jyjy h̄a v̄y: Drusila, he m̄ũ. Israel fi v̄e. K̄y tóg Paulo jé pr̄er m̄ũ sir, Félix ti, ti t̄y fag m̄y Jesus Cristo ki r̄a k̄amén jé.

²⁵K̄y Paulo tóg v̄enh jykre kuryj k̄amén m̄ũ sir. V̄eso jykrén ke k̄amén tóg m̄ũ. Topē t̄y kar k̄y v̄enh kar t̄y n̄en han m̄ũ tó tóg m̄ũ. K̄y Félix tóg ā kanē t̄y j̄ur̄in' ke m̄ũ sir, ti t̄y ā jykre p̄ano m̄i ēkrén k̄y. K̄y tóg ti m̄y: “ha ver t̄ig,” he m̄ũ. “Kej̄en sóg ā ki jēmē m̄an m̄ũ gé, kar k̄y, inh kutar t̄u n̄in k̄y,” he tóg, Félix ti, Paulo m̄y. ²⁶H̄a ra tóg Paulo ki j̄ankamy m̄an sór m̄ũ gé, ti t̄y ti kav̄an jé, ti t̄y ti kyv̄an jé. H̄a jé tóg k̄anhmar ti jé pr̄er m̄an', k̄anhmar ti jé pr̄er m̄an' he t̄i, ti mré v̄emén jé. H̄a ra Paulo tóg ti m̄y ven t̄ug.

²⁷H̄a ki pr̄yg régre tóg t̄ug m̄ũ sir. K̄y Félix j̄egja k̄a ũ tóg j̄e m̄ũ sir, h̄a v̄y: Pórcio Festo, he m̄ũ. K̄y Félix tóg Israel ag t̄y ā to v̄i há han sór m̄ũ, ag t̄y ti t̄y jykrén há han jé, ti n̄ón. H̄a k̄y tóg Paulo kav̄ag t̄u n̄i. Se k̄y tóg j̄e n̄i.

Paulo t̄y p̄a'i mág t̄y Imperador ve sór

25 ¹H̄a k̄y Festo v̄y t̄y governador n̄i sir. Ti t̄y 3 (ke) dias ěn k̄a p̄a'i mág n̄in k̄y tóg cidade t̄y Cesaréia tá kutē k̄y cidade t̄y Jerusalém ra tí m̄ũ. ²K̄y Topē t̄u ki r̄ir t̄i to p̄a'i mág ag v̄y Israel há ag mré v̄i mág han m̄ũ, Paulo kato. K̄y ag tóg governador m̄y n̄en ũ to v̄i m̄ũ. ³“Á t̄y ěg to há n̄in k̄y v̄enh v̄i j̄en̄emn̄i, Paulo t̄y Jerusalém m̄i k̄at̄ig jé, ěg m̄i,” he ag tóg ti m̄y. H̄a ra ag tóg ti k̄at̄ig k̄y ti tén sór m̄ũ, ěpy kri, ěm̄in kri.

⁴H̄a ra Festo tóg ag m̄y: “Cesaréia tá tóg se k̄y j̄e, Paulo ti,” he m̄ũ. “Jó sóg k̄anhmar ra t̄ig m̄ũ gé,” he tóg. ⁵“K̄y ājag p̄a'i ag v̄y inh mré m̄unh m̄ũ gé. Tá sóg ājag mré ti venh m̄ũ, ti t̄y h̄en ri ke m̄un n̄en ũ kórég han ja ěn ti,” he tóg. ⁶K̄y tóg tá n̄i s̄i han m̄ũ sir, 8 (ke) dias h̄yn h̄en ri ke m̄un, ke t̄u n̄i k̄y 10 (ke) dias h̄yn. K̄y tóg Cesaréia ra v̄yn ke m̄an m̄ũ. T̄y vaj k̄y tóg ā t̄y kri n̄in k̄y ag jyv̄en jaf̄a kri n̄i m̄ũ. K̄y tóg soldado m̄y: “Paulo pére k̄at̄i,” he m̄ũ. ⁷Ti kat̄ig k̄y Israel ag tóg ti jy n̄ȳt̄i, Jerusalém tá k̄am̄ũ ag. Paulo kato ag tóg v̄i t̄y h̄en ri ke han m̄ũ. Ti jykre p̄ano tugtóg ag tóg m̄ũ sir, ón k̄y, h̄a ra tóg ag m̄y ki krov t̄u n̄i.

⁸K̄y Paulo tóg v̄enh k̄amén m̄ũ sir, k̄y tóg: “Israel ag jykre mranh ja t̄u sóg n̄i,” he m̄ũ. “Topē jo ĩn kav̄enh ja t̄u sóg n̄i gé. K̄y sóg ěg kar p̄a'i mág t̄y Imperador v̄i mranh ja t̄u n̄i gé,” he tóg, Paulo ti.

⁹H̄a ra Festo tóg Israel ag m̄y n̄en ũ há han sór m̄ũ. H̄a k̄y tóg Paulo m̄y: “m̄y ā t̄y Jerusalém ra t̄ig jé há?” he m̄ũ. “S̄y tá ā jykre venh há tóg t̄i, ag t̄y ā kato v̄i ti,” he tóg, Festo ti.

¹⁰H̄a ra tóg Paulo m̄y ag t̄y tá ti tén ha m̄e t̄i, h̄a k̄y tóg: “ne jé,” he m̄ũ. “Ěg p̄a'i mág t̄y Imperador j̄egja k̄a ā tóg inh ki jēm̄eg m̄ũ,” he tóg. “H̄a k̄y ā t̄y tag ki inh

jykre venh ke vē,” he tóg. “Israel ag to sóg jykre pãno han ja tũ nĩ (mÿr). Kÿ ã tóg ki kanhró nĩ (mÿr), ha mẽ,” he tóg. ¹¹“Isÿ crime han ra isÿ to ter ke vē vē. Kÿ sóg ne tónh ke tũ nĩ vē. Hã ra ag tóg ón kÿ inh kato vĩ mũ sir. Hã kÿ tóg ã tÿ ag mÿ inh fêg kÿ vênhmÿ tĩ. ã tÿ ag mÿ nén há han sór vē (mÿr), hã kÿ ã tóg ag mÿ ke mũ. Ēg pãli tÿ Imperador hã tóg ã pin kÿ inh jykre venh ke mũ,” he tóg, Paulo ti.

¹²Kÿ Festo tóg ã mré jykrén mũ ag mré vĩ mũ, kÿ tóg Paulo mÿ: “ã tÿ Imperador ve sór kÿ ã tóg Imperador venh tĩg mũ, cidade tÿ Roma ra,” he mũ, Paulo mÿ.

Pãli tÿ Agripa tÿ Paulo mré vĩ

¹³Si há tũ ra Israel ag pãli mág tÿ Agripa vÿ cidade tÿ Cesaréia tá jun mũ, ti prũ tÿ Berenice fi mré. Fag tÿ Festo to pygsa ke vē. ¹⁴Tá fag tóg kurã pir tũg mũ. Kÿ Festo tóg ti mÿ Paulo kãmén mũ. Kÿ tóg ti mÿ: “Félix vÿ vēse ù kavãn ja tũ nĩ,” he mũ. ¹⁵“Kÿ Topê tũ ki rĩr tĩ to pãli mág ag tóg inh mÿ ti kãmén, Israel ag kófa ag ke gé. Jerusalém tá ag tóg inh mré ti kato vĩ, isÿ ag mÿ: té, ha ti vóg kónãn, he jé,” he tóg. ¹⁶“Kÿ sóg ag mÿ: ěg jykre tóg ge tũ nĩ, he mũ. Ēg pi(jé): ti tén ra, henh mũ!, kãnhmar!, he sóg. Ti kato vĩ mũ ag tÿ ti kato nÿtĩn kÿ tóg vênh kãmén tĩ, vēse ti. Kar ěg tóg ti vóg kónãn tĩ sir. Romano jykrén hã vē, he sóg ag mÿ,” he tóg Festo ti. ¹⁷“Hã kÿ ag tóg tag ki vênh mãn mũ. Kÿ sóg vēsÿmér ag vég mũ, tÿ vaj kÿ. Inh nĩg jafã kri nĩ kÿ sóg Paulo jé prêr mũ,” he tóg. ¹⁸“Kÿ ag tóg ti kato vĩ mũ. Hã ra ag tóg isÿ nén to jykrén mũ tó tũ nĩgtĩ (mÿr), ti jykre kórég ti,” he tóg. ¹⁹“Ag Topê jykre tó ag tóg mũ. Ûn ter mũ tó ag tóg mũ, ag tÿ ùn to: Jesus, he mũ ěn ti. Hã ra Paulo tóg ti to: rĩr ti jē nĩ, he mũ,” he tóg. ²⁰“Kÿ sÿ ne to jykrén ke tóg tũ ti inh mÿ. Kÿ sóg Paulo mÿ: ã mÿ Jerusalém ra tĩg ke tũ nĩ? he mũ. Tá ag tóg ã jyvên há han mũ sir, he sóg ti mÿ,” he tóg. ²¹“Hã ra Paulo tóg ěg pãli mág tÿ Imperador ve sór mũ, ti tÿ ti jykre ve jé. Hã kÿ sóg soldado ag mÿ: ti fêg han ra, he mũ. Kejēn sóg Imperador ra ti jēnēnh mũ, he sóg ag mÿ,” he tóg, Festo ti, pãli tÿ Agripa mÿ.

²²Kÿ Agripa vÿ Festo mÿ: “sÿ ti vĩ mẽnh hã tóg ti,” he mũ.

Kÿ Festo tóg: “vaj kÿ ã tóg ti vĩ mẽnh mũ,” he mũ

²³Tÿ vaj kÿ Agripa vÿ kãtĩ mũ, Berenice fi mré. Kur sĩnvĩ rĩnh kÿ fag nÿtĩ, pãli mág kur ti. Tenente ag mré fag tóg kãmũ mũ, ùn kãfór ag mré ke gé, cidade ěn tá ke ag. Īn mág kãra ag tóg ge mũ. Kÿ Festo tóg Paulo jé prêr mũ sir. Kÿ ag tóg ti pére kãmũ mũ.

²⁴Kÿ Festo vÿ: “pãli tÿ Agripa!,” he mũ. “Tag ki ke kar!,” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vĩ. Tag ki ag tóg inh mré vĩ mũ gé ti to. Prēnprēr ag tóg, ti ter jé,” he tóg. ²⁵“Hã ra sóg vég mũ. Nén ù vênhmÿ han tũ tóg nĩ, ti tÿ to ter jé. Kÿ tóg pãli mág tÿ Imperador ve sór mũ, hã kÿ sóg to jykrén mũ. Sÿ ti jēnēnh ke vē,” he tóg. ²⁶“Hã ra sóg ti to nén rán ke ki kagtĩg nĩ ver, sÿ Imperador mÿ nén rán jé. Hã kÿ sóg ti jé prêr, ãjag tÿ ti ve jé, ã tÿ ti ve jé, pãli tÿ Agripa!,” he tóg. “Ájag tÿ ti ki jēmē kÿ sóg sÿ nén rán ke ki kanhró nĩnh mũ,” he tóg. ²⁷“Sÿ nén rán tũ ra ti jēnē kÿ tóg vênhmÿ nÿnh mũ, sÿ ag tÿ ti kato nén tó mũ ěn rán tũ ra,” he tóg, Festo ti.

Paulo t̃y ṽenh kāmén m̃an

26 ¹K̃y Agripa ṽy Paulo m̃y: “ã t̃y ṽenh kāmén k̃y tóg há t̃i,” he m̃u. ²K̃y Paulo tóg ã ñigé t̃y kr̃yg he m̃u, k̃y tóg: “p̃a'i Agripa!,” he m̃u. ³“Ã h̃a ne tóg Israel jykre kar ki kanhró ñi! H̃a k̃y tóg inh m̃y há t̃i, s̃y ũri ã jy ṽi k̃y,” he tóg. ⁴“Israel ag t̃y inh kato ṽi m̃u to sóg kāmén k̃an sór m̃u ã m̃y,” he tóg. “H̃a k̃y jatun m̃y inh ṽi jēmēm̃ñi,” he tóg.

⁴“Israel kar ṽy inh ki kanhró ñyt̃i, ṽās̃y, is̃i k̃a, is̃y inh mur ja tá ñin k̃a, is̃y kar k̃y Jerusalém tá ñin k̃y ke gé,” he tóg. ⁵“Is̃i k̃a sóg ěg jykre han k̃an m̃u, tag ki kanhró ag ñyt̃i, ag t̃y tó sór k̃y,” he tóg. “T̃y sóg Fariseu ñi (m̃yr), jó Fariseu ag ṽy ěg jykre kar to tar ñyt̃i (m̃yr),” he tóg. ⁶“H̃a ra ag tóg inh kato ṽi m̃u. Topē ṽy ěg jóg'jóg ag m̃y: “r̃ir m̃an jé ãjag tóg ke m̃u, ãjag ter k̃y,” he ja ñigt̃i. T̃i ṽi tag kri sóg fig m̃u, h̃a k̃y ag tóg inh kato ṽi m̃u,” he tóg. ⁷“Povo t̃y 12 (ke) ṽy t̃y ěg ñyt̃i. ěg kar ṽy Topē jykre hyn han t̃i, kuty ki, kurā ki ke gé. ěg t̃y ter kar r̃ir m̃an jé, h̃a jé ěg tóg ke t̃i, h̃a jé ěg tóg Topē jykre han t̃i, p̃a'i t̃y Agripa!,” he tóg. “S̃y Topē t̃y ěg m̃y tag tó kri fi k̃y Israel ag tóg inh kato ṽi m̃u,” he tóg. ⁸“M̃y ãjag m̃y ṽenhm̃y, Topē t̃y ũn ter kar r̃in m̃an ke t̃i?” he tóg. “Ṽenhm̃y ke t̃ug ñi,” he tóg, Paulo ti.

⁹“H̃a ra sóg ṽās̃y Jesus kato tē ja ñi gé. Nazaré tá ke ěn mré ke ag vóg kónan jagy han ja sóg ñi vē, ṽās̃y,” he tóg. ¹⁰“Jerusalém tá sóg ke ja ñigt̃i. Jesus t̃u ag sigse ja sóg ñigt̃i gé. Topē t̃u ki r̃ir t̃i to p̃a'i mág ag ṽy inh m̃y tag to permissão han ja ñigt̃i gé,” he tóg. “Ag t̃y Jesus mré ke ag kām̃i ũ tén k̃y tóg inh m̃y há ja t̃igt̃i gé,” he tóg. ¹¹“Ěg ṽenh kanhran jafā krēm isóg ag vóg kónan ja ñigt̃i gé, ag t̃y Jesus ki ge tag tovānh jé, ag t̃y ti m̃y ṽi kónan jé. Ag to sóg j̃u t̃āṽi ja ñigt̃i gé, inh fe t̃y g̃ym ken k̃y. K̃y sóg cidade ũ ra ag nón t̃ig ja ñigt̃i gé, ag vóg kónan jé,” he tóg.

Paulo t̃y ã t̃y Jesus ki r̃a kāmén

(Hk 9.1-19; 22.6-16)

¹²“H̃a k̃y sóg cidade t̃y Damasco ra t̃ig ja ñi gé. Topē t̃u ki r̃ir t̃i to p̃a'i mág ag ṽy inh m̃y permissão han ja ñigt̃i, inh m̃y: ha t̃ig, hen k̃y. ¹³Ěpry jagma sóg meio dia ki jēngrē tar vé, kanhkā tá. R̃a k̃afór vē, ha mē, p̃a'i,” he tóg. “Jēngrē ěn ṽy inh ki kómkóm ké, inh mré m̃u ag ki ke gé. ¹⁴K̃y ěg kar ṽy vár m̃u, ga kri. K̃y sóg ṽenh ṽi mē. Inh mré tóg ṽi, Hebreu ṽi ki, k̃y tóg inh m̃y: “Saulo! Saulo!” he m̃u. “Ã h̃a ne tóg is̃u ag vóg kónan ñi!” he tóg inh m̃y. “Ã vóg isóg m̃u, ka junun kri ferro ěn t̃y, monh vóg jafā ěn t̃y. K̃y tóg ã t̃y inh kato nig k̃y, ã t̃y ka kato ṽās̃an k̃y tóg kaga mág t̃inh m̃u,” he tóg inh m̃y, ṽenh ṽi t̃i,” he tóg, Paulo ti.

¹⁵“K̃y sóg ěg Senhor m̃y: “ã t̃y ũ nē?” he m̃u. K̃y tóg inh m̃y: “t̃y sóg Jesus ñi,” he m̃u. “Ã t̃y ũn vóg kónan sór t̃i ěn ṽy t̃y inh ñi,” he tóg inh m̃y. ¹⁶“Jēg ra, ṽenh r̃a h̃a jēg,” he tóg. “Ã m̃y sóg ṽenh ven, ã t̃y is̃u han jé, ã t̃y nén vég m̃u tag tó jé. Ã m̃y sóg ṽenh ven m̃an ke m̃u gé, kejēn. Tag kar tó jé ã tóg ke m̃u,” he tóg inh m̃y. ¹⁷“Ã povo m̃y sóg ã jēnēnh m̃u, fóg kar ag m̃y ke gé, kanhgág kar ag m̃y ke gé. H̃a ra sóg ã jy ñigān m̃u,” he tóg inh m̃y. ¹⁸“Ag kanē nugnón

sór inh mũ (mỹr). Ag tỹ vènh jykre pãno han kỹ tóg ag kãki kuty nĩ sir, hã ra sóg ag kãki jẽngrẽ han sór mũ. Satanás krêm ag nỹtĩ, Japo krêm. Hã ra sóg ag kygvãn sór mũ, ag tỹ inh jykre han jé. Ag tỹ inh vĩ mranh tỹ sóg vènh pãte fón sór ke mũ (mỹr), ag tỹ ù tỹ inh ki ge kỹ nỹtĩ ag mré kanhkã tá nỹtinh ken jé, isỹ ùn kuprẽg kar ag mré hã,” he tóg inh mỹ, Jesus ti,” he tóg, Paulo ti.

Paulo tỹ ã rãnrãj kãmén

¹⁹“Kỹ sóg ti vĩ mranh tũ nĩ, pã'i tỹ Agripa!,” he tóg. “Kanhkã tá nĩ kỹ tóg inh mré vĩ ja nĩ, Jesus ti, kỹ sóg ti vĩ han. ²⁰Damasco tá ke ag mỹ sóg tó vén, kar Jerusalém tá ke ag mỹ ke gé, ga tỹ Judéia tá ke ag kar mỹ ke gé. Israel kar ag mỹ sóg tó mũ, kar sóg fóg ag mỹ tó mũ gé sir, kanhgág ag mỹ ke gé. Ag mỹ sóg tó, ag tỹ ãjag jykre tovãnh jé, ag tỹ Topẽ jykre han jé sir, ag tỹ vènh jykre kurj han jé, vènh kar tỹ ag tỹ ãjag jykre tovãnh ve jé,” he tóg, Paulo ti.

²¹“Isỹ tag han to Israel ag tóg Topẽ jo ãn krêm inh kãgmĩ ja nĩgĩ, isén jé,” he tóg. ²²“Hã ra Topẽ tóg inh jy nĩgãn mũ. Hã kỹ sóg ùri jẽ mũ. Ti vĩ tó inh mũ (mỹr), ùn mág ag mỹ, ùn kãsir ag mỹ ke gé. Vãsỹ Topẽ vĩ tó tĩ ag tóg tó ja nĩgĩ, isỹ nén tó mũ tag, Moisés mré hã,” he tóg. ²³“Cristo jagtar ke tó ja ag tóg nĩgĩ. ã ter kar rĩr vén ke ti, ãg jo, he ja ag tóg nĩgĩ, Cristo to. Kỹ tóg ãg povo mỹ jẽngrẽg tĩ ãn ri ke nĩ sir, fóg kar ag mỹ ke gé, kanhgág kar ag mỹ ke gé,” he tóg, Paulo ti.

²⁴Paulo tỹ gen kỹ tóg Festo mỹ e tĩ sir, Paulo tỹ vènh kãmén kỹ. Kỹ Festo tóg jamã hár(a): “krĩ tũ ã nĩ, Paulo!,” he mũ. “ã tỹ vènh rá ve mág kỹ tóg ã krĩ tũ (pẽ) tĩ,” he tóg, Festo ti.

²⁵Hã ra tóg ti mỹ: “inh krĩ vỹ há nĩ, Festo!,” he mũ. “Hã tãvĩ ã jẽ nĩ vỹ,” he tóg ti mỹ. “Hã ra sóg ki hã tó mũ (mỹr), to jykren há han kỹ,” he tóg. ²⁶“Tag kã nĩ vỹ ki kanhró nĩ, pã'i tỹ Agripa tag ti. Hã kỹ sóg ti ve kỹ mỹ'ãg tũ nĩ. Tó kãn sóg mũ. Mẽ ti huri, ki kanhró tóg nĩ. Vènh kar tóg mẽ kãn tĩ ha,” he tóg.

²⁷“Pã'i tỹ Agripa!,” he tóg. “ã mỹ Topẽ vĩ tó tĩ ag tỹ nén tó mũ kri fig mũ!?” he tóg. “Kri nĩm ã tóg mũ, ki kanhró sóg nĩ,” he tóg.

²⁸Kỹ Agripa tóg Paulo mỹ: “vẽme sĩ tỹ ã mỹ isỹ Cristo ki rã han sór mũ!?” he mũ.

²⁹Kỹ Paulo tóg ti mỹ: “hỹ,” he mũ. “Hã to sóg Topẽ mré vĩ mũ,” he tóg. “ã tỹ vẽme sĩ hã ki Jesus ki rãnh ken kỹ tóg há tĩ vè, ke tũ nĩ kỹ vẽme mág ki. ã tỹ inh ri kén ke kỹ tóg há tĩ vè, ã, ã mré inh vĩ mæg mũ ag ke gé. Isỹ se kỹ jẽ tag hã to sóg ã mỹ: inh ri kemnĩ, henh ke tũ nĩ,” he tóg, Paulo ti.

³⁰Kỹ pã'i tỹ Agripa vỹ jëg nẽ mũ sir, governador ke gé, Berenice fi ke gé, ag mré nỹtĩ kar ag ke gé. ³¹Kỹ ag tóg kãpa mũ. Kỹ ag tóg jagnẽ mré vĩ mũ. “Nén ù kórég han tũ ti nĩ,” he ag tóg. “Véké tóg se kỹ jẽ. ã tỹ nén han tũ to tóg ter ke tũ nĩ,” he ag tóg. ³²Kỹ Agripa tóg Festo mỹ: “tĩ tỹ kyvar kỹ jẽ hã vè vè, hã ra tóg pã'i mág tỹ Imperador ve sór mũ,” he tóg mũ.

Cidade tỹ Roma ra

27

¹Hã kỹ Festo tóg kejën Paulo mỹ: “ã tỹ ga tỹ Itália ra tĩg ke nẽ ha,” he mũ. Kỹ tóg pã'i mỹ ti fëg mũ. Soldado ag capitão vè, pã'i

ën ti. Û tỹ Imperador mré ke ag he mü ãn capitão vë. Ti jiji hã vỹ: Júlio, he mü. Ti mỹ ag tóg vëse ù ag vin mü gé.

²Kỹ ãg tóg canoa mág kãra ge mü sir. Cidade tỹ Adramítio tá ke vë, canoa mág ãn ti. Ag tỹ ga tỹ Ásia fyr to mü sór vë, canoa kãmĩ. Kỹ ãg tóg goj kãmĩ mü mü, tá pa kỹ. Aristarco tóg ãg mré tĩ mü, cidade tỹ Tessalônica tá ke ãn ti, ga tỹ Macedônia tá ke ãn ti.

³Tỹ vaj kỹ ãg tóg cidade tỹ Sidom tá krỹg mü sir. Kỹ Júlio tóg Paulo mỹ vĩ há han mü. Kỹ tóg ti mỹ: “ã mré ke ag venh tĩg, ag tỹ ã ki rĩr jé,” he mü.

⁴Tá pa kỹ kãka tóg ãg kato tẽ mü. Kỹ ãg tóg goj vãso tỹ Chipre kakãm mü mü, ti tỹ ãg jakãnh tá nĩn kỹ. ⁵Kỹ ãg tóg goj kafã tũ kãmĩ mü mü, ga tỹ Cilícias fyr to, ga tỹ Panfília fyr to ke gé. Kỹ ãg tóg cidade tỹ Mirra tá junjun mü sir, ga tỹ Lícia tá. ⁶Tá capitão tóg canoa mág ù vëg mü, cidade tỹ Alexandria tá canoa, ù tỹ ga tỹ Itália ra tĩ mü ãn. Kỹ tóg ãg mỹ: “kã ge jëg,” he mü, capitão ti. ⁷Kãmĩ ãg tóg mü mü. Komër hã ãg tóg mü mü, kurã tỹ hën ri ke ki. Kỹ ãg tóg vãhã goj vãso tỹ Cnido tá junjun mü. Hã ra kãka tóg ãg kato tẽ mü gé. Kỹ ãg tóg tá fĩn rãm tũ nĩgtĩ. Kỹ ãg tóg goj vãso tỹ Creta kakãm mü mü, kãka tỹ ãg tỹ virĩn ke kỹ. Krĩ tỹ Salmona kakãm mü ãg tóg mü, kãka krëfĩn. ⁸Kãmĩ tĩg tóg jagy tĩ, Creta fyr to hã tĩg kỹ. Kỹ ãg tóg vãhã komër hã ãg tóg canoa sag ja há he mü tá junjun mü. Cidade ù vỹ tá kakó nĩ, ti jyjy hã vỹ: Laséia, he mü. ⁹Hã ra ãg tóg komër hã mü ja nĩgtĩ, hã kỹ kusa tóg kakó tĩ ha. Kỹ tóg goj kãmĩ tĩg kórég nĩ, kóho tugrĩn. Festa ù pãtén tóg huri, Israel ag vãkre jafã ti. Hã kỹ Paulo tóg ag jyvën kỹ: ¹⁰“goj tóg kãmĩ tĩg kórég tĩ ha, vỹ,” he mü. “Kỹ ãg tóg jagãgtar mü ha. Kỹ tóg inh mỹ canoa tỹ nĩnunh mỹ tĩg ha mẽ tĩ, kỹ ãjag tũ vỹ vãgfor mü sir, jó ãg hën ri ke mĩn kãgter ke mü gé,” he tóg, Paulo ti.

¹¹Hã ra capitão tóg canoa tỹ ù tũn mĩn vĩ mëg mü sir. Canoa vóg mü vĩ mëg tóg mü gé, hã kỹ tóg Paulo vĩ mëg tũ nĩ sir. ¹²Canoa sag ja ãn tóg há sĩ nĩ, hã kỹ ag tóg tá kusa fĩn pa vãnh nỹtĩ. Hã kỹ ùn e ag tóg tá pa sór mü, ag tỹ cidade tỹ Fenice tá junjun jé, tá kusa fĩn pa jé. Goj vãso tỹ Creta tá cidade ù vë, canoa sag ja ù vë, Fenice ti. Tá rã krëfĩn tá kãka vỹ króg he tũ nĩgtĩ. Hã kỹ ag tóg ra mü sór mü sir.

Kóho mág

¹³Hã ra kãka sĩ tóg komër hã kraug he mü sir. Kỹ tóg ag mỹ há tĩ. Hã kỹ ãg tóg tá pa kỹ Creta fyr ra mü mü sir, Creta fyr kakó ra, goj kãmĩ mĩn kỹ. ¹⁴Vãhã kóho jũ tóg canoa kato tẽ mü sir, ti jiji hã vỹ: Nordeste, he mü. Creta tán kãtĩ mü. ¹⁵Hã ra ãg tóg kóho jũ tag kato canoa vóg tỹ hë ri ke tũ nĩ, kỹ ãg tóg ti vóg tovãnh mü sir. Kỹ kóho tóg canoa va tĩ mü. ¹⁶Kỹ ãg tóg goj vãso sĩ to hã mü mü, ti jyjy hã vỹ: Cauda, he mü. Hã ra ãg tóg canoa sĩ nỹgnỹn kãmũ ja nĩ, ti se kỹ. Cauda tá ãg tóg canoa mág kri ti fi han sór mü, hã ra ãg tóg to jagãgtar mü, kóho to. ¹⁷Vãhã ag tóg ti kãtãnfyn mü, canoa vóg tĩ ag. Kar ag tóg canoa mág tógfĩn mü, ti tỹ vãm ke tũ nĩ jé. Hã ra ag tóg rỹnhřỹj kamëg mü, rỹnhřỹj tỹ Sirte he mü ãn, ga tỹ Líbia fyr tá. Hã kỹ ag tóg kur kunũg mü sir. Kur ãn vỹ canoa kri sag tĩ, kãka tỹ ti tĩn jé. ãn kunũg ag tóg mü sir.

¹⁸Hã ra ěg tóg kóho jũ to jagãgtar' he mũ, k̄y ag tóg t̄y vaj k̄y canoa t̄y r̄ĩg mũ ěn kujũ vãm mũ sir, goj ki, ti kufy vẽn̄h kãpãm ag tóg mũ sir. ¹⁹T̄y vaj ũn k̄y ěg tóg jagãgtar tãvĩ n̄ȳtĩ, k̄y ěg tóg vãvãm kãn mũ sir, canoa kãki n̄ȳtĩ ěn, ti tralha ti. ěg kar tóg ag mré vãvãm mũ sir. ²⁰Kurã t̄y hẽn ri ke ki ěg tóg rã vэг tũ (pẽ) nĩ, krĩg ke gé. Kóho jũ ěn tóg ěg kato tẽ mũ. K̄y tóg ěg m̄y ěg kãgter ha mẽ tĩ. “Ěg h̄yn krenkren ke tũ nĩ ha,” he ěg tóg.

²¹Hã ra ěg tóg jęg tũ (pẽ) ja nĩ, kurã t̄y hẽn ri ke ki. K̄y Paulo tóg ag to tĩg k̄y: “ãjag t̄y inh vĩ kri finh ke vẽ vẽ,” he mũ. “Ěg t̄y Creta tá kãpa tũ nĩ ra ěg jagẽgtar tũ n̄inh ke vẽ vẽ, k̄y ãjag t̄y nén ũ kren tũ n̄inh ke vẽ vẽ,” he tóg. ²²“Hã ra ãjag fe ti t̄y r̄ynh kemnĩ. Ěg kar v̄y krenkren mũ. Canoa hã v̄y tũ' henh mũ!” he tóg. ²³“Kuty tag kã Topẽ t̄y jẽnẽ jafã tóg inh mré vĩ mũ. Inh Senhor hã vẽ, ũ t̄y ti jẽnẽg mũ ti, hã v̄y: Topẽ, he mũ,” he tóg. ²⁴“Ti t̄y jẽnẽ jafã tóg inh m̄y: “kamẽg tũg nĩ, Paulo!” he mũ. “Pã'i mág t̄y Imperador ve jẽ ã tóg ke mũ, k̄y Topẽ tóg ã mré mũ ag kar vin, ag t̄y ã mré krenkren jé,” he tóg inh m̄y,” he tóg, Paulo ti. ²⁵“K̄y ãjag fe ti t̄y há' hemnĩ. Topẽ vĩ kri sóg fig mũ. Ti t̄y inh m̄y tó mũ v̄y ge n̄inh mũ,” he tóg, Paulo ti. ²⁶“Jó ěg t̄y canoa t̄y goj vãso to t̄in há tóg tĩ,” he tóg.

²⁷Semana régre vẽ sir, ěg t̄y goj kafãn tũ mũ mũ kri, kóho t̄y ěg ran tĩ ki. Goj kafã tũ ěn jiji hã v̄y: Mediterrãneo, he mũ. Meio noite ki canoa vóg tĩ ag tóg: “ga h̄yn kakó nĩ ha,” he mũ. ²⁸K̄y ag tóg goj kãmũn mũ sir. K̄y tóg 36 (ke) metros he mũ. Kãnhmar ag tóg kãmũn mãn, k̄y tóg 27 (ke) metros he mũ sir. ²⁹K̄y ag tóg pãró kamẽg mũ, ěg t̄y ag m̄y kã ta kenh ha mẽ t̄in k̄y. K̄y ag tóg canoa nér tá ti se jafã t̄y 4 (ke) vin mũ. Ferro ũ vẽ, ti se jafã ti. Ti t̄y r̄ynhr̄yj kãkã n̄y k̄y canoa tóg tá kr̄yg he mũ. Ti vin k̄y tóg ag t̄y kurã venh há tĩ, canoa vóg tĩ ag. ³⁰K̄y ag tóg canoa s̄ĩ ěn térem mũ, goj ki. Canoa se jafã t̄y ag tóg kãki vin mũ, ag t̄y ón k̄y canoa kr̄ĩ tá vin jé. Hã ra ag tóg canoa mág ré k̄y ga ra mũ sór mũ.

³¹Hã ra Paulo tóg vэг mũ. K̄y tóg capitão m̄y, soldado ag m̄y tóg: “ag t̄y pa k̄y ãjag v̄y krenkren ke tũ nĩ,” he mũ.

³²K̄y soldado ag tóg vãfe kym mũ sir, ag t̄y vãfe t̄y canoa s̄ĩ térem k̄y. K̄y canoa s̄ĩ ěn tóg kutẽ mũ sir.

³³T̄y vaj ken k̄y Paulo tóg vẽn̄h kar jyvẽn mũ, ag jẽn jé. K̄y tóg: “semana régre vẽ (m̄ȳr), ãjag fe von k̄y,” he mũ. “Nén ũ kãmẽg tũ ãjag n̄ȳtĩ (m̄ȳr) ver,” he tóg. ³⁴“Pão ko ra, ãjag t̄y tar há ki krenkren jé. Ũ v̄y ter ke tũ nĩ, k̄y ũ v̄y kaganh ke tũ nĩ gé,” he tóg, Paulo ti. ³⁵Ti t̄y tag tó kar k̄y tóg pão mág mũ sir. Vẽn̄h kar r̄ĩnve tóg Topẽ mré vĩ mũ, k̄y tóg kupãn k̄y ko mũ sir.

³⁶K̄y vẽn̄h kar tóg fe tar n̄ȳtĩ sir. K̄y ag tóg ko mũ gé sir. ³⁷276 (ke) ěg n̄ȳtĩ, canoa mág ěn kãki.

³⁸Ěg t̄y ko kar k̄y ag tóg goj ki trigo kugjøg mũ, canoa t̄y kãnhvy' hen jé.

³⁹T̄y vaj k̄y ag tóg vэг mũ sir, hã ra ag tóg goj vãso ěn ki kagtĩg n̄ȳtĩ. K̄y ag tóg tá r̄ynhr̄yj vэг mũ sir, r̄ĩnhr̄ij ti. Tá kóho tóg há s̄ĩ nĩ. K̄y ag tóg tag ra canoa t̄in sór mũ. ⁴⁰K̄y ag tóg ferro ěn kykym mũ sir, goj kãki. K̄y ag tóg canoa vóg jafã kygvãg mũ gé. Canoa kr̄ĩ tá ag tóg kur kujén mũ, kóho kato. ⁴¹Hã k̄y ěg tóg r̄ynhr̄yj ěn to mũ mũ sir. K̄y goj régre tóg jagnẽ ki jun nĩ. K̄y

canoa tóg r̄ynhr̄yj k̄ara r̄a m̄u sir. Ti kr̄i tóg r̄inh̄r̄ij kr̄em r̄a m̄u, k̄y tóg sir tar m̄u sir. K̄y ti nér tóg kam ke m̄u sir, goj j̄u k̄y. K̄y tóg mr̄aj m̄u, canoa ti.

⁴²K̄y soldado ag tóg v̄enh sigse ag k̄agtén sór m̄u, ag mrogmro k̄y v̄enh pigju t̄u n̄in jé, ag krenkren t̄u n̄in jé. ⁴³Hã ra capitão tóg Paulo kren han sór m̄u. K̄y tóg ag m̄y: “ke t̄ug ra,” he m̄u. “Ãjag t̄y t̄ugn̄um há n̄in k̄y goj k̄ara ge vén inhhã, ãjag t̄y ga ra ge vén jé, t̄ugn̄um k̄y,” he tóg. ⁴⁴“Ãjag t̄y t̄ugn̄um kórég k̄y kan kri n̄ymn̄i, canoa mr̄ánhr̄aj kri,” he tóg, capitão ti.

K̄y ag tóg ge m̄u sir. Hã k̄y ãg kar tóg ga tá junjun m̄u, krenkren k̄y.

Goj v̄aso t̄y Malta tá

28 ¹Ëg t̄y ga tá n̄yt̄in k̄y ãg tóg ga jiji m̄eg m̄u, hã v̄y: Malta, he mu. ²Tá ke ag tóg ãg jagãgt̄an m̄u. K̄y ag tóg p̄in han m̄u. Ëg m̄y ag tóg: “kãge j̄eg ra,” he m̄u, ta kutê k̄y, kusa jagy t̄in k̄y. Kanhgág ri ke ag v̄e, tá ke ag.

³K̄y Paulo tóg p̄inh̄ t̄i m̄u, k̄y tóg p̄i ki n̄in m̄u. Hã ra p̄yn tóg p̄i kãkã n̄y ja n̄i. R̄y m̄e k̄y tóg tim ke k̄y Paulo pr̄ag m̄u, ti n̄igé ki. ⁴K̄y tá ke ag tóg p̄yn ãn v̄eg m̄u, ti t̄y ti n̄igé to sa k̄y. K̄y ag tóg jagn̄e m̄y: “ũ tén t̄i h̄yn v̄e,” he m̄u. “Goj tán kren, hã ra tóg ã t̄y n̄en han jan kajãm m̄u,” he ag tóg, Paulo to.

⁵Hã ra Paulo tóg p̄yn kãvén m̄u, p̄i ki tóg t̄y vén m̄u. Hã ra tóg kaga t̄u n̄i, ti n̄igé ti, Topê t̄y ti t̄y há' hen k̄y.

⁶Hã ra ag tóg ti tugn̄ym m̄u, ti kãnhpar ve jé, ke t̄u n̄i k̄y ti ter k̄y kutê ve jé. Hã k̄y ag tóg ti v̄eg n̄yt̄i, hora t̄y h̄en ri ke ki. Hã ra tóg ke t̄u n̄i. K̄y ag tóg ti to jykr̄en m̄an m̄u. “Topê t̄u m̄y vó?” he ag tóg m̄u, ón k̄y, Paulo to. Ag m̄y tóg e t̄i, hã k̄y ag tóg ti to: “topê h̄yn,” he m̄u.

⁷Goj v̄aso tá ke ãn ag kãfór v̄y t̄y Públ̄io n̄i. Tá tóg ãn n̄i, ã jap̄y tá. Ëg t̄y tón n̄yt̄i tag tá tóg kakó n̄i, ti ãn ti. K̄y tóg ãg m̄y: “kãge j̄eg ra,” he m̄u. Ti mr̄é ãg tóg kurã tãgt̄u han m̄u.

⁸Hã ra Públ̄io panh tóg kaga n̄y n̄i. Jãgfa kyvénh han tóg, k̄y tóg to r̄ȳg n̄y n̄i gé. K̄y Paulo tóg ti venh r̄a m̄u. K̄y tóg ti to Topê mr̄é v̄i m̄u. Á n̄igé t̄y tóg ti m̄eg m̄u, k̄y tóg há' he m̄u sir. ⁹Ti han k̄y v̄enh kagyga kar ag v̄y tá junjun m̄u sir, goj v̄aso ãn tá. K̄y tóg ag t̄y há' he kãn m̄u, Paulo ti.

¹⁰K̄y ag tóg ãg ki r̄ir há han m̄u. Ëg t̄y kar k̄y canoa ã k̄ara ge k̄y ag tóg ãg m̄y ãg t̄y n̄en ve sór m̄u kar ãn vin m̄u.

Roma ra

¹¹Kysã tãgt̄u t̄ug k̄y ãg tóg canoa ã k̄ara ge m̄u sir. Cidade t̄y Alexandre tá ke v̄e gé, canoa ãn. Tá tóg kusa f̄in r̄a ja n̄i, Malta tá. Ti rá v̄y t̄y ti v̄egni kãggrã n̄i, ti retrato ãn ti. Ón k̄y Romano ag topê ã v̄e, ti v̄egni kãggrã ti.

¹²Tá pa k̄y ãg tóg m̄u k̄y cidade t̄y Siracusa tá kr̄ȳg m̄u. K̄y ãg tóg tá kurã tãgt̄u t̄ug m̄u. ¹³Tá pa k̄y ãg tóg cidade t̄y Régio tá junjun m̄u. T̄y vaj k̄y kãka tóg ãg vóg há han m̄u. Hã k̄y ãg tóg kurã régre t̄ug k̄y cidade t̄y Pozuoli tá junjun m̄u sir. ¹⁴Tá ãg tóg Jesus mr̄é ke ag v̄eg m̄u, k̄y ag tóg ãg m̄y: “ãg mr̄é semana t̄ug n̄i ver,” he m̄u. Kar k̄y ãg tóg cidade t̄y Roma ra m̄u m̄u sir. ¹⁵Roma tá ke ag tóg ãg kãm̄u m̄e

ja nĩ, Jesus mré ke ag. Kĩ ag tóg ěg venh kāmũ mũ. Cidade tỹ Ápio jamã he mũ ěn tá ag tóg ěg kato tēgtē mũ, ěmã tỹ Venda Tägtũ he mũ ěn tá ke gé. Paulo tỹ ag ve kỹ ti fe tóg mrin ke mũ. Kỹ tóg Topē mỹ vĩ há han mũ. Ti krĩ tóg kãnhvy! he mũ sir.

¹⁶Ěg tỹ cidade mág tỹ Roma tá junjun kỹ Paulo tóg vyr mỹ nĩ nĩ, vēse ũ ag mré tóg nĩ tũ nĩ. Soldado pir hã tóg ti ki rĩr mũ. Capitão tóg ti mỹ tag to: “hej,” he ja nĩ.

Roma tá

¹⁷Kurã tägtũ tũg kỹ Paulo tóg Israel kãfór ag jé prēr mũ. Ag vėnh mãn kỹ tóg ag mỹ: “inh kanhkã!,” he mũ. “Se kỹ inh jē, Jerusalém tá, kỹ ag tóg tá fóg tỹ Romano ag mỹ inh fēg, isỹ nén ũ han tũ hã ra, isỹ ěg jykre mranh tũ hã ra, isỹ ěg jóg!jóg tỹ ěg mỹ vėnh jykre nĩm ja ěn mranh tũ hã ra,” he tóg. ¹⁸“Fóg tỹ Romano ag tóg inh kavãn sór mũ vē, ag tỹ inh ki jēmē kar kỹ. Isỹ nén han ja tũ to sóg ter ke tũ nĩ vē. ¹⁹Hã ra Israel ag tóg inh kato vĩ, hã kỹ sóg sir pã'i mág tỹ Imperador ve sór mũ, ag tỹ isén tũ nĩ jé. Hã ra sóg ěg povo kavėnh sór tũ nĩ, Imperador jo,” he tóg. ²⁰“Hã kỹ sóg ājag jé prēr mũ, sỹ ājag ki jēmē jé. Ěg povo tỹ Israel kar vỹ Cristo ve sór mũ. Sỹ Cristo tó hã to sóg se kỹ jē nĩ,” he tóg, Paulo ti.

²¹Kỹ ag tóg ti mỹ: “ũ tóg ěg mỹ ā to vėnh rán han ja tũ nĩ, Judėia tá,” he mũ ti mỹ, pã'i ag. “Kỹ ěg kanhkã ũ tóg ěg ki jun ja tũ nĩ jé, ti tỹ ěg mỹ ā tỹ nén ũ kórėg han mũ ěn tó jé,” he ag tóg. ²²“Hã ra tóg ěg tỹ ā ki jēmėnh há tĩ, ā tỹ nén to jykrėn mũ ti. Vėnh jykre tãg tag kato ag tóg vĩ tĩ, vėnh kar ag, hã kỹ tóg ěg tỹ ā ki jēmėnh há tĩ,” he ag tóg ti mỹ, Israel mág ag.

²³Kỹ ag tóg ti mỹ kurã nĩm mũ. Kỹ ũn e ag tóg vėnh mãn mũ sir, ti tỹ ĩn krēm nĩ ěn tá. Ag mỹ tóg Topē tỹ tỹ ěg pã'i nĩ kãmén mũ. Jesus kãmén tóg mũ, ag tỹ hėn ri ke mũn ti ki ge jé. Moisés tỹ ag mỹ vėnh jykre nĩm ja ěn tó tóg mũ sir ag mỹ, vãsỹ Topē vĩ tó tĩ ag vĩ ke gé. Vėnh rá ěn ki tóg ag mỹ Jesus ti ven mũ sir. Kusã ki ag tóg kãmũ ja nĩ, tỹ vėmėn nỹtĩ ki ag tóg kutyg mũ. ²⁴Kỹ tóg ũ ag mỹ ki hã tó ti, Paulo tỹ ag mỹ nén tó mũ ti, kỹ ag tóg kri fig mũ. Hã ra tóg ũ ag mỹ há tũ nĩ. ²⁵Hã kỹ ag tóg vėnh kãpugpóv kỹ nỹtĩ. Kỹ ag tóg mũ mũ, Paulo tỹ ag mỹ tag tó kar kỹ, ha mē. Ag mỹ tóg: “Topē kuprĩg tóg tó há han ja nĩ, ti tỹ Topē vĩ tó tĩ tỹ Isaías mỹ: ag mỹ tag tó, hen kỹ,” he tóg. ²⁶“Ěg jóg!jóg ag mỹ tóg tag tó ja nĩ, hã mē: “povo tag mỹ tag tó, hã mē: mē jé ājag tóg ke mũ, ón kỹ, hã ra ājag tóg to jykrėn ke tũ nĩnh mũ, hemnĩ,” he tóg. ²⁷“Kỹ ag tóg ki kagtĩg nỹtĩnh mũ. Povo tag ag vỹ krĩ tũ nỹtĩ, nĩgrėg kutu ag tóg nỹtĩ gé, kanė kyvó ag tóg nỹtĩ gé, ag tỹ nén ũ ve sór tũ nỹtĩn kỹ, ag tỹ jēmē sór tũ nỹtĩn kỹ, ag tỹ to jykrėn sór tũ nỹtĩn kỹ ke gé. Hã kỹ ag tóg inh ki ge sór tũ nỹtĩ gé, kỹ sóg ag tỹ há' henh ke tũ nĩ gé,” he tóg, Isaías ti,” he tóg mũ, Paulo ti, Israel ag mỹ.

²⁸“Hã kỹ sóg, ājag mỹ tó mũ,” he tóg, Paulo ti. “Ājag tỹ mē jãvãnh nỹtĩn kỹ fóg ag vỹ mėnh mũ, kanhgág ag ke gé, Topē tỹ ag krenkren han sór mũ ti. Kỹ ag tóg ti mỹ: hej, henh mũ,” he tóg, Paulo ti, Israel ag mỹ.

²⁹Paulo tỹ tag tó kar kỹ Israel ag tóg mũ mũ sir, jagně vĩ kafã kỹ.

³⁰Paulo vĩ prỹg régre tũg mũ, ã ãn krẽm nĩn kỹ. Alugar hen kỹ tóg jẽ nĩ, ãn ẽn ti, kỹ tóg kajãm mũ, Paulo ti, ã jãnkamy tỹ. Kỹ tóg ù tỹ ti mré vĩ sór mũ mỹ: “kãrã ra,” he ti. ³¹Vẽnh kar mỹ tóg Topẽ tỹ tỹ ẽg pã'i nĩ kãmén mũ sir, fe tar han kỹ. Ẽg Senhor tỹ Jesus Cristo kãmén tóg mũ sir. Ẽ tóg ti mỹ: “vĩ tũg ra,” he tũ nĩ, ti se kỹ nĩ hã ra.